

Здравствуй, родная



6.2019



Снимокъясъс **Юрий Лисовский**лӧн.

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ЮРАЛЫСЬЛӖН АДМИНИСТРАЦИЯ,  
КОМИ РЕСПУБЛИКАСА ГИЖЫСЬ КОТЫР

# ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

## 6 (870) ЛӖДДЗА-НОМЪЯ (ИЮНЬ) 2019

ТАЙӖ НОМЕРЫН:

*О.И. УЛЯШЕВЛЫ — 55*

|                                                     |    |
|-----------------------------------------------------|----|
| Олег УЛЯШЕВ. СӖ майбырӖй, челядьдырӖй!              |    |
| КазьтылӖмъяс .....                                  | 3  |
| Олег УЛЯШЕВ. А эг кӖ паныдасьӖй... Кывбуръяс .....  | 13 |
| Елена ВАГНЕР, Елена ВАЛУЖЕНЕ.                       |    |
| Олег УляшевӖлӖн «Пан туй» гижӖдын ритма проза ..... | 19 |

|                                                    |    |
|----------------------------------------------------|----|
| Юрий ВАСЮТОВ. Подув пуктысьяс.                     |    |
| ВӖвлӖмтор йылысь висът .....                       | 25 |
| Алена СТАРЦЕВА. СьӖлӖм тӖнӖ тӖдӖс. Кывбуръяс ..... | 54 |
| Аркадий МИШИН. Из выӖлӖ из. Роман .....            | 56 |

*ЫДЖЫД ПОВЕДАЛЫ — 74*

|                                                                               |    |
|-------------------------------------------------------------------------------|----|
| Никон ХАТАНЗЕЙСКИЙ. КыпӖдлӖс ротасӖ атакаӖ .....                              | 66 |
| Виталий ТРОШЕВ, Елена ЕРОФЕЕВА. Эз юӖртӖг вошны,<br>а усины война вылын ..... | 71 |

*ЗАРНИ КУДЙЫСЬ*

|               |    |
|---------------|----|
| Мойдъяс ..... | 73 |
|---------------|----|

Обложка вылын: Удора район, ПыисдӖн.  
Снимокыс **Юрий ЛисовскийӖлӖн.**

12+

© «Войвыв кодзув» («Северная звезда»), 2019 г.

**СЫКТЫВКАР**

# СЕВЕРНАЯ ЗВЕЗДА



**Ежемесячный  
литературно-художественный  
журнал**



**Учредители:**

**АДМИНИСТРАЦИЯ ГЛАВЫ РЕСПУБЛИКИ КОМИ**

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ  
ОТДЕЛЕНИЕ ОБЩЕРОССИЙСКОЙ ОБЩЕСТВЕННОЙ ОРГАНИЗАЦИИ  
«СОЮЗ ПИСАТЕЛЕЙ РОССИИ»**



**Издатель:**

**АУ РК «ИЗДАТЕЛЬСКИЙ ДОМ КОМИ»**

**ДИРЕКТОР ОРЁЛ И.Н.**



**РЕДАКЦИОННАЯ КОЛЛЕГИЯ:**

Главный редактор

ПОЛУТРУДОВ А.В.

Ответственный  
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.



## Сё майбырöй, челядьдырöй!

КАЗЫТЫЛÖМЪЯС

### Öтка югöрьяс

Психолог коддьöм войтырыс тшöкыда шулывлö, мый морт асьсö помнитö сöмын ар куимсянь. Сыöдз пö некутшöм казытывлöмъяс йылысь и сёрни оз вермы лоны. А мый мортыс висьталö аслас кагадырся олöм йылысь — сійö сöмын ай-мам да рöд-вуж висьталöмъяс подув вылын сöвмöм иллюзияяс. Комиён кө, вежөр ворсöм.

Гашкö. То тай, шуам, пöрысь морт здук сайын öчкисö пуктас пызан пельсö да вунöдчö, кытчö пö и пуктывліс, корсьысьö сэсся, броткö. А вот челядьдыр да томдыр йывсьыс дыр вермас висьтавлыны, быттьö книгаысь лыддьö. Дерт, эськö вермас лоны. Ворслывлö мортыдкöд паметыс. Коді кутшöм сюрöсөн олö, сійöс и казытывлö: няр морт став öбидасö, эмсö и абусö лэптас, збойджык кө, дерт, висьталас, мый томдырйиыс дзик нин юр вундысь вöлöма да багатырсьыс багатыр.

Овлö сэтшöмыс. А вот дзик нёньпом кага кадтö казытывлöмыд öдвакö нин вежөр ворсöм. Сійö казытывлöмъясыд тай векни тшелльöд шондi югөр усьлöм кодь. Сэн тэ абу коньөр, абу багатыр, ошйысьны нинöмөн и элясьны нинöм вылö. Прöстö серпастор, фотография кодь, либö кутшöмкö шыяс, малыштöм, тöдса көр. Сэтшöмтö думыштны он вермы ни ворсöдны он куж. Вöлі и вöлі. Югнитліс и вошис, вуджöртчис и сыліс. Но кönкö пыдын вужъясьöма. Оз вун. Оз-оз да и кыптывлас серпасыс.

Зэв югыд кольквиж кытш. Гөгöрыс ставыс съöd. Видзöда. Мам шуö, муртса на пö кад колис роддомысь вайöмсяньыс. Кагалөн сыылі öтарладорыс кызны кутіс, сваййөн мөдöдчис, тайкö вежынь юра лоас детинаным. Повзим. Фельдшер дорö нуим. Фельдшер том, но морттуя. Юалö, öтарö юрөн пö куйлö каганыд. Шуам: да. Нинöм югыдыс сыладорас абу? Зэв ыджыд кольквиж кытшъяса занавес öшалö. Водтöдлывлöй пö öтарö и





модарё юрөн. Сійё тiян югыд  
вылас бергөдө юрсө, сылань ви-  
дзөдө, сійён и отарладор сөныс  
сөвмөмаджык. А сідзсө багатыр.  
Кывзысьомаось, отарё-модарё юрөн  
водтөдлыны кутөмаось.

...Пөда. Ыж гөн пиысь петны  
ог вермы. Шыблася отарё-мө-  
дарё. Быдлаын мат. Весёпөри.

Арөн-джинйөна вөвсьома. На-  
таль ичиньясын төрөканъясысь  
кынтысьомаось. Дерт, веж мо-  
розъяса кадө. Луннас пачьястө  
ломтасны да, керкаыд онялө, а  
войнас и вель ыркыд. Пөрысьяс,  
дерт, паччөр-пөлатынөсь. Гы-  
рысьджык челядь-гавез — гөбөч  
вылынөсь. Места, майбыр, тыр-

мө, Карп Илля керкаын пачьясыс, енсыкөд, поводнойось, мукө-  
дыслөн и керкаыс сы ыждаыс абу. Кагаа бать-мамлы узылыны  
индөмаось югъялысь сяръяса крөвать. Мед улад эз көдзыд  
вөв, сетөмаось ыж ку эшкын. Эшкыныд коми мортлы — өнiя  
полярникъяслы лэбач гөна шоныд спальникысь бурджык да  
коланаджык. Да спальник кодь и эм, збылысьсө. Вөрө ветлігөн  
узылывлөмаось эшкын пиас төв шөр төлын ывлаын. Бура песөм  
некымын куысь вурөма гөннас пытшлань. Кок подлөсас — пи-  
дзөсысь ылөджык пуджөм ыджыд ноп кодь. Сідз и шусьö —  
«эшкын подлөс». Сійö подлөсад менам и веськавсьома войнад.  
Водтөдөмаось менө бать-мам кык костас, а менам пессьөм сорөн  
и лэдзчысьсөма эшкын подлөсад. Кыдз казялөмаось да перйөма-  
ось, ёнасö эз висьтавлыны, но синмө-пельö пырысь ыж вурунсö,  
дзурс пемыдсö да ассьым весьөпөрөмсö помнита.

...Эргö мыйкө, кыпөдчö енэжас. Пуксьö лөнъ. Веж видз.  
Гожъя лун. Катшасин. Менö босьтöны ки ылө. Батьлөн чужöмыс.  
Ыджыд мамлөн чужöмыс. Окалöны, тайкө оз пöдтыны.

Глотовоö менö нулөмаось стöч арөсөн. Аэропортыс ді вылын.  
Миянла ыджыд мамъяс волөмаось пыжөн.

Ылөдчöны психологъяс. Пуксьö и кага вежөрö мыйкө, ку-  
тшөмкө öтка югөръяс кольöны. Сэссия тайö öтка югөръяссьыс  
и морт вежöрыс пансьö, и морт олöмыслы подув пуксьö. Морт  
гөгөр югöрыс паськалө, паськалө и Енъягыдыс.

## Дадь

Дзөля дырйи менö тшөкыда шулывлісны «мам пиөн». Эз  
сы понда, мый мам бөждөрö кутчысьөмөн олi, а чужөм-рожаөн,  
тыдалө, мамланьджык мунсьывлөма. Нэм джын саястө олөм  
бöрын и туша-моданам, и чужөм-рожанам батыланьö жö кыс-  
кис. Тшөкыда весиг ачым казявла, мый и батылысь модаяссö

босьтчöма. Сы моз жö пырджык лабутнöя ола, но корсюрö овла и зэв горач, öзйывла, скөрмывла, и сы моз жö öдйö кусöда ачымöс. Гашкö, неуна батылөн йöз дорö вежа-видзöмыс озджык тырмы. Вöраснам быттö батылань жö муна. Абу дивö. Мам кийд эськö и небыд вöли, и ачыс мам миянöс видзис чардысь-гымысь, но морт-туйнымöс да уджалан сямнымöс миянлы, чой-вок чукөрлы, кызвын-нас сетіс батыö, Микита Вань. Гортын эз ёна чиршöдлывлы, мать кыв сысянь эг кывлöй, а удж вылад лют вöли: ачыс уджаліс вын-



эбöс жалиттöг, и миянлы, челядь-гавезлы, личöд эз сетлы. Дышысь да вильышысь сёки вермис сюрыштны: либö чер пунад мышкад зувкнитыштас, либö куран пунад юрад тотшкыштас. Оз чорыда, но сы бöрын сэсся и зільджыка уджавсьö. Меным тшöкыдджыка сюрліс чой-вок серти: ме медыджыд, мясянь вич-чысисны унджык, дай дзoляджыкъяс вылын дöзбöрыс ме вылын: найö мыйкö пакöститасны либö лыбзясны, мыжаыс сыысь медыджыд. Мыйла эг чиршöдышт, мыйла эг сувтöд, мыйла эг торйöд?

А мöдар боксянь кö, медводдза кагаыдлы и бурыс унджык вичмис. Уджаліс баты вель дыр сельсöвет предөн. Вöльдин сикт-сöвет улын сёки вöли кöкъямыс сикт да посёлок. Баты сизимдасöд воясас öтторъя ветліс командировкаясö: и ылыс сиктъясас, Югыдтыдорас-Діасёръяас-Пузлаö, и Кулöмдинö, и Сыктывкарö. Ветлігас кыськö и вайöма вöли меным кöрт дадь. Сэк челядьпиянлөн кызвын «транспортнас» вöліны баты-пöльясөн мастеритöм пелькиник пу дадьяс. Кöрт дадьясыд эськö код-сюрöлөн вöліны нин, но кодлөнкö люмень дадь, кодлөнкö вöсни кöртысь... А талөн дадь суюйыс кыз емдонысь. Да ещö и бокланьыс суюъясыс кör дадь моз паськалöны: майбыр, он пör, кöть кызд шыбитлас исласигад, кöть кутшöм джопканöд зöрк-нитöдлас. Став чой-воклы сэсся тырмис. А дадь вайöмсö помнитышта, ар куим-ö-нель нин сёки вöли.

Кöдзыд ывла ру пытшкын пырис баты. Дубъя пася, пеля шапкаа. Нюмъялö. Мыйкö шуалö. Кывъяссö ог помнит, но зэв кыпыда мекöд сёрнитö. Зумкнитіс мыйöнкö, а сэсся джодж шöрö сувтöдіс шемöс. Гөрда-вижа-лöзөн пöртмасьысь вит пуклöс рейка, лöзөн мавтöм дадь суюъяс, гöгрöстыштöм ыргөн мыш! Дай бöрсяньыс калича на öд мышкыс! Шемöс! Меным?!



Помнита муртса, мый ме пукала барин моз мыш вылас нёровт-чёмён да кора ислөдлыштны мича сера джодждёраяс вывтї. Меным мыйкө висьталёны, өлөдөны, а мый шуалісны, кутшөм кывъясөн ылөдлісны, ог помнит. Дерт, көнкө, көсйысисны асыв-нас ывлаын гурийөдлыны, а ме водны эг көсйы. Кадысь кадө этш-характерөс петкөдлыссьывлөма жө. Шуи кө, зорйөн он бертовт.

Серпасыс колис. Виль краска дуксө помнита.

Сійө дадьнас сёрөнджык мянөс Игорьь воккөд кыскалісны садьö. Бариналіс дзоля вок нин, а ме сылы воча нырладорас пукалі да кутышталі вокөс усьөмысь. Бөрас и ачым Игоря-Васяөс сідз садьö нулывлі. Кадысь кадө доддявлі Казак понйөс: көртасьлі кузьджык гезъясөн голя көлысас да öрыштлі. Коркө вель ылөдз нуліс, а коркө и ыръянитліс. Мукөддырйиыс став-нас чужөм-рожаөс вөлі нюлас, пуксяс орччөн да нинөмысь оз котөрт: ме пө талун абу дадюв пон, а дадьдор пон, дадь видзысь. Коркө и Игорьь вокөс пуксьөдлывлі даддяс да Казакөс чукөстлі. Ме водзвылас котөрта, а сійө — бөрсянь вокөс кыскө-шаркөдө. Вок шашаритчөма дорас, чилөстлывлө. Ог төд полөмысла али нимкодысла. Коркө и менө ёртъяс сідз понъя дадьнад гурийөд-лісны, но Казак ёртъяслысь эзджык кывзысь. Менам өд вөлі понйыс, мекөд öти वोся.

Сёрөнджык дадь вылас бать вөчліс челядьөс новлөдлыны сиптыса көрөб. Сійөн нин Гриша вокөс да Женя чойөс бөрся-ньыс йөткалөмөн ислөдлім. Көрөбсө сьөкыд вөлі быд пөрийө разявнысө да, интерес эзджык ло. Дзик нин кага коляскаө пө-рис менам транспортöй да спортивнөй кипельöй. Чиныс чиніс. Ог төд, кымын кагаөс сэсся кыскавліс менам даддьöй. Дзоля чой-вок кындзи и дядьөн шуысьяс на сы вылын быдмисны.

Син улө усьліс коркө даддьöй: эз нин став пуклөс рейкаыс вөв, эз вөв и зарниалысь ыргөн мышкыс, дай дадь сюв вывсьыс лөз краскаыс вушйөма. Но зумыда сулалысь на вөлі. Сімөн вөрзьөдлытөм. Ни сыөдз, ни бөрас сэтшөм дадьсө некытысь эг аддзывлы. Бать тай кытыськө корсьлөма.

## Казак

Казак чужöма октябр тöлысын, меысь вит тöлысьöн сёрöнджык. Педьö Вась керкаын на миян сэки овсьöма. Пöль ньöблöма крестьянскöй керкасö война бöрас кык куль-мешöк сёлaысь. Вöлöма на тай пöткаыс! Педьö Вась карта вылас и вайöма Дамка пон зарни кычиöс. Дерт, вайис, кöнкö, унджык, но бур лайка вылö «тестьяссö» вуджны вермöма сöмын зарни кычиыс. Кодöскö сэсся бокö сетöмаöсь, кодöскö лясйöдлiсны, кöнкö. Омöлик понйыдкöд сёрни дженъид. Вöралысьыд тай абу болонка видзысь, сылы уджалысь пон колö. Вöрын отсасьысь да ёрт мед вöлi. Кычи чукöртö тэчöмаöсь мыштöм улöс вылö. Зарни кычи бергалöма-бергалöма да кыссьöма улöс шöрланъид. Сэсся и ан серъяссö видзöдалöмаöсь. Уна серыс, дай оръясьöны, сiдзкö, ныриса лоас, быдсямасö увтны кутас. Эм ли, абу ли морсьяс пев пом кодь гөн ёкмыльясыдлөн, а мурталöмабсь и морöс пасьтасö. Шогмöма. Бать шуöма: Олег чужан воö пö чужис да, сылы тöварыш да отсасьысь лоас, Казакөн нимтам дай.

Лоис меным ёрт. Быдмис да верстяммис, дерт, кычиыд меысь öдйöджык. Ар куим-нёлён кукань ыджда пон нин вöлi, а ме сылымыш вылас öдва кавшасьны на верми. Верзьöмөн ветлi, кытчöдз бать эз стрöжит: понъясыдлөн пö коскыс рыж, эн сэсся тадзсö вöч, чеган Казакидысь коссö. Син водзын пырысь-пыр чегöм коска пон серпасыд быттö явö сувтiс. Мыйлакö рушкусъыс весиг быттö чегöм сартасысь желъяс кодь чурвидзöны. Повзи. Сэсся эг нин вылас пуксьывлы. Сёрöнджык тай доддявлывлi-а. Дадь кыскöмсьыд коскыд оз чег. То тай, думайта, войвылын ставыс пон даддьöн ветлöны да, миян мыйöн лөкджык. Коркö весиг ваннаö доддявлiм, куим «каюрöс» кыскис, миянöс Игорькöд да троюрöднöй Мишö вокöс.

Казак, эз кö батьö бöрся удж вылö ли, вөрö ли вöтчывлы, мекöд эз торйöдчывлы. Гожöмъяснас чеп йылын пукалiс, а арсянь тулыс помöдз, ыжъясöс лэдзавтöдз, век ме гөгөр гарт-



ласьö. Корсюрö, ворсiгъясöн, и пон чомсö шöри юклiм. Вольöссö вежа, выль турун шыбита да пон чомсянь кыйöдча: кодi кытчö мунö, кодi мый вöчö. Кыр йылын кодь пон чомйыс да, ставыс тыдалö. Зэв бур кыйöдчанiн понъя пограничникыдлы. Коркö и челядь чукöр дзебсясьöмысь ворсiм миян керка гөгöр. Дзебси пон чомъяд. Ывлаыс гожъя. Лöнь. Гут-гаг дзизакылышталö. Шондi пöжö. Менам и ланътсьöма чомъяд. Садьми рытгорув нин. Казак чом водзас пукалö, менсьым унмöс видзö. Ёртъяс некöн оз тыдавын. Корсьнытö дышöдöма, абу аддзöмаöсь дай разöд-чöмаöсь: тайö пö, кöнкö, важöн нин пышйис кытчöкö, а ми, йöйяс, кыв нюжöдöмöн корсям.

Ар көкъямыс-өкмыс меным вöли, тола бердö кежавлöмöн топöдöма вöли менсьым зарни понйöс öти шопер. Мый сылы понйыс сэтшöмсö вöчис, öнöдз ог тöд. Эз жö öд автобус öдзöс пырыс мунiгкостыс коксö вазнит. Морт вылö некор эз эрыштлы весиг, непöштö ырыштчывылыны. Казаклөн бöръя кокъясыс öткажитисны. Сэки вöлисти и тöд вылö уси дзик дзолядырся серпасыс, чегöм коска понйöй. Некумын лун куйлис Казак гожся кухня туйö вöчлöм лэбулын. Сёян-юан дорö ёнасö вытыс эз вöv. Синваыс сöмын дзознитышталас. Сэсся öти асылö петi, а сэн жö лэбулас и эштöма. Бать пö отсыштöма муннысö. Дыр сэки бать вылö скöралi, кöть и видлисны меным висътавын, мый татшöма чегъясьöм каджъяснад понйыс и ачыс нин олöмыслы вöли не рад.

Дерт, öнiя кадö да карын кө, ветврачъяс дорö нулисны и мыйкö вöчисны, мед керка бердын кöть нин пенсионер-ветеранөн олiс важ выслугаяссьыс. Но öд сиктса олысьлөн да вöралысьлөн неуна мöдджык видзöдласыс. Да и танi, челядьлысь вежöрсö да ловсö бать местаын кө колö вöли видзыштны.

Батьлөн сэсся во дас некутшöм пон эз öшйывлы. Öти во-мöд олiс, уджалан арлыдöдзыс воис да, трактор улö веськалис, мöдöс вилаөн зурйöдлисны, коймöд вошис... Абу тай весьшöрö важ йöзыд шулöмаöсь, мый ас понтö виысьылөн понйыд оз ов сэсся.

А ме сэки шуи аслым, мый некор некутшöм ловъя лолöс ог лöсьöд, мед бöрас не воштыны. Эг и лöсьöдлы: кытчöдз ныв эз быдмы да каньöс аслыс эз босьт, керка помын пемöс эз вöv.

## «Бурлак»

Школаö пыри ас нажöвитöм костюмөн. Гожöмнас видз вылын нажöвитi. Öнöдз помнита, мый ной костюмыс сулалiс кызь нель шайт да нелямын ур. Дерт, унджык сэки нажöвитi. Бать дорын уджалi зорöд талялысьöн, а уджад сийö и ачыс лют вöли, и миянлы лич эз сетлы, эз видзöдлы арлыдъяс вылад. Гортын вöли зэв бур батьөн, а удж вылын Карп пöрысь ыджыд батыслөн да Илля ыджыд батыслөн вирныс, тыдалö, босьтлöма.

Найö, старöверъясыд да, ёна удж вылад челядьсö нартитлöмаöсь. Сийөн и зумыда овлöмаöсь. Революция бöрад тай Карп Илляыслыс дас кыкнан челядьыслы ас кошт выланыс петiг-



кежлө лөсьөдлөм морт өти вөлөс да ялавич-мөскөс пет-көдлөмаось-а. Сюрлөма экспроприация улад гөрыд и агасыд, көсилкаыд и жнейкаыд, самөварыд и швейкаыд, дубъя пасьыд и кузьчышъяныд, японка-ковтаыд и мича сарапаныд, кысыд и паркаыд.

Крапкөмөн пуктывлөмаось экспроприаторъясыд пызан шө-раныс сөмын сөй гырнич. Тырмас пө и тайө кулак чукөрлы. Карп Илля нывъясыс унаыс казътывлісны сөй гырничтө, но медъёна бөрдөдісны бать-мамыслыс көрт крөватсьө. Мышъясас пө нель зэв ыджыд югъялыс шар. Ачыс вын паськыд. Вольөс улас пө абу бара желльөсь плакаясыд, дорөм көрт асыкъяс крестөн вольсалөма. Но сійө важся олөмыс нин да, не меным кодравны-оллявны. Крестьянскөй кооперация кильчө улас важөн нин сімлөма-сісьмывлөма «кулак эмбурыд». Юкнысө, тыдалө, ас костаныс абу вермөмаось, ставыс өд өтувъя.

Вот костюм ме серти эз сюр, да дөсаднө лоліс. Дерт, сы понда бөрдны эг кут, абу на сійө югъялыс шмакъяса крөвать воштөм. Сэсся мам такөдіс: во помөдзыс пө костюмтө суан на. Дзескыдтө, дерт, он босьт, кызкө өд легөдчыны колө. Кокъясыс кузъджыкось, дай пинжакыс ыджыдджык. Ковмас, тыдалө, во помөдзыс костюм суөдны.

Зато справнөй бурлак лои. А справнөй бурлаклы мый колө? Таллянка да каллянка. Гудөкасны велөдчыны дыр, дай тал-лянка вылад нажөвитны на колө. Чигаркаыд кокниджыка ше-дө. Слабог, батьяс-пөльяс-дядьяс ставныс шпуткөны. Эз на өд өнія законъяс лөдысь-тэчысьясыд вөвны.

Школакөд орчөн миян ворсанінъяс — совхоз сушилка лөс да овощехранилище лөс. Ёртъяскөд пырим сушилка лөскө, куим вылө быдса «Беломор» пачка шпутким. Ог на төдөй, мый пыдө кыскыштны колө да, өти куритчаныс тырмө. Но мый, өти удж вөчөма, колө мөдөс корсьны. Төлөдчанінкөд орчөн —

сёй гора. Сэтысь став сиктыс пачьяс вылө сёй перйö. Вель джуджыд гуяс нин лоöмaöсь, шогмана окопьяс. Но ми сэн и, лыбзим да, лымйысь моз улыджык сёйсьыд шольяс кутім тап-йöдлыны, öта-мöдöс шурйöдлыны. Гажа эськö да, гортö колö мунны, пемдыны кутіс.

Арся рöмыднад гортö мунігад эг убöлит видзöдлыны паськöм вылад, гортö пыри зэв на и гажа. Мам синъяс серти сöмын гөгөрвои, мый паськöмöй неладнö. Вöлисти видзöдлі ас вылө. Руд костюмыд пыдди менам гачöй дзик гөрд лоöма, а пинжакöй вель ыджыд сёй сера (кытчö ёртъяс веськавлöмaöсь).

Пинжакнам да гачнам гоз-мöдысь швачкöм бöрын да некымын мисьтöм кыв казтыштöм бöрын, мам шыбитіс кок улам костюмöс: «Ачылд пeслалан!» Ковмис пeсласьны велöдчыны. Тазйын вель дыр сузлялі, некымынысь весиг васö мам тшöктіс вежлыны. Дерт, сэсся ачыс пeслаліс, но велöдöмыс мöрччис. Сы бöрти мый менам, мый дзoляджык чой-воклөн мода эз вöв школаö ветлан паськöмөн ворсны. Сöмын гортö волан да, вежсян омöльджык кöлуйö да, вöлисти петан ывлаö.

Но öти буртор сэки ещö на вöлі. Мам скöрмöм йывсьыд эз кыв табак дуктö.

## Пугач

Медводдза велöдчан во кутіс помасьны. Май.

А зонуловлөн сэк быд кадö аслас гаж вöлі. Тöвнас ставныс вöчавлісны люмень проволокаысь кытшөн гартыштöм рогаткаяс. Лыйсисны кусыньтöм проволока торъясөн жö. Веськалас кö, лöсьыда чöсковтö. Весиг форменнöй пинжак-гачьяс пырыд. Восьсаинö кö сюрас, гырöдз дай. Дерт, школьникъяслысь учителяс мырддявлісны кипельтö, но дыр-ö выльтö вöчны? Сэк проволокаыд эз на дефицит вöв.

Переменяяс дырйи гырысьджыкъяс юксьывлісны кык команда вылө, разöдчывлісны коридор öтар-мöдар помас да панлісны ыджыд тыш. А колö шуны, мый мöд во кeжлö сэки ёна колявлісны да, кодсюрöс сизимöд-көкъямысöд классъясысь босьтлісны армияö нин. Гөра мужикъяс. Дай велöдчысьыс уна вöлі. Ягкөдж-Пузласаясöс эськö вуджöдісны нин Ягкөдж школаö, но Вöльдінын велöдчисны на бадьельйивсаяс. Лыйсясны гырысьяс пуля бырмöныс, сэсся миянöс, посниясöс ыстöны коридорысь пуля чукöртны. Ми гаврошалам, а гырысьяс саймовтчöмaöсь да горзöны: «Дзoляджыкъяссö. Дзoляджыкъяссö чукöрт! Гырысьыс ньöжйö лэбö».

Тулысланыс люмень рогаткаяс вунлісны. Школаын да школа гөгöрын шпaтькыны босьтчывлісны пугачьяс. Пугачьяссö вöчлісны ыргөн трубкаясысь. Öтар помсö клeпaйтлісны да кусыньтлісны, пытшкас топыда тувъявлісны тшай пачкаясысь югыд бумагаяс, фольга, либö дрöб тусьяс, мöдар помсяныс сүйлісны кусыньтöм кöрт тув да помъяссö йитлісны резинаөн. Вот и став кипельыс. Пытшкас куим-ö-нель спички тувйысь чирслісны серасö, кыскыштлісны неуна кöрт тувсö да пезыгöдлісны резинанас. Век нин кодöскö повзöдны позьö. Дай ош-

йысянтор вöлi: быдöн öд ас ногыс вöчлiс, кодлöнкö мича, кодлöнкö гора...

Первой классыд помлань мунны кутiс да, думайта: кад и меным пугач вöчны. Ёртъяскöд куимöн мöдöдчим совхоз гараж дорö трубкаяс корсьны. Дерт, сэн мянлы вылö трубка абу лöдöма, перйыны колö кутшöмкö важ тракторысь. Сулалöны эськö шыбитöм тракторъяс, но ставсö нин перъялöмаöсь, кольöмаöсь сöмын кызджык трубкаяс. Найö, дерт, шогмöны самопалъяс вылö, но самопаласьны мянлы водзджык на. Абу на чин сerti.

Видзöдам да, неуна бокынджык сулалö разьöм ДТ. Сэтысь и пилитiм ыргөн трубкаестö съöрысь вайöм напильникъясөн. Лун джын ноксим: чинталiм, доръяссö шыльöдiм, көрт тувъяс куснялiм, картеч тусьяс пытшкас клепайтiм. Батълөн запасьяс ыджыдöсь вöлисны. Пугачьяс артмисны мичаöсь. Шогмö и видзöдлыны. Сэсся сёр рытöдз шпатьяким школа дорын да, клуб сайын да. Видлiм и вит тувйöн, и квайт тувйöн. Квайтнас кы-ын эг жö лысьтöй лыйлынысö да стенö шыбитöмөн ковмис салютавны. Лунтыр шудаöсь вöлiм.

Рытнас гортö пыри шуда на, но бать джöмдöдiс: «Ноко, пиö, зепъястö гугöдлы». Менам зепъясысь унатор сюрис. Кык «Слива» карамель (мед куритчан дук эз кыв), нямрасьöм зырым чышкан рузум, напильник, перочиннöй пурт (кыздз сытöгыс мужик мортлы), изйöн лыйсян гожа рогатка вылö вöчлöм вожка, ыргөн да люмень сутуга кытшъяс, трусик резина тупыль, дуригөн ородлöм пинжак кизь, свинеч карандаш, газетö тубыртöм выя-песока нянь шöрöм (эг тшыгйöдчывлöй ворсiгъясад), клеткаа тетрадь джынйысь вöчöм блокнот (помавтöм «морскöй бойöн»), кызь вит ур кымын деньгатор да медбöрын — ыргөн трубканас дзирдалысь шнич выль пугач...

Бать шылльö-мылльö вылад эз видзöдлы. Босьтiс пугачöс да пуктiс пызан пельöсö. «Ачыл вöчин?» «Ачым». «Збыль ачыл?» «Збыль». «Татшöм мастер вöлöмыд». Гөрдöдыштi батълөн ехиднöй сёрнисыс. «Ноко, мастер, висьтав меным, верман он зырымбедь ёртъясыдлысь бөр босьтны да йитны тайö трубкаяссö?» «Кыздз йитан, вундалiм нин да?» «Кужин вундавны, куж и йитны. Оз кö артмы, ковмас выль трактор вылö нажö-витчыны. Самöй пенсияöдзыд тырмас совхозыслы вештысьнытö». Тöда, мый абу прав, но тшенкйыся: «Мыйла выль? Важ разялöм тракторысь перйим да». «Чайтан, разявлöны куш пракмунöм тракторъяссö? А кыздз нö разявтöгыс тракторсö дзоньталан? Зосим Венялысь уджалан тракторсö пылльöмныд! Муртса пö разявны удитi, гөрны петтöдз мед ставсö видзöдлыны да лöсьöдны. Пажнайтiгкостi пö став трубкасö (дерт, пугач вылö) вундалöмаöсь. А бергалöмаöсь пö куимöн, Микита Ванълөн, шуисны, детинаыс тшöтш вöлöма. А меным, пиö, тайöс кывзынысö?! Кык юр кö вöлi, öтикыс дзик нин усис яндзимысла. Мун, мöмöт, Веня дорас, висьтась да изьвинитчы». «Ог». «Кыздз он? Мунан да изьвинитчан». «Пельöс някралас». «Куш кö пель някралöмөн мынан, бур на да...», — кужис и ловтö мен сетны бур батьöй.

Ковмис ветлыны да висьтасьны. Ладнö, небыд мортыс вöлi, Зосим Веня, весиг пельöс эз някрав, сiдз, бур кывйöн велöдiс.

---

Видзёдлан кольём олём вылас да, быттё и шогмана ставыс вёлёма. А челядьдырыд и дзик нин зарни нэмён петкөдчө. Паметыд, буракө, сөмын бурсө сэтысь кольё. Көть миян шпана оласногнад и сюрлывліс корсюрө бать-мамсянь и мукөд гырысьсянь, ёна, тыдалө, абу жө дзерөдлөмаось. Кадысь кадө и шулан сэсся: «Сё майбырөй дай челядьдырөй! Кытчө бара кольёмыд дай кытчө мунёмыд?»

**Снимокъяс вылын:**

1. Шуда челядьдыр.
2. Батьлөн ки вылын.
3. Мамкөд.
4. Куим вок. Шуйгавывсянь: Олег, Василий да Игорь Уляшевъяс.
5. Воча чойяс-вокъяс. Водзас Игорь Уляшев, сійөс кутө троюрөднөй вок Миша. Олег сулалө потшөс бердын веськыдладорас.
6. Первой классын. Олег Уляшев коймөдыс шуйгаладорсяньыс.
7. Онёя кад.

Снимокъясыс О.И.Уляшевлөн гортса архивысь.



Чолөмалам Олег Ивановичөс гөгрөс арлыдөн! Сиам крепыд дзоньвидзалун, творчествоын виль вермөмъяс да водзө ёртасыны журналкөд! Кузь нэм да бур шуд!



## А эг кө паныдасьой...

КЫВБУРЪЯС

\* \* \*

Шонді гожся моз нин пөжө.  
Тадз жө пөжис кольом войн.  
Сөмын ме сэк муслун чөжи,  
Таво тай вот пикө вои.

Ыркыд руыс пытшсянь петө.  
Көдзыд. Көдзыд пытшкөс йирмөг.  
Ветла таті, ветла сәті.  
Яй и лолөй, ставыс сырмө.

Коркө татшөм гожъя луннас  
Мунім тайө кыз пу дорті.  
Нәм нин колис. Ставыс вуніс.  
Ставыс вөлі важөн коркө.

Гашкө, нинөм збыльыс абу?  
Гашкө, усьлін сөмын вөтөн?  
Ловнам мыйкө вывті лябми.  
Бур кыв пыдди сөтка сөтөн.

Шонді-Зарань юрөс пөжө.  
Мый и пөжө? Сідз нин пуө.  
Сөтсө коя. Муслун чөжа,  
Тэча вежа сөстөм дзуө.

## Муспозлы

Изми-чорзи,  
Войбыд горзі  
Шуштөм вөтысь.  
Шушкыль ропө  
Вөтын ропкис,  
Ёрис, көтіс:

«Эн пө вөрөд  
тайө нывсө,  
Нимсө вунөд!  
Гөрддзав гөрөд.  
Воштан кыстө,  
Пыран сюнйө!»

Көдзыд төвсьыс  
Садьми пөсьын.  
Шоныд кийд  
Ньылөм чышкис,  
Пөльтіс вөтсө.  
Ина, инө.

Вөрөдла на  
Сідзкө быд ног:  
Вунлас нимным,  
Но оз нюмыд,  
Ни оз юмыд.  
Нэмас инмам.

### Зарни черианöйлы

Тыв сюрөс помтөм. Гыдйөдз ылын.  
Дай эм-ө тайö тывъяс гыдйыс?  
Но зэвтча-кыска, пота вирөн:  
«Шед, зарни чери, муса, гырысь!»

Öд көнкө матын, медся мича,  
Лун сьөмөс шонділаньыс качлысь...  
Ог сюрөссө ме некор личөд,  
Тэ менам медбөръя нин лача.

А кадыс нюжалöма нэмөдз,  
Дзонь во кузя нин кыссьö здукыс.  
Ак, Енмөй, көнкө эм-ө, эм-ө?  
А гашкө, тывйөс чирпөг дзугис,

Да öнi көнкө ылын-ылын  
Ме ылын гигзьö зарни кыйдөс?  
А гартчөм-тубрасалөм тывйöй  
Лөп-өгсö чукөртөмөн кыскö?

Но оз! Со дзирдалö нин сьөмнас  
Да ачыс мелань гыбзьö-лэбö...  
И нөйтчö муснас ойдөм сьөлөм.  
Оз вөлөм ков ни таб, ни кебөд.

### Вөсьöйлы

Арся луныс сэтшөм вöлі лөсьыд:  
Гожся кодъ, но муртса аръев рöча.  
Зарни шонді койис гожся дзирдъяс  
Вөр-ва вылас. Пожөмвывса сырыс

Рөмпöштанөн синъяснымөс ёрис.  
Тувсовъя моз кыз пу муслун корис.  
Муслунлы кө сетчис весиг эжөр,  
Чукөстчисны вир-яй, лов и вежөр.

Кыз нө татшөм руыслы он сетчы?  
Со и шедім зарни арлөн лэчкө.  
Быдсөн öзийс зарнийөн да вöсьөн  
Тэнад кымöс вылын бисер-пöсьыд.

Сылыс сьölөм, сыліс-вошис ставыс.  
Сорласисны вöт и вемöс явö.  
Зарни арöй, мый тэ микöд вöчин?  
Арыд сöмын нерсис шондi кöчөн.

## Куим во

Мый сійö нэмъяс серти куим воыд?  
Сідз, синтö куньлөм, биысь качысь кинь.  
Быд куим воы помыс коркö волö,  
Дзик нинөм сыысь олөмад оз чин.

А мый нö здукид серти куим воыд?  
Зэв ыджыд кад да помтөм-помтөм нэм.  
И век жö нэмлы помыс коркö волö,  
И куим воы помыс сідзкö эм.

Тэ век на важкодъ, но и быттö тöдтөм.  
Ми выльысь тöдмасям да корсям тöдсатор.  
Да, луныс-часыс колис лыдтөм-тшöттөм,  
И век жö орччөн бара муса морт.

Зэв муса, ас да кызкö бурлань выльмөм:  
И муслун выль, и ловру кылö выль.  
Став куим вося виччысьöмным збыльмис.  
Тэ менам ки вылын. И сöмын тайö збыль.

## Янсöдчөм

Ми сöмын паныдасим, сöмын лоим воча,  
И сöмын небыд вом доръясөн йитчим.  
Но мыйлакö тай кадыс бöра-водза:  
И со нин бара торйöдчы да виччысь.

И гырдөн чуктö сьölөм бердысь сьölөм,  
И вирөн орö ловъя яйысь яйыд.  
Зэв асныра жö олөм-вылөм вölөм,  
Оз виччысяна козин быд лун вай öд.

Но мускыд выльмö, мода сълөн сэтшөм.  
И муслун быдмö, муссянь босьтö вынсö,  
А мортыдлы, кöть нэмыс быдтор этша,  
Но ыджыд муслун, эм кө, дерт, оз чинссы.

\* \* \*

Лунъяс мунöны, кывтö кадыс,  
А ме вунöдөм вöвлөм матыс.

Татшөм, тыдалө, овлө адыс,  
Кор оз юсьывлы пөтмөн ядыс.

Мый и жуглясян, мый и шогсян?  
Бытьё чуксалан содтөд лёксө.  
Сідз нин олөмыс разі-пельё,  
Сідз нин Омөльыс тойлө рельё.

Дугды вежөгтны, лөньөд сьөлөм.  
Төдан, олөмыс татшөм вөлөм.  
Регыд аддзысям: коляс кадыс.  
Регыд помасяс тайё адыс.

\* \* \*

Быд кусынь тэнсьыд төда.  
Быд лов шы тэнсьыд кыла,  
Көть кажитчывлан, нылө,  
Быд паныдасьліг мөдөн.

Быд вочаасиг выльөн  
Ме тэнө, муса, аддза.  
Да, чайта, нэмъяс тадзи  
Ме тэкөд лоа. Кылан?

## Гажтөмтчи

Ок, луныс дженъыд, дженъыд вөлөм.  
Дзик здукөн лэбис биа вөлөн.  
А войыс кузь, көть морөс вылам  
Ме пыр на тэнсьыд лов шы кыла.

\* \* \*

Гөгрөс чукторъяс вылад  
Чим гөрд, кисьмөм кык оз.  
Сьөлөм озйыс моз сылө.  
Киын гөрд пелысь роз:

Пужйөн кынтывлөм, юмов,  
Кузь ар помланъыд сыв.  
Сыысь некор ог умлы,  
Ог нин личөдлы сыв.

Мед и аддзысьлөм дженъыд,  
Мед и янсавлөм кузь,  
Помтөм муслунлөн нэмыс,  
Оз ну лунвылө юсь

Гожся шондіа лунъяс,  
Тувсов төлыся вой.  
Сөмын вошлывлө унмөй,  
Ог кө вомтырнам сөй

Сылөм өмидза вом дор,  
Җисьмөм чукйывса оз.  
Җиын пелысь роз шонта,  
Бөр мед төлыс оз кос.

\* \* \*

Но, сё мокасьтө! Кутшөм лымйыс югыд!  
Дзик бытьтө Муыс пасьтасьёма гугөн.

Эг кө паныдасьлөй...

А збыль кө эськө падвеж лоим?  
Да өдвакө сэк воча воим  
И весьшөрө руд няйтсө лойим  
Ми олөм туйыс бокша пөлөн.

Но паныдасим дзик туйвежын  
Да өти туй вылө нин кежим.  
Ми костын йөзыс кө эз гежмав,  
Дерт, эськө ки на ки нин вөлім.

А йөзыс жуө мир туй пасьта,  
Көть сәсся шөрас воштан асьтө.  
Юр весьтьяс өта-мөдөс аддзам,  
Но мунам өтар-мөдар пөлөн.

А мунны эськө өти вөлөн...

\* \* \*

Сёр арыс тувсовъя моз зэрө.  
Дерт, эськө лым нин корө муыс,  
Дай вөр-пу тувсов ног оз серав,  
И гожйысь лэбач лунвыв муніс.

А менам — тулыс.

Дзик морөс куд тыр тувсов енэж,  
И лолөй ытва пасьта ойдө.  
Мед бөрсянь кодкө вөйпө менө  
Да думсьыс мисьтөм кывйөн дойдө,

А менам — тулыс.

Ме талун вылын, Енэж лөзын.  
Ме талун вына тулыс бордъя.  
Став ёрччысь улын. Меным лөсьыд.  
Ме ёрсысьяссө борднам бордъя.

Өд менам — тулыс.

---

\* \* \*

Мыйкө Енмыс кымөртчөма. Зумыш  
Сылөн чужөмбаныс. Оз тай нюмйышт

Шонді нюмнас. Войтырөс оз гажөд.  
Югьд бансө эг нин аддзыв важөн.

Өтитор куш сьөлөм вужйөс шонтө:  
Мекөд орччөн путкылясьысь шонді.

Ракпань костас гөрддзасьөма вөсьыс.  
Менам поськөд сөльнитчөма пөсьыс.

Оз кө Енмыс асьыс югьд вичмөд,  
Олам гортса шондіторкөд сідзкө.

\* \* \*

Дзик нэм чөж тэнө  
Сьөлөм корсис-сырмис.  
Но луныс дженьыд,  
Миянлы оз тырмы:

Пыр көч бөж кузя,  
Төв көть гожөм шөрнас.  
Тадз вир-яй шузьө.  
Мый на лоас бөрас?

А вой и лун кө  
Орччөн тэкөд вөлім,  
Сэк мөд ног мургис,  
Сьыліс эськө сьөлөм.

❖ ❖ ❖

Елена ВАГНЕР,  
Елена ВАЛУЖЕНЕ

## Олег Уляшевлөн «Пан туй» гижёдын ритма проза

*«Ритмыд — быдлаын. Быд здук ми олам  
кутшюмкё ритмын — лов шы, сёлём тп-  
кём ритмын, лун-вой ритмын, чужом-ку-  
лём ритмын; олёмас ставыс — ритм».*

Ингмар Бергман.

Олег Уляшевлөн «Излань зыран, зарни зыран» триптих пегіс 2014 воын, куимнан юкёныс, на лыдын и «Пан туй», дзонь-нас гижёма ритма прозаён. Кёть коми литератураын ритма прозаыс вёлі нин, век жё тайё выль, вёвлытём на кыв. Гижыс ловзёдö кывсö, ворсö сыён, разьö да бөр чукөртö, тöдтём выль — вунөдём важ вежөртассö корсьö. О.Уляшев выль пөв дорö коми кывсö и поэзияын, и прозаын, ХХІ нэм заводитчигөн автор коми литературалы писькөдö выль туй. Тайё гижөдсö кутшöмакö вёлі видлалöма Е.Вагнерлөн «Язык произведения О.Уляшева «Пан туй» магистерскöй уджын. Кывйыслыс аслыспөлöслунсö видлалан подулөн сэн лои В.А.Ефремовлөн ритма лирической прозалы лөсьөдём классификацияс. Мыйсюрö сійö магистерскöй уджсьыс пырис и тайё статьяö.

О.Уляшев гижөдъясыс кывсö оз позь видлавны сöмын лингвистика, сöмын литература, сöмын фольклор боксянь. Колö куимнанладорсяныс öтүв сибөдчыны, öд гижөдас кыв, литература, история, фольклор, ритуал да эскөм öтүвтчöны. «Пан туйын» тайö йитыс ырвизьнас лоö ритм.

Ритм — гижөдыслөн лолыс, сылөн сюрсаыс и эжыс: кутö да йитö торъя юкөнъяссö, тэчö ортсы серпассö. Ритмыс О.Уляшев прозаын йиджтысьöма гижөдлөн быд тшупөдö: шыас, морфемаас, кывъяс, кывтэчасас, сёрникузяс, синтаксисас, сюжетас, композицияс, жанрас, серпасас. Видлалам, кутшöм приёмъяс отсөгөн тані юралö ритмыс.

### Шыяслөн ритм

«Пан туй» гижөдын ритмсö артмөдö гласнöй да согласнöй шыяс мөдпöвсталöм.

Тайö аллитерацияс:

Ш-г/ш-д — «Шегъясьöны енъяс, шегъясьöны йöз. Коми войтыр шегнас шогсö шудкөд йитö. Шогыс личкö-кусынтьö, Шудыс веськөдö-кыпөдö»;

Ч-к/т+р — «Чуксав, кор. Чукөрт, корсь», «Коми кывйысь эн лэччысьой. Гөптö эн уськөдчöй. Вывлань кыпöдчöй. Чукөр-тöй. Лоас чук. Чук йылас лоö чут. Чут йылысь аддзас Чур. Сі-йö быд чут аддзö»;

З-в — «Мича Зэвыс вöлі, зэв ён Зэвыс вöлі, зэв зумыд сійö вöлі».

Тайö ассонансьяс:

О — «Окмыс төлысь чөж окмис, пемöсысь вемöсö пöртсис Панпи».

«Пан пöрт» юкöнын паныдалам ассонанса-аллитерацияа сёрникузяс: «Ойзöм-овзöмön овöстіс вöйзöдіс вöзъясьысь Войпель. Чискöмön чискыштіс чусъялысь-чушъялысь Чишкан. Люньяліс-лювъяліс улиса улльöлön Лунпель». Тані быд сёрникузяын эм аслас шыяса лейтмотив: Ойз-овз-ов-вö-вö-во. Чис-чис-чус-чуш-чиш. Лю-лю-уль-уль-лу.

Аллитерация-ассонанса мöдпöвсталöмыс гартö, бергöдлö лыд-дысьысьлысь вежöрсö, уна пöв лыддигön мантра моз вежö вежөр тшупöдсö.

## Кыв артмöдöмын ритм

«Пан туйлы» лöсялö öткодъ кыввужъя кывъяс сёрсьöн-бöрсöн йитöм, öти кыввуж уна пöв шуöм чужтö гижöдыслысь ритм, а нöшта индö кывъясылöн вунöдöм нин пытшкөсса йи-тöд вылö.

«Быдласянь **чур**видзöны, **Чур** видзöны»; «Шнич вын **чöж**ысь-чукöртысь **чöж** веськавлö кias»;

«**Вежай** **веж**öртіс томуловöс писькöс **веж**öрнас. **Вежай** **веж**öдіс ыргысь муслунсö ыджыд **веж**авидзöмнас. **Вежай** мöдöдчис **веж**апиыскöд сылы гоз корсьны».

## Морфологияын ритм

Тшөкыдакодъ «Пан туйын» орччөн сулалöны öткодъ тэчöм сёрникузяс. Тайö матыстö гижöдсö эпослань, мойдлань, ньöж-мöдö ритмсö: «Би ыргис сувтса. Тшын качис сувтса»; «Вöтын олан, вöт бöрся вöтчан — вемöсысь пышъян. Вемöсын олан, сöмын вемöс бöрся вöтчан — олöмысь пышъян»;

«Оз гөгöрво Пан, мыйла та мында енмön Сю-Пан öти Ен йы-лысь сёрнитö.

Оз гөгöрво Пан, мыйön Сю-Панлön енъясыс бурджыкöсь.

Оз гөгöрво Пан, кыдзи йöз муын позьö сьöлавны йöз енъяс вылö».

Лыдпасъяс лыддьöдлöм тшöтш синö фольклорлань:

«Пелымса öксы ветлö Эжва кузя. Сы улын сизимсö шы. Сы ки улын сизимсö матур. Сыкöд орччөн сизимсö пелысасысь, сизимсö вөр кырныш, сизимсö вадор каля, сизимсö верзьöма, сизимсö ньöвъя-вужъя, сизимсö юрт, орсөн кыöм сьöд юрсиа сизимсö олöм пыкöд»;

«Нель во тэд сета ас саяд воны. Нель во тэд сета мыжтö

вештыны. Нёль во тэд сета Му нёль пельёсё юбыртны\*. Нёль во тэд сета Му нёль пельёсысь личёд корны. Ас йёз ки помысь кулан. Менам ки вылын тэнад вир оз коль. Нёль воё төрөдчан. Нёль пельёсё йөрман. Нёль сэрөгё пыксян».

## Синтаксисын ритм

Синтаксис тшупёдын медся нин бура төдчө О.Уляшевлөн ритмнас прозасё ловзьёдöмыс.

Гижёдын ритмсö кутöны öтсяма эмакывъяс, гежöдджыка кывбердъяс, найö йитчöны öта-мöдыскöд кывйитöдъястöг. Та-тшöм лыддьöдлöмсьыс ритмыс ньöжмö, висътыс муно вöляникысь, тэрмасътöг:

«Эньсянь-пöчсянь вичмисны протож, кысян ем, чöрс, шыран, тусяпу жель, лы писътöг. Айсянь-пöльсянь вичмисны емдон пурт, чукри-пурт, лы тшакыля дзурыд пырньöв, кульчуньысь нöйтöм ньöв йыв, емдонысь дорöм шы йыв, ыргöнысь кисьтöм пель гудъян»;

«Панпи кывтö-катö вежа Висер ю вывтi, козьятiлля вöратi, зарни пожöм яг дортi».

Кывйитöдтöм лыддьöдлöмыс да гозъя кывйыс (чой-вок, ай-мам) ёна лöсялö перым кывъяслы, медся нин шöр нэмъясья важ перым кывлы и гижёдын, дерт, таон вöдитчöма төдöмөн.

Тшöкыда «Пан туйын» öтсяма тэчаса сёрникузяяс тэчöны ритмсö: «Лупша-вок гожöмын оз тшöгöдчы. Лупша-вок тöлын оз узь. Лупша-вок тöла-гожöма миян моз вöрын кöйялö, вөр-ва помысь олö. Лупша-вок көр бөрся вöтлысьö»; «Из чорыдсянь — мортлөн лысьöмыс. Ловъя пусянь — мортлөн лолыс-олöмыс. Ыргысь бисянь — мортлөн сьölöм ыргöмыс. Визув васянь — мортлөн визув вирыс».

Öтсяма синтаксиса сёрникузяяс кутöны ритмсö оз сöмын «Пан туйын», тшöтш и «Излань зыран, зарни зыран» триптих-лөн ритма прозаыс артмö на отсöгөн. Тайö пыдi подув ритмыс йитö триптихлысь куимнан юкөнсö.

Быд кадлөн аслас öд, аслас ритм. Öтсяма синтаксиса дженьыд паськөдтöм сёрникузяясөн гижысь нүөдö тэрмасътöм ритм, важ кадлы, важ йöзлы лöсялана ритм.

«Пан туй» гижöдлы лöсялöны тшöктана сёрникузяяс. Пöль, ай, вежай велöдöны Панпиös, восьтöны сылы коми олöмсö, оласногсö, эскöмсö. Бөръяпомыс Паныс ачыс нин велöдö коми йöзсö бара на тшöктана сёрникузяясөн:

«Вежөрөн ов, Весью эн пөр, Панпи, Панбыдтас, Панвердас!»

«Эн дзугсы, Панпи! Дзöрган рельö, рельвывсаыс синтö вежö. Шыась Ен пельö, видзöд Ен Эжö!»

«Эн зэвтчöй, эн омöльтöй öта-мöдös. Коми кыв эн вунöдöй. Коми кывйысь эн лэччысьöй. Гөптö эн уськөдчöй. Вывлань кыпöдчöй. Чукöртöй. Лоас чук. Чук йылас лоö чут. Чут йылысь аддзас Чур. Сийö быд чут аддзö. Эн полöй, Панпиян, эн личөдчöй, Панбыдтасъяс!»

---

\* Юбыртны — юрбитны, важ ногөн.

«Пан туй» — тайо висътасъом-восьтысьом, войтырös велöдöм, войтырös чукöстöм. Танi чукöртöма да сигöртöма история, важ эскöм подув, индöма комилы туйсö и важас, и вылас. Тайö гижöдас уна öткöдыс мукöд войтыръяслөн да эскöмъяслөн велöдысь-видзысьяскöд. Пан мунö Из сайö, но кöсийсьö бөрвоны таладорö:

«Емынва-Печера костö коля ортъясös, мед видзасны дзебасъясös, кытчöдз ачым ог лок»; «...сидзкö тэнад Паньд Из сайö... мунöма, бöрсö абу на волöма. Чуксав, кор. Чукöрт, корсь. Коркö паньд воас, он кö сюмыс-кöвтö орöд, он кö кывтöм пемöсö уськöдчы».

Тайö, дерт, архетипа сюжет. Йöзös-войтырös видзысь-дорйысьлөн бөр локтöмыс тшöкыда, кыдзи пасйим нин, паньдасьлö и мукöд войтырлөн. Тыдалö, кутшöмакö тайö матыс и мировöй религиясын мездысь-дорйысьясös виччысьöмкöд. «Пан туй», Пан мозыс жö — ас войтыр нуöдысь-велöдысь, дорйысь-видзысь.

## Анафора — ритм видзысь-кутысь

Видлалам кö «Пан туйын» паньдасьлысь литературнöй приёмъяс, аддзам, мый О.Уляшевлөн ритма прозалы медъёна лöсьалö анафора литературнöй приём. Сийö унапöвсталö öтсыма шыяс — тэчö шыа анафора, öтсыма морфемаяс — артмö морфемаа анафора, öтсыма кывъяс — лöсьöдö лексическöй анафора, öтсыма кывтэчас да сёрникузя — вöчö синтаксиса анафора. Анафора öтсöгөн гижöд пöрö ритма прозаö, пöрö поэзияö. Көнсюрö уна сикас анафора (шыа, морфемаа, кывъя, синтаксиса) паньдасьлö öти сёрникузяын.

«Панлисны Панъяс пансьывтöм панас,  
Панлисны Панъяс паньда панас.  
Панласьöм-пансьöм асянь эз панны,  
Олисны сэнi, вылисны танi,  
Вöлисны комилы вужйөн и иддзөн.  
Панлөн бур везйыс панпиянös видзö.  
Паньда воысьös бурджыка видзöд,  
Паньд кö локтас, мед бөр оз мун сидзи».

## «Пан туйын» юкөн нимъяс

Видлалам О.Уляшев гижöдсьыс юкөн нимъяс: *Пансян кыв, Панас, Пан шег, Панас мойд, Пантуй панас, Пан кар, Паньдасьöм, Пан тшын, Пан пурт, Пан пöрт, Пан туйö петöм, Панъясьöм-пансьöм, Панлөн сюрöсасьöм, Пан сотник, Паньда вöт, Пана-Сю-Пана, Пан син сайын, Пан пурт ловзьöдöм, Пан пурт нырөн, Пана-Пелым ойка пыргися, Пан кыв.* Дерт, и «Пан туй» нимыс тайö визувтi кывтö.

Танi босьтöма подув пыддиыс морфемаа да кывъя анафора. Юкөн нимъяс лейтмотив моз öтувтöны «Пан туйсö» дзоньнас, сурса лы моз кутöны гижöдыслысь вир-яйсö.

«Пан туйын» 21 юкөн. Фольклорын, мифологияын тайö гу-

ся вежа лыдпас, куима сизим, паныдасьлө обрядъясын, ним-кывъясын, вордкывъясын.  $21=1+2+3+4+5+6$ . 21 — тайö от-пырйö и енлөн, и мортлөн лыдпас. Дункан Макдугал серти — 21 грамм морт ловлөн съоктаыс. Нумерологияын 21 лыдпаслөн вежөртасыс — айлөн туй (морт туй); юрнуөдөм; велөдөм. Сидзкө, 21 лыдпасыс индö войтырөс нуöдыс да велөдыс туй вылө, важ гуся төдөмлунъяс да обрядъяс дырся вежа кыв вылө.

### «Пан туйын» серпасъяс

«Излань зыран, зарни зыран» триптихсö О.Уляшев серпасалис ачыс, пöймөн. «Пан туй» юкөнын öкмыс серпас (вежа лыдпас, куима куим). Кутшөм вежөртасыс серпасъясылөн, кыдзи тані ритмыс тыдовтчö?

— Öкмыснан серпасыс öтсыма гөгрөс кытшын.

— Быд серпасын эм шондi да төлысь пас, аньлөн да айлөн пас.

— Быдлаын эм Войвыв кодзув пас.

— Став серпасас эм чөж да гөгөра, Енлөн да Омөльлөн лэбачьяс.

— Кызын серпасас паныдасьлө кöин (Лупша вок, комияс кодь жö вöралысь).

Тайö пасьясыс лейтмотив моз паныдасьлөны быд серпасын, кутöны ритмсö. Кытшoла быд серпасын — енъяс, видзысьяс, вуджөръяс, ортъяс — пыр йöз весьтын, йöз гөгөр, найö котыр-тöны пространствосö. Серпас шöрас Пан, чужöмсянныс пöрысь-мытöдыс олöмас тшупöда да сьöкыд здукъясö,— тадзи пасйöма кадлысь мунöмсö.

Тадз ин да кад йитчöны «Пан туй» серпасъясын.

### «Пан туйын» символизм, композиция, жанр

Олег Уляшев корсьö коми прозаын выль, таявтöм на туйяс. «Пан туйлөн» вужйыс фольклорын, дiныс литератураын, йылыс философияын да эскöмын. Тадз жö ас кадö гижлисны А.Белый да А.Ремизов символистъяс, найö тшöтш йитлисны фольклора-литературасö. А музыкаысь найö босьтлисны композициясö: тема, темасö паськөдöм, вариацияс, лейтмотивъяс. «Пан туйлөн» символизмлань кежöмыс бура төдчö.

Символистъяслы лöсялö кывйөн ворсöм, кывсö бергөдлөм-песлөм, кыв гартлөм — сылысь тыдавтöм вежөртас восьтöм-перйöм. О.Уляшев на моз ловзьöдö тайö приёмсö, нельладорсянь, квайтладорсянь кыв дорас матыстчö:

«Кыпыд мортыд Ачыс чурвидзö, Ачыс Чур видзö. Чурвидзысьöс Чурыс видзö».

«Быдласянь чурвидзöны, Чур видзöны. Öтисö Ен-Чур аддзö, мөдсö Торум аддзö».

«Пан туй» ритма прозаын, музыкаын моз, паныдасьöны рефренъяс, лейтмотивъяс, найö, неуна вежлалöмөн, кывъяссö сорлалöмөн, вуджöны юкöнысь юкөнö:

«Енэж-Ен — юрйылын! Омöльяс — кок подлöсын! Ов, эн

---

пов, муса пи»; «Енъяс — ки вылад! Вёт-вуджөр — вежорад! Быдмы-сөвмы, дона пи»; «Ен юрйылын, Омольяс кок подлөсын! Вылө видзөд, кок увсыд ордымтө эн вошты!»; «Ен — юрйылын, Олом — муслун пур вылын!»; «Ен юрйылын, омольяс кок улын!»; «Эн полөй, Панпиян, эн личөдчөй, Панбыдтасьяс! Енэж-Ен — юрйылын! Омольяс — кок подлөсын! Олөй, эн полөй! Ме муна Из сайө».

Лейтмотивъяс отсалөны тэчны «Пан туйлысь» композициясö: төдчөдөны Пан олөмысь медыджыд тшупөдъяс (чужөм, пыртөм, **гар** разьом, туй бөрйөм, вермасьом, тыш, Из сайө мунөм). Тайө да мукөд лейтмотивнас О.Уляшев бара содтө прозаыслы ритмсö.

Олег Уляшев А.Ремизов моз содталө «Пан туйө» мойдъяс, вөтъяс, сыланкывъяс, обрядъяс. Нимтө тайө сораса выль жанрсö «Кодлы висьт, кодлы мойд» нимөн. Лыддысьысь ачыс бөръяс, аслас вежөр сертиыс, мойд-ө-вөвлөмтор, гуся важ велөдөм-ө-ылөдчөм тайө: «Быдөнлөн ас весьтөн весьтасалөма вежөр-сюмысыс. Быдөнлөн вөв сертиыс лосьөдөма. Кодлөн кузьджык, кодлөн дженьыдджык».

Позьö видзөдлыны «Пан туйлысь» композициясö и музыкакөд йитөдын. Медводдза юкөнын автор веськыда сёрнитө лыддысьыськөд, пыртө сийөс аслас руө, паныдасьлөны нин медводдза паськөдтөм на лейтмотивъяс, анафораяс — тайө увертюра. Темаыс — Панлөн олан туй, морт туй. Тема восьтөмыс — Пама-Степана костын вен-тыш. Вариацияс — содтөд сюжетъяс (вөт, мойд, сыланкыв, миф). Водзö паськалөны лейтмотивъяс, рефренъяс. Аллитерацияс, ассонансъяс, уна сикас анафораяс — тайө оркестровка. Öтув артмө симфония.

Тадзи «Пан туй» подулын сулалөны музыка да ритм. Ритм — сюрөсыс, музыка — лолыс.

Тайө гижөдын лои видлалөма Олег Уляшевлөн «Пан туй» гижөдысь ритма проза артмөм-чужөмсö, ритм ёнмөдысь приёмъяссö. Видлалегөн тыдовтчис, мый ритмыс быдлаын — шыын, морфемаын, кывйын, кывтэчасын, сёрникузяын, абзацын, юкөнын, серпасын, сюжетын, композицияын. «Пан туй» ритмнас олө-лолалө. Ритмыс шыөдчө лыддысьысьлөн эмоцияс дорө, вежө найөс, чуксасьö вежөр дорө, обрядъясын моз вуджөдö юр вемсö бета-ритмысь (13–25 герц) альфа-ритм пыр (7,5–13 герц) тета-ритмө (4–7,5 герц). Мый вежө мортсылысь вежөр тшупөдсö? Магическөй текст да юрбитөм, нимкыв да медитация. Такөд йитөдын позьö шуны, мый «Пан туй» — абу сөмын художествоа гижөд, а аслысыма паськөдөм нимкыв, юрбитөм да вежаторъяс восьтөм.



Юрий ВАСЮТОВ



## Подув пуктысьяс\*

ВӨВЛӨМТОР ЙЫЛЫСЬ ВИСЪТ

### Подув

Вөчсьö ставыс öдйö сöмын мойдын. Олöмад öдъясыс мөд-джыкöсь. Кольны кутис төв, а министрөн сызьöм техника абу и абу. Со нин март төлысь парма весътöд шутъялö: то ызöбтылас лэчyd лым чиръяса вой төлөн, то бөрддзöма-войталö керка вевт лэбув дорышъясьянь, туй вылö ва гуранъяс кодъялö. Пунöй лэ-бö сьöдасьöм ю весъттi еджyd кельöбөн, тулысöс вайöдö. Смоль сьöд гöна ябыръяс жбыръялöны, аслыныс поз корсьöны, а челядь вунöдöмаöсь вöчавны: оз быд во волыны Удора му вылö ябыръясыд, а таво со сэтшöм гажаа сьылöны.

Тыдалö, гажа и гожöм пуксяс. Ывла вылын шондiа да кузь югыд. Весиг пышкайяс гораджыка чипсöны: гажаджык лоöма налы, быдсикас лэбачыс орччөн лоö да. А то джиянысь кындзи некодi оз жбыркнитыв кодзыд төвся сиктын. Шуркнитлас-пуксьылас кө коркö öшинь ув йөр падöс\*\* йылö жан морöса жонь да пыркöдыштас төричасö йөрбердса турунысь, лун-мöд мысти вошас нин, ышмалысь турöбыс пыркöдöма нин турун шепсö лым вылö, а сэтысь он нин кокав: öтиясöс төлыс нö-балöма, мөдъясöс выль лым тупкöма.

И йöзыслөн син-пельныс югзыштитi, нюмпошөн олöны. Ту-лысыд быдөнлы вайö кокньöд. Кослан школаса велöдчысьяслөн, кыдзи аддзöны найöс велöдысьяс, содiс и збойдуныс, и выныс. Гызисныджык коридоръяс и классъяс. Югзыштöма и юр вежөр-ныс нывъяслөн да зонпоснилөн.

— Декабрын да январын велöдчысьяс быттö унмовсьлöны ош моз,— сёрнитö учителяслөн öтувъя вежöсын Анна Михайловна. Весиг и сылөн талун төдчö кыпыдлуныс.— А öнi быттö садьмав-ны пондiсны, весиг формулаяс төдöны.

---

\* Пом. Заводитчöмыс май төлысья номерын. Паськыдджыка авторыслысь водзкывсö да редакциясьянь шыöдчöм лыддьöй сэтысь.

\*\* Падöс (диал.) — сюръя.

— Мортыс, Анна Михайловна, ловъя клеткаясысь жö артмöма,— кывлысьö аслас пызан сайысь Елизавета Ивановна. Сійö талун мак дзоридз кодъ, паръясыс кодъ жö гöрд ковтаа да сыысь ли, мый ли син-пельыс ставнас ыпъялö гöрд биöн.— Шондіыс оз тырмы ловъя клеткаясылы, куим-ö-нель час кежлö и петавлö да, ычи-кычи\* моз нырсö сöмын и мыччывлас йö-зыслы.

«Тöдчö, тэныд петöма жö нин шондіыс»,— нюмыс петö завучлөн, но нинöм оз шу. Ставöн тэрмасьöны урок вылö, больгыны некор. Пырис классö и Эдуард Александрович. Сылы ньöти абу кокни лов вылас: мыйлакö полö сьölöмыс — техника эз во. Но петкöддыны мукöдды ассьыд сьölöм висьöмтö оз позь. Оз лысьт весиг видзöддыны удж кузя ёртъясыс вылö, а этайö юр вундысясыс вылö эн жö кöть видзöдды, но некытчö он воштысь. Классын Гришин — абу директор, абу и МТС котыртысь. Тані сійö — история велöдысь.

Кöть и быть вылö колö вöлі вöчны урок нуöдан планъяс да конспектъяс, сійö эз восытыв найöс урок вылын. Велöданногыс сылөн вöлі аслыссыкас. История — сэтшöм велöдантор, кор колö тöдны збыль вöвлöмторъяс: войнаяс, царъясöс, восстаниеяс, народъясöс, кодъяс абуöсь нин... А найö öд коркö вöліны ас кадö. А кор? Шуам, кор вöлі Пунической война? И кор олс Александр Македонскöй? А вöвсö сылысь кыдзи нимтісны, колö-ö тöдны? Кор эськö вöлі Пугачёвлөн ли Болотниковлөн восстание?

Учитель водзын öкмысöд класс. Локтан воö налы колö помавны школа. А мый кольö юраныс? Тöдас-ö кодкö, кор воис Коми муö Перымса Стефан? Дерт, велöдчан программа серти тайöс оз и ков тöдны... Öшинь сайын дзирдалö шонді. Югъялöны синъясыс и велöдчысьяслөн.

— Бур лун!— чолöмасис учитель да босьтіс киас мел.— Талун кежалам важас, видзöдлам, мый колис тіян юръясö öкмыс во чöж школаö котралігөн. А шондіыс талун, шондіыс... И дöска вылö ми вöчам шондіыс кодъ жö кытш. А гöгöрыс гижалам лыдпасъяс. Политов чайтö, мый учитель ылалс да кöсйö геометрия урок нуöдны. Сідз, Политов? Энлы... А со и шöрас лыдпасалам. Шондіыслөн эм жö ядро да и сьöд чутъяс на... Гöгөрвоин, Романько, мый тайö татшöмыс?

— Дзик тай трактор чиллян кодъ-а...— Романькоöс он кый татшöм юалöмнад. Сійö аддзас на и сэтшöм кывъяс, мед вөрзьöдны став классö. Но öні серам пычкисны сöмын нывъяс. Зонъяс видзöдлісны ёртныс вылö сідз, мый позис гöгөрвоны: «Эн ышмы!»

— Эн тöд, Романько. Тайö историялөн көлесаыс. Тэ ног кө, чилляныс, а нöшта кө стöчджыка, гöгылыс. Гöгылыс — ставлы медся шöрыс, «гöг» кывйысь артмöма. Висьтав, сідзкö, Романько, тайö лыдпасыс историялөн гöгылас мый петкöдлö?— велöдысь индіс медся тöдчана да унджыкысь кывлана лыдпас вылö.

— Сюрс öкмыссё дас сизимöд воын вöлі революция,— эз падмы Романько сыысь, мый медводзөн буретш сійöс юалісны.

— Кутшöм революция?— эз лэдз пуксыны Романьколы велöдысь.

— Социалистической.

---

\* Ычи-кычи (диал.) — ласича.

— А нёшта кутшом революцияс тэ тодан?  
— Нёшта?— паськыд пельпомъяса да кыз ныр-вома велодчысь дыр чукраліс кымөссө, но содтыны нинөм эз вермы.

— Курыдкашин?

— Буржуазной.

— Петкодлы дёска дорын, кор вөлі сэтшөм революцияс да кытөн.

— Сюрс өкмыссё витөд да дас сизимөд февральын.

— Тайö Россияын. А сэсся? Жданов? Ивкина? Петчина?

Он и тодлы, кольö урокыс. Велодысь удитас юавны ставсö, тодмавны, коді кызди тодö велөдлөмторсö. Куим-ö-нельöс донъялас «вит» да «нель» вылö, но некодлы «кык» ни «өтик» журналö оз пасйы, коть и тыдовтчылас кодлөнкө татшөм «төдöмлуныс».

Мыйла мортсö дөзмөдны «сьод пасөн»? Колö корсьны туй, мед эськө эз вөв ни өти велодчысь, кодлысь төдöмлунъяссö позис донъявны «нинөм оз төд» пасөн. Мый вылö, сідзкө, ме велодысьыс, эг кө вермы велөдны? Тадзи мөвпаліс аслас велөдөм йылысь Эдуард Александрович, а регыд пондіс и кызд директор корны мукөд велодысьясынь татшөм жö видзөдласа удж.

Но вөлөм дзик позьтөм гөгөрвоөдны велодысьясөс, мый быд велодчысь — торъя морт. И оз позь мортсö юклыны төдöмлунъяс серти быд лун. Позьö на өд интуиция отсөгөн төдмавны, кутшөм төдöмлунъяс вермө чукөртны юрас сійö либө мөд зонка ли нывка. Шөркодь лыдпасыс тыдовтчас во помын. А мый коркө дыш овлө мортыслы, а, гашкө, эз удит лыддыны да дасьтысьны, то эм на өд кад, колö сөмын отсыштны, юавны мөдысь, коймөдысь.

— Дыш лопарысь на дыш руныгöй, лодырь, а ме сылы — «куим» да «нель»?— оз көсйы Гришин ног овны завуч-математик.

— А тэ эн урчит «нель» ни «кык»...

— Кытысь нө ме корся шөркодь донъялөмсö? Гашкө, содтам «нель», «куим» да «кык» — лоö өкмыс. Куим пельö юкам, лоö шөр оценка — «куим»...

Да, сьöкыд велодысьлы, сійö кө збыльвылө велодысь. И көсйö кө велөдны, а оз сөмын предмет сетны. А математик аслас математикаысь кызди нинөм оз көсйы төдны: «Менам сідз нин уна уджыс гортын, сы мында тетрадь колö видзөдлыны...»

— Тиянлы кокни — ті история велөданныд. А кызди математиклы?— юасьö Анна Михайловна.

— А биологлы?— сүйсьö сёрниö Елизавета Ивановна.— Тычинка, пестик, хлорофилл... Кыйыд чегö, а шуны быть колö.

— Меным кокниджык,— крукасьö сёрниö Владилен Васильевич, коді велөдö коми кыв да литература, роч кыв да литература, а кор висьмылö «немка», вежлö и сійöс, нуөдö литературной кружок да и артисталö на любительской театрын. И быдлаö кад тырмө.

— Тэ коть эськө чөв олін, Владилен Васильевич,— кывлысис нёшта өти математик, Нина Ивановна.— Öти чунь олан, гөтыр ни котыр, гортад книга чукöрыд и төждыс.

— Чойöс видза-велөда, чойöс, дона Нина Ивановна...

— Чой... Сылөн абу на небыд сой,— Нина Ивановналөн гортса котырыс ыджыд, сійö төдö, кутшөм овлө гортув ноыс,

кор тетрадьастö видзöдлiгмоз колö и бöрдöмысь дугöдны кодöскö, и вердны, и юктöдны...— Владилен Васильевич, вай ми тэнö гöтралам. Елизавета Ивановна, мый тэ корсьысян бокысь жö-никъясöс? Видзöдлы ас гöгöрысь: абу-ö налөн сойыс небыд-джык?

— Тан эм кутшöмкö логика,— шыасьö Василий Фёдорович.— Ме эськö и корасьны тшöтш пыралi,— Василий Фёдорович оз шмонит, сылы жаль ёртыс: пöрысьмыны кутiс, а оз гöтрась. Тадзтö öд и вошны абу дыр.— Ми эськö сэтшöм кыпид кöлысь ворсам!

— Василий Фёдорович коймöдысь нин вöзйö менö Владилен Васильевичлы, а сийö быттö оз и аддзы менö,— Елизавета Ивановна быттö и оз шмонит, но сийöс сьöкыд гöгöрвоны: бы-дөн тöдö, мый сийö кодлыкö мусмöма.

Дзикöдз вежсис нылыс бөръя кадö: удж вылас быд лун лок-тö быттö праздник вылö. Кытысь и сы мында выль платтöйыс. А Владилен Васильевич повзöма нин. Сийö Кослан сиктын «холостякъяслөн союзөн» юрнуöдысь. Збыльвылас эськö эз и сибöдчы сы дорö мича нылыс, мед и шуö серамсорөн та йылысь, но Владилен Васильевич и таысь зильö мынтöдчыны öдйöджык, петö «куритчан» жырйö.

Талун Владилен Васильевичöс лунтыр на аддзöны. Сылөн «Удораса пионеръяс» лэдзисны ки помысь гижöм журнал. Сэни литературнöй кружокö пырысь велöдчысьяс, том поэтыяс да прозаикъяс, асланыс кывбуръясын да висътъясын арталöны, кутшöмөн лöö Кослан кызь во мысти. Öтилөн гижöма: «Кослан карö ме вои көрт туй кузя, а бөр сэтысь мунi «Дугласөн». Мöд мөвпалö школа йылысь, тыдалö, көсийö лоны велöдысьөн: «Кос-ланса школа — ыджыд каменнöй зданиеын, быд предмет велöдöны аслас кабинетын». Коймöд пасйö, мый школаын ставсö механизм вöчö, весиг джоджсö мыськö робот. Гожöм чöж велöдчысьяс механизмъяс отсöгөн уджалöны колхозлөн видз-му вылын. «А колхозникъяс öнi абуйсö. Да найö оз и ковны, став уджсö вöчöны асьныс механизмъяс»,— помалö фантазёр.

— А мыйла и гöтрасьны,— сералöны учителясь «жöниклөн» петöм бöрын.— Ставсö механизмъяс пондасны вöчны,— ставөн гораа серöктiсны. Сэки пырис директор, да ставөн лөнисны.

— Мыйла дугдiнныд? Гажöдчöй. Эм та вылö помка — шко-лалы воöмаöсь механизмъяс...

Челядьöс велöдысь гырысь войтыр сэтшöма ваксыны пон-дiсны, мый Гришин шöйöвошис: тайö сы вылын семавтöдз се-ралöны али челядь руö скöнь вöйöмаöсь. Но, кор восьтiсны га-жыслысь помкасö, ачыс кутiс куснясьны серамысла. А сэсся и анекдот на та йылысь висьталiс.

Выль тракторъяс, мотоцикл да электростанция видзöдлыны ывлаö ылькнитiс став школаыс. Сэни жö виччысьтöг артмис митинг. Эдуард Александрович эз вермы дзeбны ассьыс нюмсö, сёрнитiс гораа да кыпыда, а сёрни помас вöзйис: «Мед олас школалөн МТС!», и ставөн горöдiсны «Ур-ра!» Вывлань ка-чалiсны шапкаяс, а зонъяс горзiсны и чеччалiсны. И некод эз көсийы кольччыны гажöдчöмысь. Геня Политов висьталiс не-кымын кыв, кыдзи «шойччис» министерскöй кабинетъясын тех-

ника судзодігөн, и сёрнитіс весиг Володя Романько да чуксаліс быдёнös видзны вьль техникасö «ассьыс синмыс моз».

А техника сувтіс школа йөрö да пондіс сэнi черань везйөн везьясьны, бусөн тупкысьны да... сімны. Кытчö пыртны, кутшöм лэбулö саймовтны татшöм донаторсö? Восьса енэж улын видзны — став водзын мыж: ывла вылас то шляча, то зэр...

Та йылысь сёрни паськаліс школа йörсянь став район пасьтала, быттö жугласьöм йиыскöд тшöтш кывтіс Мозын кузя Латьюгаöдз да вуджис Вашка вылö, кызь вит сюрс квадратной километр пасьта парма пытшкö йөршитчöм сиктьясö, сэнi сулалысь школаясö. Татшöмторйыс эз на вöвлы Удораын: эта мында техника — öти школалы. Вашка пöлөн олысьяс «ловья» тракторсö эз на аддзывны ас синмөн, а районлөн юрсиктса школалы — куим вьль трактор. Кытчö енмыс видзöдö?

Мукты Тыйыв сиктса колхозысь юралысь, кодös йöзыс мыйлакö Сам-Коровинөн нимтісны, коркö райсöветлөн сессия вылын казтыліс война кадся гöра-көдзасö: «Восемь женщин запрягал да так и пакал». А öнi гижис райисполкомö письмö: «Молоко-сосам трактор. Пусть на себя пашут!» Норасьны эськö көсьöма колхозөн веськөдлысь, но комиён эз куж гижны, а рочнас абу жö на велалöма, и Панюков нинöм омольсö абу аддзöма. Сідз и вочакывйыс артмис: «Пахать будут на себя. Они — настоящие хозяева земли».

Тадзи Кослан школа вөрзьöдіс став районсö. Вөрзьöдны вөрзьöдіс, а петан туй оз тыдав: техника видзны некөн. Но корсянторйыс ачыс аддзис корсьысьсö. И отсаліс бара жö Пони Панюков.

Мунісны урокьяс. Эдуард Александрович пукаліс öтнас аслас пелькөдöм кабинетас, кытчö, важся нимсö тöдöмөн, век на яндысьлісны пыравны öткымын велöдысь и велöдчысь. Сы вöсна тані унджык кадсö вöлі чöv-лөнъ, мый кивыв вöлі директорлы: унджык позис ноксьыны бумагаясөн да и мөвпавны кокниджык. Кодкö тотшкөдчис да воча кывлысьöм виччысьтөг öдвa-öдвa восьтыштöм öдзös пыр пычкысис кабинетö. Тагös дорö сувтіс Панюков.

— Вовик, тэ мыйла абу урок вылын? Сёрмин? Висьтав: ме тшöкті, и — марш урок вылö,— школаын важөн нин вöлі лöсьöдöма сідз, мый велöдчысь кө сёрмас урок вылö, директорлөн кырымпаса «пропусктөг» пырны оз лэдзны.

Гришинылы ёна эз кажитчы кодөнкö лöсьöдлөм тайö «законы», и сійö гижліс нин та кузя приказ, бырöдіс ас думсьыс, но некоді на быттö эз и кывлы та йылысь: ставыс муніс бура тальöм важ кок туйöд. А та дырйи мыйта кад вошö! Кор велöдчысь сёрмыліс öти-кык минут, воштыліс, гөгöртны кө шөркодя, дас минутöдз, и сетö кө велöдысь вьль материал, вьль тема, та мында сёрмысьлы сьökыд «вөтöдны» теоремасö да гөгөрвоны правилöсö, эз кө удит водзсянныс кывзыны. Сы вöсна и дözмис Эдуард Александрович, мыйсылөн приказыс оз уджав. Но зонка и пельсö эз вөрзьöд.

— Кодлы шуöма?— бара на көсийис скöралан ру лэдзны ас

син-пель вылас директор, но казяліс, мый Пони Панюков пырöма сы дорö кутшöмкö мöд могөн.

Повзбöдiс со. А петас кö, гашкö, оз и висьтав сэсся? Коляс лов пытшкас директор вылö гуга видзöдлас, курыд пас. Гришин чеччис улöс вывсьыс да матöдчис öшинь дорö. Ыбсайса вөр тасыс дзик нин пемдöма, лым буисьыс\* пуяс вывсьыс гылалöма, тувсов ловшыа нин вöрыс. А со сёнса баддьыс еджов нин, колябаль мыччысьöма еджыд нырнас. Коркö öд öнi Берба лун, мöвпыштiс Эдуард Александрович, колö гортö чегъялыштны.

— Тулыс локтö, Панюков, а тэ он и казяв,— ывла вылö видзöдiгтыр мудера панiс сёрнисö школаса директор.

— А ме мыйкö тöда...

— Мый тэ тöдан, Панюков?— зонка эськö эз помав да вöдзö на мыйкö кöсйис висьтавны, но дырджык мытшкерис, да Гришин эз вермы виччысьны, юалис.

— Ыджыдъяг посёлөксö мöдлаö вуджöдöны... А сэнi баракъясыс кольöны. Йöзыс выль посёлөкын кутасны овны. Бурджык керкаясын...

— Но и мый?— эз нинöм гөгөрво директор.

— Гараж вылö туюсны...

— Ак, тэ... Тэныд кодi висьталiс?— тököтьö эз чеччышт, гөгөрвоис да, зонка водзас верстьö морт, велöдысь, школаса директор.— Ай да Панюков! Лоны тэныд батыдлөн улöс вылын пукалысьөн! Бур, другö, видзöдлам-видзöдлам. Идеяыс лöсялана. Но мый абу аслад — он на курччы. Но мед, миян пиньяс ёсьöсь... А кызди эськö ми сийöс вайöдам? Чайтан, тракторъясөн? Но сийö баракъясыс — мöдлапöлын... Колö öдйöджык... Но мун нин, мун сэсся урок вылад, висьтав: ме кутi... А мый сёрнитiм, сы йылысь — ни гу-гу. Гөгөрвоин, Панюков? Аттьö тэныд бур мöвпсыды...

Но леспромхозса директор Павел Васильевич Кудряшев и кывзыны эз кöсйи, мед баракъяссö сетны кодлыкö мöдлы.

— Миян найö аслыным на оз сорасьны,— чорыда шуис сiйö, кор Гришин гаралис баракъяс разялөм да Косланö нуöдөм йылысь.

Ыджыд Панюков сиктын эз вöv: мунöма командировкаö. Эдуард Александрович кутiс школа коридорысь Борис Афанасьевичöс. Дженьыдика висьталiс могсö да юалис:

— Кутшöм сöвет сетан, парторг? Кодкö эськö вермас оз бергöдны нырсö Кудряшевыслысь?

— Сы пыдди кö ме, дерт, эськö эг сет,— друг петкöдлiс асьсö эгоистөн Борис Афанасьевич.— Абу на ми сэтшöм озырöсь, мед шыбласьны весиг и баракъясөн. Но... позьö шыöдчыны райкомö. Гиж кабала менам кырымпасөн тшöтш. Верман и профкомса веськöдлысьöс öтлаöдны. Гашкö и... Найö öд вөр лэдзöны... леспромхозсö шуа. Ас кианыс... Жальыс кö петас... код тöдас?

Мöвп вöли бур. Гижисны райкомö. Но воссяс нин ва, петасны нин регыд гөрны «Родина» колхозын, а «Ичöt МТС-лөн» тракторъяс пыр на сулалiсны лым-слöt улын чöла да рама. Таво сiдз эз и ло ни гараж, ни колхозкöд договор сылөн муяс вылын

---

\* Буись (диал.) — лым тукта.

уджалом йылысь. А школалон аслас муыс, дерт, эз вöv. Колхозса председатель Иван Михайлович Курыдкашин эз көсйи ни гөгөр-  
воны школаса директорös, ни эскыны, мый челядь вермасны  
асьныс видз-му вöдитны.

«А гашкö, и збыль — водзджык на,— мövпаліс Эдуард Алек-  
сандрович, кор локтіс колхоз правлениеысь, көн нинöm эз артмы  
договорөн да видз-муөн.— Гашкö, Политов да Романько выlö и  
позьö на кутны лача, мый найö вермасны, но мукöдыс?» И сэк  
жö воис стрöг бумага ГАИ-сянь: «Трактор, автомашина, мотоцикл  
выlö вермасны сöвны сöмын найö, кодъяслы тырöма дас квайт  
арös, да эм налön та выlö колана документ, новлöдлом выlö  
право».

Быттö ставön мунісны Гришинлы паныд. Помасьö велöдчан  
во, а «Ичöt МТС» котыртан удж сувтіс.

Директор кабинетö тотшкöдчисны. Вölөмкö, Елизавета Ива-  
новна:

— Тіянлы письмö воис, Эдуард Александрович,— том учи-  
тельница мыччис конверт, көні лöзаліс КПСС райкомлön штампыс.

Елизавета Ивановна пондіс тшöкыдджыка паныдасьлыны  
школаса директоркöд. То урок выlö мунігөн орчөн веськалас,  
то школаысь петігөн. Кутіс кежавлыны и ставлы öні тöдса «гара-  
жö». Позьö шуны, ыджыд көсйöмөн пырöдчис выль уджö. Сылön  
корöm серти лои ньöбöма көкъямыс порсыпи, а налы көнкö ко-  
лö овны — ковмис быть лöсьöдны ыджыдкөдь порсь гид. Арнас,  
колхозлön муяс вылысь картофель идралігөн, кытчö кыскöма  
вöлі пöшти став школасö, том биолог öтнасмоз котыртіс ставпö-  
лос уджсö, мыйön ёна отсаліс директорлы, кокньöдіс сійös.

Кöть ывлавывса удж вылын, кöть школа пытшкын, Елизавета  
Ивановна выlö любö вöлі видзöдны: век пельк паськöма, мичаа  
вöччöма, юрсисö шыльöдöма-мольöдöма, тырпъясыс краситтög  
гöрдöсь, синъясыс öзйöны, ачыс век нюмъялö. Со и öні: гöрда-  
лысь кыз паръясыс векняммылісны, кусынтчылісны кык ньö-  
лавудж\* моз да лыйыштісны нюм-ньöвсö Гришинлань. Кыдзи  
сэтчö воча он нюмдышт.

— Но, кыдзи тіян, нывъяс: нокыс уна?— долыда олысь био-  
логлысь юаліс директор, киас конвертсö восьтытög кутöмөн.  
Йöз син водзын мыйлакö поліс восьтыны конвертсö. Телефон  
пыр эз кө звönитлыны, а ыстісны кө юöрсö конвертын, сідзкö...  
Но ачыс эз тöдлы, кыдзи шусис:

— Да тэ пуксы, пуксы, Елизавета Ивановна.

— Нывъяс вöчисны нин капуста рöсада выlö куйöда трун-  
даысь дас сюрс горшочек,— учительница эз пуксы, а сöмын  
матöдчыштіс директорлön пызанлань.— Колис нöшта нелямын  
сюрс, тайö абу уна, вермöдчам.

Нюмыс нывлön тöдчöдіс долыдлунсö, но бура тыдаліс: тайö  
абу удж вöсна. Морös потасöдзыс восьса сьыліс сьöдов ыр-  
гөнön воляліс öшиньöд локтысь югöрсянь. Катшасин дзоридз  
сера платтöсö кык неыджыд мачөн моз пыкис морöсыс, быттö  
ошйысис, со пö ми кутшöмöсь: томöсь, топыдöсь, веж петкöда-  
наöсь. Гашкö, мыйкö и нöшта на эськö шуисны, но Эдуард

\* Ньöлавудж (диал.) — ньöввуж.

Александрович эз нин көсйы кывзыны аслас сьолөмыслысь, мый көсйöны висьтавыны орччөн сулалысь мича нылыслөн морös чутъясыс. Босьтис пызан вылысь лы пурт да осьтис конвертсö.

Быд строка лыддьöм бöрын сьлөн паръясыс векняммысны и векняммысны, вом дор пельöсьясыс кыпöдчисны вывлань. А синъясыс югзисны, быттö öзйисны. Гришин ачыс эз тöдлы, кызди кутыштис нылös кыкнан кинас да окыштис веськыда вом дорсö. Да, чупыштис вом дорас, а эз тырпъясас. Көсйис, дерт, тырпъясас, но ныв тöдис асьыс донсö: удитис бергöдны юрсö. И артмис, быттö бан боксö и окыштисны. Но и татшöм окыштчöмыс тайö здукö эз жö вöv ковтöмөн.

— Бара на ичöтик вермöм, дона Елизавета Ивановна!— ышмис Эдуард Александрович, и нинöм эз висьтав, мый на костын здук сайын мыйкö ловзыйлис.

— Сетисны баракъяссö?— гөгөрвоис радейтысь отсасысь, быттö эз и казавлы гуся муслунлысь окыштöмсö.

— Сетисны, Елизавета Ивановна, сетисны!— директорлы эз нин пукавсьы кабинетас. Сийö топöдыштис веськыд кинас Елизавета Ивановнаös ас бердас да, зумыд яа коскöдыс кутыштöмөн, кызди бур ёртös, тэрыба, пöшти вöтлiгмоз, колльöдис öдзös дорöдз. Ачыс петис сы бöрся. Мунисны орччөн улыс судтаö лэччанiнöдз, бара бур ёртлы моз тапнитис нывлы пельпомас да котөрөн, быттö исковтис, лэччис да петис ывлаö.

Шондiа югыд лун. Ыбывса лым чарöмыс зар-дзирда посни рөмпöштанөн югъялис да корис видзöдны аслас вералысь да вежласысь аслыспölös мич выlö. Телефон вез пыкысь сюръя йылын асьыс виж вом доръяссö паськөдлöмөн сыйлис сьöд ябыр. «Гараж» дорын ноксисны зонъяс.

«А Елизавета Ивановна меным бура отсасьö,— радlic Эдуард Александрович.— И челядь сийös кывзöны. А нывъяс быттö мам гөгөр кытшлалöны. Внеклассной удж кузя завуч пö регыд лоö школаын. Тайö уджас кө индыны Елизавета Ивановнаös? Том? Но и мый? А мича, ёмаыд, нинöм шуны. Яйыс зумыд, мутшак кодь. А чужöмыс... весиг сотис паръясös,— Гришин чышкыштис вом дорсö, быттö öнi на сэтi сотчис.— А эз дözмы? А гашкö? Оз вермы лоны... Менам семья, пи быдмö... А синъясыс... Быттö абу муыввсалөн... И мыйла ме сы йылысь? Эм менам тöждыс и сытöг. Гараж лоö асланым збыльнöй — со көн шудыс. Но кызди öнi сийös вуджöдны? Тракторөн сьöдасьöм йи выlö сöвны он нин лысьт... Аски Елизавета Ивановнакöд ветлам нöштаысь видзöдлыны тайö баракъяссö: гашкö, и сылы на мыйкö резяс овмöсас».

Тадзи мөвпалiгөн Эдуард Александрович мыйлакö торйöдис асьыс да биологысь школа стен сайын вöчан уджсö. Эз кө эськö тöд, мый тайö öти овмös, öтувъя вынөн лöсьöдöмтор. Колö, сiдзкö, дасьтыны öтувъя план... Плантöг некыз оз позь. Тшöкта Елизавета Ивановналы артыштны, ыджыд-ö отсöг колхозлы вермас вöчны школа. Сийö жö биолог, видз-мусö гөгөрвоö...

А биолог, кодi кужис и мича синъяснас ворсны, вöлөм, оз сöмын пемös да быдмөг йылысь мөвпав. Кор аскинас дзонь комиссияөн вуджисны мöдлапölö содтöдысь видзöдлыны баракъяс выlö да артасыны, кызди да кор вуджöдавны да вайöдавны школа дорö, ставсö чуймöдис том биологөн медся кокныыд да донтöм уджаланног йылысь мөвпыс:

— Оні луннас лымйыс сывлө да сымө, а кӧдзыд войнас бура чорыд чир\* кутӧ. Позыӧ водз асывнас чир вывтӧйс и кыскавны керъяссӧ школа дорӧдз.

Тайӧс некод эз виччысь. Чуймис весиг Борис Афанасьевич:

— Челядь вынӧн?

— Менам воклы дас нель арӧснас морӧсас ӧшӧдісны медаль «За трудовую доблесть». Трудовую. Тайӧ, дерт, вӧлі сюрс ӧкмыс-сё нелямын квайтӧд воын. Но мыйла нӧ талун сълӧн тшӧтшгъясыс — «челядь»? — эз сетчы Елизавета Ивановна. — Асьныс жӧ «механизаторъясыс» и вӧчасны.

«Эськӧ татшӧм кӧ гӧтырыс менам вӧлі», — мӧвпыштӧс Гришин...

Чукӧстӧм «аврал» вӧлӧ воисны велӧдчысьяс и велӧдысьяс. И кӧть корӧма вӧлі сӧмын зонъяссӧс да мужичӧйяссӧс, но баракъяс дорӧ чукӧртчисны и нывъяс.

— А тэ, Елизавета Ивановна, мыйла воин? Юрнуӧдны? — аддзис том велӧдысьӧс ас чукӧрысь Василий Фёдорович да эз вермы «крукышттӧг». — Ми жӧ шуим: сӧмын мужичӧйяс.

— Кыткӧ тыдалӧ, мый ме нывбаба? — сералӧ Елизавета Ивановна. Сійӧ гача, ватнӧй пальтоа, пеля шапкаа, гын сапӧга, юрси оз тыдав — зон, да и ставыс.

— Эз кӧ кыпав морӧсӧд, дерт... — шызылыс Василий Фёдорович, но джӧмдіс да нинӧм эз вермы шуны. А Елизавета Ивановна юрнуӧдіс нин:

— Ваня, эн лэпты ӧтнад, гӧйыд вӧрзяс. Романько, отсышт... А мыйла тані стен бердыс пасйӧтӧм? Ноко, коді чера? — пыр и тӧдчӧ: абу карын быдмӧма-туӧма мортис.

Гришин видзӧдӧ тайӧ нылыс вӧлӧ, и сьӧлӧмыс топавлӧ, а кор весыкавлӧны ӧта-мӧд дорас матӧ, пыр и сывйыштны кӧсйӧ, кӧть и оз лысьт. А мӧдыс быттӧ ыззыӧдӧ сійӧс, быдлаысь аддзӧ и пыр ышӧдӧ:

— Эдуард Александрович, вай мӧс карта на кыпӧдам школы, велӧдам нывъяссӧс лысьтысьны, — вӧзйӧ нин вӧль мӧвп.

— Сёрни абу: лысьтысьны велӧдны кутам на. Но ӧд и колхозлӧн картаыс абу ылынӧсь.

— Колхоз — сійӧ колхоз и эм. Абу миянлӧн сійӧ овмӧсыс. Сэтчӧ гӧсьт моз и пондам сӧмын волевлыны. А миян интернатлы кӧ асланым йӧв — весиг чут мында оз ло лышкыд.

— Колӧ мӧвпыштыны, Елизавета Ивановна.

— Мӧвпышт, Эдуард Александрович... Менӧ и инды МТС-нас весыкӧдлыны, — сералӧ аслас звӧнок кодъ горнас, кисьтӧ дзольгысь ёль моз, и он гӧгӧрво, шмонитӧ тайӧ нылыс али збыльвӧлӧ сёрнитӧ.

Гришин йӧткыштӧс пельпомӧдыс нылӧс, быттӧ кӧсйис шуны: эн пӧ дӧзмӧдчы, уджавны колӧ, а мӧдыс, дерт, гӧгӧрвоис тайӧс ас ногыс: гатшӧн усис лым толаас, а усигкостӧйс кутчысис директорлы соскас да ас бӧрсяыс и кыскис ас вылас усътӧдз. И яндзим быттӧкӧ мукӧдсыс Гришинлы, и сэк жӧ долыд сьӧлӧм вылас. Василий Фёдорович кыкнанныслы отсаліс чеччыны да то ли збыльвӧлӧ, то ли шмонитӧгмоз содтӧс:

— Со кодъяссӧс колӧ гозъявны, а ме... — вешйис Василий

\* Чир (диал.) — чарӧм.

Фёдорович на дорысь.— Владилен Васильевич, вай кыкөн, кыкөн...— шмониттөг да ворсөмтөг и уджавны оз позь, көть тэ и учитель.

Куим лунөн и эштөдісны. Стен бердъяс, йирк-джодж, өшинь-өдзөс, куричьас — ставыс вуджис школа дорё, тшөтш и узылан наръясысь пөвъясыс — коланатор жё. Ставыс сэтшөм шыльда артмис, мый школаса директор эз кут виччысьны, кор налөн лоас видз-му асланыс да кор колхоз вөчас удж вылө договор, гижис приказ «Ичөт МТС» котыртөм йылысь.

Директор — Геннадий Политов (век жё чуктөдіс-вайөдіс техника), өкмысөд класс.

Директорөс вежысь — Владимир Романько (көть и кывзысь-төм юрыс, век жё уджалө техника дорас), көкъямысөд класс.

Главной механик — Феликс Немчинов, дасөд класс.

Трактористъяслөн бригадир — Валерий Захаров, көкъямысөд класс.

Агроном — Владимир Курыдкашин, көкъямысөд класс.

Электростанцияөн веськөдлысь — Юрий Конанов, көкъямысөд класс.

ГСМ-өн веськөдлысь — Алексей Пантелеев, өкмысөд класс.

МТС-ын «уджалысь» гижис кызь квайт морт. Мукөдыс, дерт, вермасны жё уджавны, но техника дорё сибөдны позьё сөмын найөс, коді велөдчө сійөс төдмавны.

Приказын жё директор урчитіс педсөвет нуөдан лун, кытөн и лоө вынсьөдөма «Удораса ичөт МТС» котыртөм. Педсөвет вылө лоө корөма Удораса «Ыджыд» МТС-ысь да колхозысь юрнуөдысьясөс да мукөд чина войтырөс, кодъяслы көть неуна тшукө сылөн уджыс. Таөдз накөд кызкө-мыйкө вөлі воөма өти кывйө, мый «Родина» колхоз век жё сетас налы видз-му, а МТС — ломтас-мавтас.

Вой шөрөдз пукаліс Гришин аслас кабинетын тайө приказсө гижигөн. Быдтор йылысь колө мөвпыштлыны, кор удж вылө пыртан том войтырөс, арлыдтөм йөзөс, коды законъясөн абу шуөма уджавны. Приказ гижны быттё и кокни, а уджө пыртан кабала гижигөн колө мыджсьыны закон вылө, а закон веськыда шуө — оз пө позь челядьлы уджавны. Кывкутнысө — коды? И мый на лоас аски?

Быттё туналіс асьсө Эдуард Александрович. Стөч аскинас и юөртісны, мый рытнас, кор сійө мырсис кабала гижөмөн, кык зонка доймөмаөсь гараж стрөитанінын. Верстьө уджалысьяс буретш помалөмаөсь нин да мунөмаөсь гортаныс, а ичөтджыкъяс ворсны локтөмаөсь сэтчө. Керъяс вомөн чеччалигөн буждөма кер чукөр да топөдөма өтпырысьөн нель кок. Зонкаяс куйлөны нин больничайн. Та йылысь бара жё телефон пыр юөртіс ачыс раймилицияса начальник Осипов.

— Со өд кызди артмө, дона Эдуард Александрович, — коньөртны кутіс директорөс сёрни помас Осипов. — Тэкөд көсийө төдмасьны прокурор...

Быттё сир ваён войтыштісны йөв тыра туисө. «Эз тырмы сөмын прокурор», — Гришинлы дум вылас уси суд, көн сійө неважөн вөлі кывзысьөн. Прокурор Тиранов дзик жалиттөг мы-

жаліс суд скамья вылын пукалысьсё, сылысь воддза заслугаяссё пыдди пуктытөг. Сёрнитіс прокурор сідз, быттё тайё мортыс сэтшөм нин велөдны позьтөм мыж вöчысь, кодöс нэм кежлас колö йөршитны дзескыдінö.

Сёрнитіс прокурор зэв чорыд кывъясөн, паськыд сьод син-кым пырыс видзöдывліс судьяяс вылö, быттё велөдіс найöс, кызд колö сигöртны восьтөм «делöсö», а сэсся — суд скамья вылын пукалысь вылö, сідз, быттё мөлөтөн көсийс тувъявны сійöс пукаланінас. А мыжыс мортыслөн сөмын сыын, мый сиктпомса вөр дорын суас ассьыс том гöтырсö мөд мужичöйкөд окасигөн да лöсыштас «донжуанлы» плешкас.

Суд сэки дорйыштіс мыжалөмсö, но кырымас чабыртөм кляпиксö пасйис «водзвыв дасьтысьöмөн» да сетіс сөмын öти во пукавны дзескыдінын. Доймöмыс пö лоис «көдзыд оружие» отсöгөн. Сэки Гришин юасис ассьыс: мый эськө прокурорыс вöчис, лоис кө сыкөд татшөмторыс? А том мортлөн, гашкө, став олöмыс та бöрын дзугтас...

А öнi... морöс пытшсö парсаліс тайё юöрыс Эдуард Александровичлысь. Но кытчö воштысян, быть лоö мунны: прокуроркөд шмонитны оз позь. Сылөн весиг овыс со повзбөдлана — Тиранов.

Прокурор эз чеччы пызан сайысь, кинас сөмын индіс: пуксы пö.

— Ов? Ним? Вич?— друг юаліс прокурор Эдуард Александровичлысь. Гришин сөмын на удитіс пуксыны да весиг шöйöвошліс: абу-ö тай шмонитысь тайö Тирановыс? Быттё оз тöд сійöс!

— Ов? Ним? Вич?— сідзи жö сы вылö видзөдтөг, гөлөссö вежтөг мöдысь юаліс прокурор.

— Гришин... Эдуард... Александрович...— пескыльтчөм кылыс öдва вöрис вомкөтш саяс.

— Кутшөм воö да көні чужлінныд?

— Извинитöй, Тиранов ёрт, но... тайö — допрос?

— Тöдмасьöм. Абу допрос.

— Мыйысь менö мыжаланныд?

— Колö кө тöдны, тайö вежөсас юася ме и сэсся дзик некод. И некодöс ме ог мыжав. Ме көсья тöдны. Менö сы могуль татчö пуксьöдöма. Мыжавны кутас народнöй суд. Гөгөрвоана?

— Юасьöй,— лямунліс сьөлöмыс, но пыр жö личаліс.

— Кольöм гожöмын турун пуктігөн доймис Володя Попов, сизимöд класса велөдчысь?

— Да. Но сійö уджаліс бать-мамыскöд.

— Сійö жö вöлі автомашина гусялысьяс пöвстын?

— Автомашина гусялөм эз вöv.

— Школасянь кымын лун вöлі урчитöма велөдчысьяслы уджавны колхозын?

— Мед көть гожөмбыд, каникулыс асланыс.

— Дас нель арöсаыслы?

— Дас нель арöсөн ме пыри заводö кузнечлы отсасысьсөн...

— Тайö «делöö» абу коланатор. Март дас көкъямысöд луно велөдчысьяс ветлісны ректыны машинасысь удобрение?

— Да.

— Доймис сэнi тыр арлыдтөм Нина Селиванова?

- Да, чеччөма кузовсянныс, и...
- Доймисны төрыт нёльод класса велодчысыс Игорь Палев да Василий Бугуев?
- Да, доймөмаось...
- Көні?
- Мастерскöй дорын...
- Со и нөшта на кык неминуча тiян экспериментъяслөн, директор,— пинь пырыс сёрнитiс, быттö дзуг вез кыис прокурор. Гришин көсйис на дорйысьом могысь мыйкө шуны, но прокурор эз лэдз.— Вöли-ö ыстылөма тыр арлыдтөм Геннадий Политовос Москвадз өтнассö?
- Вöли.
- Вермис-ö ськөд лоны неминуча?
- Некутшөм неминуча эз ло, мөдарө...
- Гражданин Гришин, Тi свободнöйось.

Но свобода нопсö, вөлөм, сьökыд новлөддыны. Тайö «свободаыс» көрталiс гражданин Гришинос киöдыс и кокöдыс. Прокурор ыстiс школаса директор ним вылө кабала, көнi вöли гижöма, мый некутшөм сьökыд удж вылын оз позь уджөдны тыр арлыдтөмаясöс, мөд ногөн, абу кө тырөма дас көкъямыс арös. Закон водзын кывкутны та кузя пондас ачыс директор, и сы кындзи некод.

— Мый вöчны?— юалис Гришин школаса парторглысь. Медводдзаысь парторг шуис «ог төд», и тайö шөгөдiс Гришинос. Усяс кө медбөръя пыкөд, ставыс киссяс: ковмас гижны приказ МТС-лы подув пуктөмсö дугөдөм йылысь. Но кыдзи сылөн кийс лыбас гижны татшөмтор? Тайö жö — пом. Сiдзкө, гараж лэптан уджъяс дугөдны оз позь.

Эдуард Александрович вöли гортас, кор вайисны нарсудсянь кабала: сийös корöны суд вылө. И оз свидетель пыдди, а кыдзи вочакыв кутысьös. Гөтырыс, Галина Васильевна, кодi өнөдз эз мун паныд верöсыслы восьсөн, мыйөн, позьö шуны, отсалiс сылы уджавны и пöртны олөмö ассьыс мөвпъяссö, öнi, тыдалö, сэтшöма мудзöма бөръя кадас ставсьыс, мый бөрэдзис: сьölöмыс ойдöма пактавтөдз:

- Шулi өд, шулi, бурөн тайö оз помась! Со и пом...
- Дугды, йöюк,— Эдуард Александрович эз на эскы, мый ставыс тайö дзик нин позьтөмөдз воис.— Оз мöй сэнi гөгөрвоысь йöз пукавны? Ог өд ме зептав нинөм.
- Мунам вай Удорасыс, мунам!— Галина Васильевна, карын быдмөм, некыдз эз вермы велавны овны сиктын, көн колö и пес-ватö аслыд судзөдны-вайөдны-пыртны, и пачтö лонтыны\*, и дөрөм-гачтö пеславны да ю дорын ки помось пыдзравны, а төвнас, черөн йисö кералөм бöрын, юкмöсын, йи кодзыд ваын ки гегдытөдз...— Шыбит ставсö, оз кө тэнö гөгөрвоны!

Ачыс гөтырыс эськө и гөгөрвоис быттö верössö, аддзис сылысь мывкыдлунсö и донъялис водзмöстчөмсö. Но и дөзмыны жö пондiс. Верöсыс гортсö пондiс вунөдны. Дугдiс ичөт писö детсайдö новлөддыны, а гөтырсö весиг кино видзөдны оз нуöды.

---

\* Лонтыны (диал.) — ломтыны.

Галина Васильевна радейтö кино видзöдны, но öнi ковмылö öтнaслы ветлыны клубö да и локны гортас пемыд уличаöд. Сэни нин дöзмöдчысьяс гутъяс моз сибалöны сы дорö: мыйла пö öтнад да кöнi верöсыд, да нöшта на мыйкö найöс кольмöдö школаса директор семья вöсна.

А лунъяс сайын орччöдчис МТС-са агроном Мишуров да вöзйысис кольбöдны гортöдзыс. «Кольбöд, меным гажаджык». Муныштiсны, мыйкö больгисны олöм-вылöм йылысь, и «кавалерыд» друг юалö: «Шудаöсь-ö тi, Галина Васильевна?» — «А мыйла нö тайö, Мишуров, тiянлысь сьöлöмтö йирö?» — «Мичаöсь тi, Галина Васильевна...» — «Мича кö и — шудтöм колö лоны?» — «Мöдарö, дерт... А тiян Гришиныд...» — «Мый миян Гришиныс?» — «Оз вермы, тыдалö, шудтö сетны: гажтöмöсь тi син-пельыд серти». — «Мыйла тадзи чайтанныд, Мишуров?» — «Ог ме сöмын, Галина Васильевна». — «А кодi нö эськö?» — «Гирлянди́н шуис, йöйджык пö тайö Гришиныс: быттö кутшöмкö «кулак»,— аслыс овмöс лöсьдö. Мый вылö пö Удораса МТС-ыс? Со и том гöтырсö вунöдöма пö дзикöдз — öтнaс шöйтö рытьясын». Но и ассяныс на Мишуров содтiс: «Да и кыдзи он вунöд, кор сэтшöм отсасьысь сылön: том да мичаник, бергалö Гришин гөгöр, быттö шондi — му гөгöрыс».

Кутчысис сэки Галина Васильевна, эз петкöдлы, мый сийöс дойдiсны, сöмын вочавидзис: «А шондiыс öд, Мишуров, му гөгöрыс важөн нин оз бергав, Коперниксянь нин». — «Но тыдалö тай сiдз, Галина Васильевна, и кажитчö...» — «Унатор на миянлы кажитчö, Мишуров...»

Тадзи сёрнитiгкостi воисны школа дорöдз, кытөн и олiсны Гришинъяс. А торйöдчигас Мишуров весиг кисö окыштiс Галина Васильевналысь. Аттö кутшöм кавалер шедлiс, дзик киноын кодъ. Кыдзи сэсся сьöлöмыд оз нюкыльтчы...

Рытыс вöли небыд лымъя, ульдöм көрөн öвтiс керка стенсяньыс, кытөн лун сьöмöссö дыркодъ нин пукавлiс тулыслaнь матöдчысь шондiыс. Мишуровсянь öвтiс чöскыд одеколонөн, быттö питшöгас льöм пу розъялiс, а Эдик воас, да век вылыссьыс бензин-карасин дук кылö. Куритчис кö, гашкö, табак дукуыс кöть тупкис тайö көрсö. Та дыра öтлаын олiг сийö и юлiс весиг винасö сöмын ыджыд праздникяс дырйи да ыджыд гöсьтьяскöд. А Мишуровлөн сорасьöма и вина көрыс, и табакыс, и одеколаныс, да артмöма кутшöмкö аслыспöлöс тувсов көр.

Быттö öтпырысь көповтöмөн ставыс тайö уси дум вылас, и Галина Васильевна весиг повзис, мый вермас мыйкö лёктор лоны налөн гозъякост олöмын, оз кö öдйöджык энöвтны и тайö школaсö, и сиктсö, и ставнас районсö. И медводдзаысь видiс ас кежас ставнас Удора районсö: «У-у, дыра», кöть таöдз унаысь нин кывлiс бокысь воём йöзсянь, кыдзи найö аслысногөн кеслöны Удора нимсö. Сийö тöдiс, мый сук парма шөрö дзебсьöм, паськыд ота да этша йöза Коми мулөн тайö рытив-войвыв юкöныс площадь сертиыс ыджыдджык сэтшöм государствоысь, кыдз Бельгия, и, дерт, кывъясөн увтыртöмыс тайö муыслы некыдз оз сибды...

— Видзышт синватö, водзвыв эн бырöд: ковмас, да некытысь лоö босытны,— öлöдiс гöтырсö Эдуард Александрович.— Некытчö

ми өні оғо на мунй. Та йылысь тэ вунёд и некор сэсса эн каз-  
тив. Воас кад — артыштлам...

А кадыс со абу и ылын вёлма: народнй суд эз ворсөм мо-  
гысь корлы ас дорас школаса директорös. Судьяслөн мөвпын  
эз сөмын вөв ас синмөн видзөдлыны этатшөм герой вылө, коді  
шызьөдіс и велөдчысьясös, и налысь бать-мамсö. Видзөдтö, на-  
лысь лелькуйтөм-пелькөдөм дона быдтаснысö тайö «выскачкаыс»  
сюйö няйт уджö: лякөсьтö мазутөн да соляркаа ветьökөн велөдö  
көрт мыскавны. Но садь быртөдз кыптөм «ужасыс» сыын,  
мый налысь мусаник каганысö велөдö кольччыны колхозö —  
сэтчö, кытысь найö асьныс чужъясьömөмнмоз мынтөдчисны и  
өні пукалөны шоныд кабинетъясын, кытөн куйөд дук оз кыв  
ни лөдз-ном оз претшкы\*, оз ков и пидзөсөдз лымті собавны.

Вөлі кө на эськө позянлуныс видз-мусьыс кынөмпөттö перйы-  
ны. Мөс ни бая ас карта-гидйын видзны он вермы — йөрдорса  
потшös бердысь куралөм быд турун сі кодкө быттьö лыддьöма  
да тöдмалöма: кытысь ытшкин да кымын нөб пельпом вылад  
кыскин? Локтасны колхозсянь, сельсöветсянь, а то и ачыс про-  
курор Тиранов, да синмад шуасны: тэ гусясин — туруныс тайö  
колхозлөн видз-му вылысь! А кутшөм нө видз-му вылын ми  
олам? Ас мөслы турунсö Америкаысь мөй вайны? Важөн поплы  
десятина нуим, а өні ас овмөсын весиг курөг видзны — ыджыд  
нок.

Колхозъясысь мынөм ай-мам гөгөрвоисны, мый олан ладыс  
сэні дзугсьöма, киссьö нин ставыс, вот-вот разі-пели мунас, а  
тайö карысь воөм том мортыс, тыдалö, виркös йөй\*\*: век на зі-  
льö лыаысь коромина тэчны, а комиөн кө,— сітысь гез гердны\*\*\*.

Суд зал тырөма йөзөн. Татшөм дивөй, мед суд скамья вылө  
пуксьөдісны школаса директорös, Косланын эз на вөвлы комын  
көкъямысöд восянь. Но коді нин найös помнитас? Öти-мөд,  
гашкө...

«Ме кора, мед суд залын эз вөвны велөдчысьяс»,— корис  
суд скамья вылын пукалысь Гришин. Но сылысь эз кывзыны.  
Свидетельяс пөвстын вөліны и велөдысьяс, и велөдчысьяс, но  
буретш найö, кодъяс эз отсасыны котыртны «Ичöt МТС». Сөмын  
Елизавета Ивановна пукаліс торйөн: сійö локтіс йөзкостса дор-  
йысь пыдди. Ачыс вөйыис. Эдуард Александровичлы вөлі сэ-  
тшөм яндзим, мый унджык кадсö сійö пукаліс синъяссö кы-  
рымнас тупкөмөн. Сылы кажитчис, мый сійö узьö, и ставыс та-  
йö — сьökыд вөт...

Суд муніс сёр рытөдз. Арлыдтөм челядьös уджö пыртөдөмысь,  
на пөвстысь öткымынлөн доймөмысь, закон дзутөмысь Кослан  
школаса директор Эдуард Александрович Гришинös... эз пук-  
сьөдны дзескыдінö, кызди корис прокурор. Суд помланыс ги-  
жисны сідз шусяна «частнй определение», кытөн öлөдісны,  
мый татшөмторъяс вöчны оз позь. Индісны и РОНО-өн весь-  
көддысьлы сыысь, мый сійö татшөм кывкутана удж вылын видзö  
татшөм кывкуттөм мортсö. Таөн суд төдчөдіс, мый Гришинös  
колö вештыны-чужйыны пукалан улös вывсьыс.

---

\* Претшкыны (диал.) — курчавны.

\*\* Виркös йөй (диал.) — дзик йөй.

\*\*\* Гердны (диал.) — гартны.

— А мый ме верма вöчны?— паськöдiс Гришин водзын кияссö РОНО-өн веськöдлысь Макаров, кодi коркö и ачыс вöли тайö школаса директорөн.— Законьсь вылöджык он чеччы.

— А райисполком? Панюков?— эз кöсйи сетчыны Гришин.

— А мый сийö? Законсьыс вылынджык? Законьс, дона ёрт, ставлы öткодь миян странаын. Бурджык, гиж: «Кора мездыны...»

Аскинас Эдуард Александрович воис школаö бушков кодь. Сi-йö некыдз эз вермы гөгöрвоны, кыдзи да мыйысь ставыс артмис тадзи. Кодi гөгыльтö сылы паныд пасьвартысь «телегасö»? Кодлысь туйсö сийö вуджис? Оз эскыссьы, мый тадзи вермöны вöчны школаын уджалысьяс, ныв-зонмöс олöмö пырны велöдысьяс...

— Меным тшöктöны ас вöляысь гижны шыöдчöм мездысьны удж вылысь,— бара Гришин локтiс Борис Афанасьевич дорö. Парторг эз волы суд вылö, сийö водзвыв шуис: «Ог лок...», а важ директорьс, МихНик, кыдзи шуисны сийöс велöдчысьяс, эз нин уджав, петiс пенсия вылö. Том директор мыйлакö эскис, мый сöмын тайö вöралысьыс вермас мездыны сийöс пезьдöм налькйысь.— Збыль öмöй нö Анна Михайловна кодйысьö? РОНО-кöд öтвылысь?

— Миянлы тайö абу тöдса, а ми öд абу чигантьяс, мед картiөн гадайтны... Сэсся: битөг тшын оз овлы. А сьöлыштöмөн он жö кусöд дай.— Борис Афанасьевич бура тöдiс, кутшöм матысса рöдвужөн вöлины Анна Михайловна да Макаров.

Вермисны, дерт, и найö. Кодi öнi тöдас, мый тайö эз вöв Гришин вылö налөн öтувъя водзöс мынтöм. Быдөн таöдз вöли чайтöны, мый Обрезков пыдди, кодi петiс эз сöмын аслас висьöм вöсна, директорөн пуктасны Анна Михайловнаöс. Сыысь полiсны и велöдчысьяс, и асьныс велöдысьяс, сылөн ыджыд опыт школа уджын. Кор висьлöс директор водлiс больничаö, сы улöс вылын век пукалiс Анна Михайловна, кöть аслас пызаныс сулалiс орччөн. Сiдзкö, сылы воис сьöлöм вылас лоны школаын мед-ыджыдөн да веськöдлыны школа уджөн ас ногыс.

Но РОНО-лысь директорпусö друг эз ошкыны КПСС райкомын. Борис Афанасьевичлысь сэки юалiсны: «А кодöс эськö тi кöсйинныд? Эм-ö тiян школаын морт, кодлы позис эскыны? Али бокысь вайöдны?»

«Мешöкын кань оз ньöбны»,— мöвпыштiс сэки Борис Афанасьевич. Вöли нин сэтшöмыс öти кадö. Сыктывкарсянь вайöдiсны. Владивостокийн пö уджавлöма. Олöма мужичöй, едждысь нин юрсиа, тыдовтчö культурнöйөн, интеллигентнöйөн. А директоравны босьтчис — ки-киö кутчысьöмөн кутiс велöдны ворснысьывны, мед оз котравны велöдчысьяс перемена дырйи. Документъясыс — сöмын копияяс. Регыд пö ыстасны: гöтыр-котыркöд пö торйöдчи да эг удит босьтны сьöрысь. Бöрынджык воссис: став Союз пасьта корсысьöны мортсö, мед дзескыдiнö йöртны.

Эм миян вылын ыджыдалысьяслөн сэтшöм висьöм: вайöдны овмöсөн веськöдлыны сэтшöм мортöс, мед сийöс танi некод öнöдз эз тöд. Уджсö котыртöм пыдди пасьвартас, овмöссö кисьтас — вуджодасны мöдлаö: номенклатура пö. Татшöм нöдкыв нöдöмсö Борис Афанасьевич эськö и эз кöсйи. Индiс Гришин вылö. Абу нин чус\* бритчывтöм, но абу на и тошка пöль, некымын во на

\* Чус (диал.) — дзык, ньöти.

и уджалö институт помалöм бöрын историкöн. Виддалисны на мукöдьясöс, но Эдуард Александрович лöсялис öтарсянь и мö-дарсянь. Райкомсаяслы историкъясыд мыйлакö мусаджыкöсь, вылöджык найöс пуктöны. Райкомын уджалысьяс — джынйыс вöвлöм историкъяс.

Ассьыс «протезесö» Борис Афанасьевич дорйис кызд вермис, но талунъя юöрыс падмöдiс парторгöс. Кызд сiдз: индiс райком, а вöтлöны... нарсудöн. Татшöмтор райкомтöг оз вöчсьы. Мыйкö танi абү сiдз.

— Мый лоан — ло! Плешкад оз кучкыны, а ковмас пыравны Первöй дорö. Кыкнаннымлы öтлаын. Ми жö коммунистъяс, мый тэ ныртö öшöдiн? А шыöдчöмтö гижны удитан на...— ышöдiс парторг шогö усьöм директорöс.

Эдуард Александрович эськö эз вöв ныр öшöдысьяс рöдысь, эз быд кöдзыд руысь паськавны киас чуньясыс, мед на костöд киссьыны наөн жö шедöдöмторъяслы, но та пöрийö весиг нырнас чушкис:

— Абү шуöма, тыдалö, лоны сiдз, кызди ми кöсийм.

— Медбöръя кывсö абү на шуöма. Эн ляб, мися,— скöракодь муркнитiс парторг да звöнитiс телефонөн райкомö. Приём-нойсянь юöртисны, мый Первöй абү гортас, воас сöмын вежон мысти. Вежон чöж виччысьöмыс кыссис быттö дзонь тöлысь.

Райкомса Первöй секретар Михаил Осипович Дудин весиг чайөн юктöдiс пырысьясöс. Татшöмторйыд гежöда овлöсылөн кабинетын. Пызан сайын пукалысьлөн висылöс вижоват син-пельыс, варышлөн кодь векни крука нырыс, водзлань чургöдчöм кушмöм плешка кымöс улас дзёбсьöм ичöтик синъясыс, кодъяс быттö некор эз нюмъявлыны, талун кажитчисны ыджыдджыкөн да вöлины шоныдджыкöсь. Öшиньöд мыччысьöм шондi югö-рыслөн малыштöмыс гöрдöдыштiс чужöмсö, либö сыркнитöм\* пым\*\* чайыс мыйкö сетiс, но районса медыджыд кöзяин вöли кыпыд руа, быттö выльöн на морöсас орден ляскисны.

— Да-а...— лэдзöдiс Дудин, роч морт, кыкнанныссö бура дыр кывзöм бöрын.— Наломали вы дров... Сы мында тiян öшыбкаыс: пур пуръяв кызд пуысь, пуксьöд сэтчö кыкнаннытö, да ва бöр... Педагогъяс...— сэсся быттö аслыс моз жаляддза шуыштiс:— Көркö учительö жö велöдчыли... Кор и вöли тайö... Дерт, ме абү нин педагог. Ме сiдзи аддза... Тi мунанныд вөр шөр вөрöд сöмын компас серти некутшöм картатöг.— Михаил Осипович мытшкерис да водзö сёрнитiс:— Лöсаса ордым тiянлы абү веськалöма... Но меным кажитчö, мый тi мунанныд буретш сэтчö, кытчö и колö... Дась туйыс тiянлы, дерт, оз тыдав, но шөр визыыс тiян веськыд: овны, уджавны колö босытчыны шко-ласянь. Асланым профучилище миян районын абү. А техника локтö и локтö. И колö ичöтысянь велöдны техника дорас... Тiян мог кутшöмакö дасьтыны механизаторъясöс видз-му овмöслы. Пасъя содтöдысь: ку-тшö-ма-кö. На первых порах... Вот мой сказ,— карандашөн пызан пöвийö тотшкöдiгмоз помалис сёрнисö районса медыджыд юралысь. Сийö сувтiс пызан сайсыс: сьöд,

\* Сыркнитны (диал.) — юыштны чурскöмөн.

\*\* Пым (диал.) — пöсь.

армеечлөн кодь кителя, офицерлөн кодь паськыд гөрд тасмаа, и кажитчис генералөн, кодлысь кыв вуджны оз лысьт матігö-гöрас некоді: ни судья, ни прокурор,— и вынсьöдіс бөръя кывъ-яснас, быттö шняпкис печать:— Нужно только победить. А победителей не судят.

Кык учитель öдйö гөгөрвоисны, мый сёрни помасис — позьö уджавны водзö — салдатъяс моз öдйö бергöдчисны да саялісны сьöд кучикөн кышöм öдзöс сайö.

## Кык директор

Дзикöдз нин лябмыліс Эдуард Александрович, ставсö эновттöдз воліс. Но райкомса секретарлөн кывъясыс ышöдісны и быттö бордъяс сетісны водзö видзöдöм вылö. Райком кө дор-йö, уджавны позьö на. А мытшöд тэчысьяскöд, дзуг везъяс зэвтысьяскöд ковмас на венласьны. Венласьны ковмас оз киён-паличөн, а, дерт жö, аслад вежөрөн. И тышыс лоас оз директор-лөн улöс вöсна, а школа вöсна, панöм удж вöсна. Вöралысьяс та йылысь веськыда шуöны: «Звер-пöткаыс сэки локтö тэныд воча, кор тэ найöс корсян, вöтчан на бөрся. Эновтчин кө, он нин аддзыв».

Локтан тувсов гөра-кöдза кeжлö кө оз артмы котыртны вель овмöссö колана ногөн, то и гожöмыс бара шутөвтас важ моз, некутшöм öтувъя удж оз ло ни сиктдорса муяс вылын, ни ю пöлөн нюжалöм ылыс видзъяс вылын. Вошас нöшта öти во.

«Колö эскыны аслыныс зонъяслы. Сöмын тадзи ми вермам нуöдны тувсов гөра-кöдза»,— шуис Эдуард Александрович колбöм педсöвет вылын, кытөн сёрниыс кыптіс сы йылысь, кызди котыртны школаса МТС-лысь удж. Завуч Анна Михайловна, коді эз нин вöв паныд техника велöдöмлы, чорыда тöдчöдіс, мый челядьöс öтнаныссö уджавны сійö оз лэдз. Быд трактор дорö колö индыны учительöс. Град йөр вöдитысьяслы бригадир пыдди сідзжö колö индыны велöдысьöс. Видз вылö мунысьяс-лы — кык-куимöс весиг. «Син да син колö на бөрся. А то сяс-ся быд вöсна кывкут».

Сылөн кывъясыс уналы воисны сьöлöм серти: быдтасыс вöлі пöшти бөдöнлөн, и некод на пиысь эз көсйы муса писö ли нывсö лэдзны гортись дзик дөзьöртöг. Елизавета Ивановна сідз жö гөгөрвоис: «Бригадирөн вермас лоны сöмын велöдчöм агроном: сійö тöдö, кызди ставыс быдмö град йöрын. Сылы позьö эскыны, и сэки арын позьö виччысьны бур урожай».

— А оз кө ло тадзи, ме и видз-мусö тіянлы ог сет!— ас пай пуктіс педсöветын пукалысь Курыдкашин, «Родина» колхозса юралысь. Вöвлöм боевöй офицер шенасис кияснас да зяльöдчис морöсас öшалысь медальсөн:— Гөгөрвоёй ті асьныд: школа öнöдз на нинöмтор помöдз эз вайöдды. Босътчыліс кукань дөзьö-ритны — кык-куим морт коли, вöвъяс дорö зонъяс сідзжö дугдіс-ны воыны...

— Эн-ö ачид повзёдды челядьсö, юралысь ёрт?— дорйысь-ны босътчис Елизавета Ивановна.

— Кычиши кодьсö? А доймасын кө... Коді кывкутас? Ме? Мед и менö пуксьöдасны суд скамья вылö? Ме весиг гауптвах-

таын эг пукавлы, сизим во служиті да,— венö пырис Курыдкашин. Колхозын видз-му вöдитысьыс эз нин кут кольны, но юралысь век на эскис, мый, кызд и век, отсаласны райцентрлөн уна лыда учреждениеясса инструкторъяс, инспекторъяс, бухгалтеръяс, секретаръяс да ичöтджык чина войтыр. Арся урожай босьтан «авралсö» нинöмөн на вежнысö. А школа — сійö школа и эм, сійö век жö челядь, арава, стада. Налы колö бур пастук, да мед на и киас орысөн сулаліс.

— Ми көсьям,— тöдчöдіс сэки Гришин,— котыртны колхозын витöд бригада. И тайö бригадаыс лоö — школа. Сетны сылы сё гектар гöран-кöдзан му да кыксё гектар видз — турун заптыны ас вынөн. Көть нин во-мöд-коймöд кежлö. Оз кө нинöм артмы, колхоз вермас и бөр босьтны угодысö.

— А коді, коді гöрас-кöдзас?— колхоз пред öнöдз вермис на эскыны, мый велöдчысьяс весаласны кöдза му вылысь йөн, öктасны вундöм му вылысь киссьöм шеп, но гөрны му, кöдзны, быдтыны, идравны...— Извинитöй, но, кыз шуласны, сювъясныд вöсньыд на.

Педсöвет нинöм эз вермы вöчны, мед «пычкины» колхозлысь му да видз. Ныра юралысь эз сетчы. И сылөн мунöм бöрын ставөн гызисны.

— Бюрократ!

— Колö öчап нырсö бертны.

— Миянлы оз эскы! Да школатöгыс сійö тшыгла кулас! Миянтöг нянь ни картофель оз воы йöртöдö, капуста ни сёркни му вылысь ас ки-кокөн оз локны.

Көть мый, а Эдуард Александровичöс тайö педсöветыс эз шоғöд. Медводдзаысь кыпöдöм сёрниыс öтувтис ставнысö: быдөн сувтис колхоз предлы паныд, а сідзкö, артмö — сы дор, школалөн выль могъяс дор. Тайöс позис нин лыддыны ыджыд вермöмөн.

Аскинас нин чукöртчисны найö, кодъяс гижсисны школаса МТС-ö уджалысьясөн. Кызь квайт пиысь воис кызь вит. Öтикöс кодкö век жö повзьöдіс. Дерт, Эдуард Александрович эз көсйы сöмын налы став уджсö вöчöдны. Колхозлы важөн нин отсасис став школаыс. Но тайö кызь кык зонмыс да куим нылыс вöліны медшөр выннас, и тайö котырсьыс колö бөрйыны пытшкөсса «администрация», и мед тайöс гөгөрвоис быдөн, тшöтш и колхозын. Но медясö — асьныс «механизаторъяс».

— Колис зэв нин этша кад тувсов гөра-кöдзäдз,— босьтчис сёрниö Эдуард Александрович.— Мый миянлы та вылö оз тырмы?

— Ломтас-мавтас абу тырмымөн.

— Жугалöма öти амысь...

— Ид кöдзан машина пыдди миянлы ыстöмаöсь кукуруза кöдзан... Кысь миянлы кукурузаыс?

Зонъяс гызисны. Найö тöдісны, мый колö му вöдитöм могысь. Но талун медыджыд «технарыс» налөн көсйис сёрнитны мöдтор йылысь.

— Оз тырмы миян уджалан котырлы «юр» — директор, главнöй инженер, агроном...

— Шулім тай, асьным пондам юравны...

— Асьнымсö, дерт, асьным. Но кодыкö колö мыйыськö да

мыйысь кывкутны. Со и мөвпыштлөй: коді вермас лоны миян МТС-ын директорөн?— көть и гижліс нин ачыс та йылысь приказ, но йөзсө эз и ло төдмөдлөма, да и кадыс петкөдлө, мый мөдногджык колө тайөс вөчны. Аслас мөвптыясыс та кузя веж-сисны и.— Мед став вөсна эськө кывкутіс.

— Юрий Иванович,— медводдзаөн шыасис Романько. Сійө бөръя кадө дзикөдз сирасис тайө велөдысьыс дорө: машина-тракторысь быдтор төдө и кужө сетны ассьыс төдөмлунсө мөдды. Володя эськө көйис и ачыс лоны сы кодьөн, эз кө вөв неуна ышнясьысджык да асныраджык.

— Юрий Иванович, дерт, лоас жө Сөветын. Но колө, мед тиян пөвстысь кодкө...— Гришин важөн нин видзөдіс Володя Романько бөрся. Велөдчө өдва-өдва, юр вундысь кодь. А техника дорө сибалө, агрегатъясын быд деталь төдө, ветлан-мунан правилөяс стихотворение моз велөдөма. Бөръя кадө и мукөд предметъяс кузя зэлөдчыштіс. Быдмө сійө батътөг, чой-вок на эм. Мамыс омоль быдтысь-тутысь, вайөдлө гортас юысь-кодалысь мужичөй-ясөс. Олөны өти жыръя ичөтик керкаын. Гортса удж вөчны челядьлы некөн и некор. Но велөдчөны на.

Юрий Иванович сөмын сійөс и ошкө медъёна. Сідзкө, абу шыбитана мортыс. А гашкө, дзикөдз вежсяс зонмыс, өшйөдны кө пельпом вылас татшөм кывкутанатор. Та йылысь водзджык нин юксьыліс аслас мөвпөн и аскөдыс Юрий Ивановичкөд, и Елизавета Ивановнакөд, и мукөдыскөд. Но некоді на пөвстысь эз сувт сылөн мөвпыс дор. Гришин эз вөв эськө Гришинөн, эз кө көйи ассьыс мөвптыяссө пөртны олөмө весиг йөзлөн юръяс вывті. Сійө эз пов весиг шогмытөм воськолысь. Кодсянкө кывліс төрытъя-талунъя шусьөг: «Оз сорсьывлыны некор сөмын шойна ягө дзебөмаяс да КПСС ЦК Политбюролөн членъяс». Эз видз и асьсө өшыбкайясысь. Төрыт на өтиөс көйис индыны МТС-ө ыджыднас, а талун со мөд йылысь нин мөвпалө. Мый лоас, мед лоас.

— Школаса МТС-лөн Сөветө юралысьөн ме вөзъя... Владимир Романькоөс, көкъямысөд класса велөдчысьөс.— Эдуард Александрович муртыштіс синнас пукалысьясөс и повзис — зонъяс пукалісны кын мыръяс моз. Сөмын кыкөн-куимөн нюмъя-лігтыр бергөдчисны Романьколань. А Володялөн татшөм кытшов-сьыс весиг синъясыс гөгрөсмисны. Медводдза здукас, дерт, көнкө чайтіс, мый директор шмонитө, но кор гөгөрвоис, мый тайө збыль вөййөм, пондіс педзны, быттө шеп пырис сітанас, а улыс льөбсө весиг курччис, мед эськө эз горөд ачыс «ура!». А льөбъ-ясыс сылөн кызөсь, пиньясыс гырысьсө, и позис гөгөрвоны, мый сійө жеръялөмөн сералө. Но Гришин аддзис, кызди зонмыс пөсяліс, весиг пельыс гөрдөдіс, нырыс чушнитіс, киясыс оз ад-дзыны, мый вөчны.

— Некоді абу паныд?— юалис век жө Гришин.

— А мыйла Политовөс огө?— лэптис синъяссө Валерий Курьядкашин, автомашина «гусялысь», өні медся кужысь шопер.— Либө Немчиновөс? Сылөн нин морөс пытшкас абу сьөлөм, а мотор.

— Немчинов мед механикөн лоас, мотора кө ачыс. А Политов... Со Елизавета Ивановна шуө, Политов пө агрономө көйө велөдчыны. Медводз практикасө мед тані и босьтас. Сідз ме шуа, Елизавета Ивановна?

— Агрономён позьё и Петчинаёс индыны,— звук кезлө шө-йөвошліс нывъясөс уджө велөдысь, но гөгөрвоис, мый директор водзвыв нин ставсө мөвпыштөма да сылы паныд сувтөмысь гос абү, сетчөмөн содтіс:— Мед и сідз лоө.

Сэсся некод сёрнитны эз кёсйы. Вомгоруланыс коть неуна мыйкө броткыштисны, паныд эз сувтны и мукөд нимъяслы, кодъясөс Советө вөзйис ачыс школаса директор.

Тадзи Удораса «ичөт» МТС-лөн Советө Романько кындзи вөлі бөрийөма нөшта квайтөс: механик — Феликс Немчинов, агроном — Геннадий Политов, старшөй тракторист — Валерий Захаров, складөн веськөддысь — Алексей Пантелеев, электро-станцияөн веськөддысь — Юрий Конанов, главнөй инженер — Юрий Иванович, велөдысь.

Быд велөдчысь водзө, коді кёсйис и водзө уджавны «ичөт» МТС-ын, вөлі сувтөдөма мог — бура велөдчыны да бура жө и кутны асьсө школаын, гортын и ывлаын; лоны сюсьөн видз-му овмөс кыпөдөмын; велөдны видз-му овмөс наукаяслысь подув; бура уджавны; велөдны техника да агрегатъяс; быдлаын кутны төд вылын, мый найө уджалөны Удораса «ичөт» МТС-ын.

Быдөн, кодөс босьтісны уджавны МТС-ө, торъяліс мукөд велөдчысысысь сыөн, мый сылы позьё вөлі велөдны трактор, автомобиль, мотоцикл, а та кузя экзамен сдایتөм бөрын — новлөддыны найөс да уджавны на вылын. Та кузя өти кыв лои аддзөма и ГАИ-көд.

Бумага вылын ставсө лои лөсьөдөма, весиг КОБ — сикт-гөгөрсә муяс вылын уджалөм могысь колхозлы отсаян бригада, кытчө гижсисны нөшта квайтымын вит нывка да зонка витөд-сянь дасөд классөдз. Эз вөв корсьөма вочакыв сөмын өти юалөм вылө: көні уджавны? Му ни видз колхоз сетны оз тэрмась. Колхозөн юралысь ни правлениеө пырысьяс ньөти эз вөвны паныд, мед велөдчысыяс отсасисны колхозлы. Но лэдзны котыртны сідз шусяна «Витөд бригада» — колхозлөн аслас нель — некодлөн ки эз лыб, коть кызди ставсө эз ошкы налы школаса директор. Вензылысны ёнакодь колхоз правлениелөн өти заседание вылын... Сэсся мөдын и коймөдын... А өтчид и звөнитө колхозөн юралысь Гришинлы:

— Эдуард Александрович, ноко, пырав тэ ме дорө став араванад.

— Кутшөм араваён?— эз гөгөрво Гришин. Сылөн «араваыс», ставнас кө, вывті ыджыд, мед төрөдны колхоз правление вежөсө.

— Директорыд төрыт пыраліс,— төдчөдіс Курыдкашин, и некутшөм нюмсер эз төдчы сылөн сёрниын.

— Менө вештісны директорсьыс али мый нин?— век на оз гөгөрво Эдуард Александрович.— Эг тай на кывлы-а,— весиг сьөлөмыс ёкмуніс: сылы эз на юөртны, а колхоз пред мыйкө сэтшөмтор төдө... Сійө өд райисполкомын тшөкыда пукалө. Дорйыны быттө и дорйис райкомса секретар, а трудовөй книжкаад өд райисполкомлөн индөд серти гижөдтө вермасны вөчны быд-пөлөс юралысьлы.

— Романькотө ме шуа. Директорөн тай сійөс индөмныд, ичөт директорөн. Төрыт локтіс правление вылө да ставнымлысь сьөлөмнымөс вөрзьөдіс.

— Романько?— сөмын и шуыштис Эдуард Александрович.

Вёлмкё, Володя Романько пырёма колхозса юралысь дорё, а сэні буретш правление чукөртчёма, тувсов гёра-көдза кежлө дасьтысьом йылысь сёрнитёны. Володя уджаліс колхозын школаөдз на: коркё ытшкысян вөвъясөс войколөн вердчөдө, коркө агсасьö, коркө куйөд петкөдалö муяс вылө — ас морт колхозын. И кор сійö корис кыв, некод эз чайт, мый сылөн «сезонной отсасысь» чиныс лыбёма «директор» нимөдз.

— Ме бура кывзі правлениелысь вензьёмсö,— сувтіс да повтёма пондіс сёрнитны Володя.— Тыйыв гөгөр ыбъясын дас гектар му кольём во сулаліс гөртөм-көдзтөм. Талун тані тыдовтчис, мый и таво оз ло петкөдёма куйөд тайö муяс вылө. Кыдзи Кослан школаса «ичөт» МТС-лөн директор, ме кора сетны тайö муяссö мянлы. Көть нин öти во кежлө. Ми сэтчö садитам картопель. Асьным быдтам, коканөн мудъям, асьным и идралам. «Ичөт» МТС нимсянь ме верма кырымавны договор...

Бура и гажөдіс төрытъя куйөд петкөдалысь, «шыж бедь», аслас талунъя «директор» нимнас. Синва петтөдз сералісны öткымынөн. Колхоз, дерт, эз өдөбсьы кырымавны договор Романькокод, но правление вылын шызылісны ставөн — быттьö узьомысь садьмисны. Эз серав сөмын колхозса вөвлөм юралысь Гаврил Як, коді том дырйиыс веськавлёма Питерö да венö кыпөдчөм йөзкөд тшөтш босьтёма Зимной, арестуйтёма Керенскийлысь Временной правительствосö.

— Дас квайт арөсөн ме командуйті пулемётной взводөн, дас көкъямысөн менö, комбедөн веськөдлысьясысь öтиөс, белöйяс арестуйтісны да нуөдісны Иоканьга дівывса тюрьмаö... А ми сералам асланым пиян вылын сыысь, мый найö көсийны асьныс уджавны, ас видз-му вылын... Кымын арөс тэныд, Володя?

— Дас квайт,— быдса во содтіс директор.

— Со өд... Ме думысь, председатель ёрт,— шыөдчис сійö колхоз пред дорё, коді фронт вылө муніс дас сизимөн жö да кызь арөсөн нин воис гортас капитанлөн погонъясөн, командуйтіс ротаөн, а дженъыдик кад весиг батальонөн,— эскыны колö томъяслы. Коді сэсся мян бöрын коляс?

Гаврил Як дыркодь предавліс колхозын, война кадсö помөдз дай водзö на эськө пöрысьлун вылө эз видзөд, эз кө неминуца су. Нелямын сизимөд воын көрым эз ло, скөтсö лыскөн вердісны — кулавны пондіс мөс и вөв, бая и порсь. Таысь и мыждісны мортсö да Човйөдз ытісны. Кык во мысти воис, да эськө и бөр корлісны йөзыс предö пуксьыны, но райком эз лэдз: партиясьыс өд вöлі вөтлөма. Правлениеö век жö бөрйисны, а сэсся и ревизионной комиссияөн юрнуөдіс, быд көпейка колхозлысь лыддис, төв бөр эз лэдз койыштны.

Выль пред вöлі көть и верөб да варов кыла, и аккордеоннад, мый вайёма Германияысь, ворсіс силосуйтчысьяслы, век жö эз вөв ас сиктса. Вөвлөм боевой капитан пырис райкомлөн номенклатураö: некымын юрнуөдан чин сетлісны нин таөдз. А кор партия чукөстіс бурджык йөзөс ыстыны видз-му овмөс кыпөдөм могысь, «рекомендуйтісны» председателён «Родина» колхозö.

Омоль веськөдысьөн выль юралысьсö оз позь шуны, но видз-му вөдитөм йылысь, кыдзи тыдовтчис, нинөм эз төд, көть и уджавлёма колхозын том дырйиыс. Веськөдлыны пондыліс кыдзи армияын: шуёма — вөч. А колхозад өд абу сөмын кывнад уджа-

лөмүд тыдалана. Правлениеё бөрйөм войтыр кыз позис от-салісны кыв вылас тэрыб да вывтіджык крут юралысьлы. И медся уна туйдан-велөдан төлка нарадсө сетіс, дерт, Гаврил Як. Кывзысис председатель и өні.

И со бара чукөртчисны колхоз правлениелөн кантораё шко-ласа директор, колхозса председатель да кык МТС-са дирек-торъяс. Удораса «ыджыд» МТС-ыс директор Декабрист Алек-сандрович Гирляндин — роч морт, да сёрниыс муніс рочөн. Ра-йонын Гирляндинон овмөсыс вөлі ыджыд вынөн. Сэки колхозъ-ясын аслас техника эз на вөв. Став гөра-көдза, идрасян, нуан-ваян уджсө колхозлы вөчис МТС. Колхоз эськө и сетө школалы дас гектар му да сө ветымын гектар видз. Мед, колө кө налы, уджаласны пионеръяс. Но өд тайө видз-муыс пырө «ыджыд» МТС-лөн вогөгөрся планө. Кыдзи артавны уджсө, мед и премия вылө петны?

— Як же так, товариш дэрэктор,— Гирляндин уджавлөма Украинаын, да чайтө Романькоос, коді өнөдз чөв оліс, сэтчөсөн жө.— Твои хлопцы, я нэ маюсь, запрацують ти гектары. Що же мени казаты своим хлопцам? Гиде они будут працоваты?

— Прочие работы?— эз гөгөрво Гирляндиныс бөръя кывсө Романько.— У нас двадцать пять звено организован. Так, Эдуард Александрович?— корис отсөг вылө ассьыс директорсө.

— Та ж ты не хохол,— серамыс петіс Декабрист Александровичлөн.— А я думал...— и ставөн пондісны серавны.

— Батыс кыскө сэтысь вөлөма,— гөрдөдіс коми «хохол».— А ме косланса да...

Гажөдчыштөм бөрын Эдуард Александрович татшөм серпас восьтіс видз-мулөн көзяинъяс водзө: «ичөт» МТС лоас «ыджы-дыслөн» торъя бригадаөн. Ломтас-мавтас да удждон сетас Гир-ляндинон овмөс, а школалөн — техника да уджалысь кияса вын.

Мыйтакө вензыштөм бөрын век жө лои кырымалөма договор: школа гөрас да көдзас дас гектар вылын аныкытш сора зөр, пуктас вит гектар вылын картофель, заптас сө тонна турун, петкөдас муяс вылө нельсө тонна куйөд. Идравны картофельсө ковмас кыксө центнерөн быд гектар вылысь.

— Ог төд, Эдуард Александрович,— договорсө лыддьөм бөрын зумыштчис Елизавета Ивановна.— Вермам-ө сө тонна турун? Та-йө видзясылөн джынйыс лыаөн пузувтөма, а мөд джынйыс — нитш улын. Уналаөд баддьөн пырзьөма. Кольөм во сэтысь сөмын көкъямысдас тонна заптісны,— гожөмнас Елизавета Ивановна ачыс коса-литовкаөн ытшкысис и куртіс турунсө, да бура төдіс видзсө.

Гришин асьсө лыддис повтөмөн да мудерөн, но өні гөгөрвоис, мый колхозөн веськөдлысь наяна көповтіс сійөс: медся лёк видзсө торйөдөма. Но, кыз шуласны, киссьөм ватө он курышт. Кутшөм доддьө вөйысин, сэтчө и сөв, ыджыд туйын оз бөр-йысьны.

— Нинөм, Елизавета Ивановна,— удж кузя ёртсө и асьсө бурөдіс Гришин.— Мый вермам, сійөс и вөчам, ог кутөй лябны. Сетісны видз-му — со көн медыджыд вермөмыс.

— А кодөс көсьян индыны сэтчө учительяс пөвстысь?

— Көсья ачим... Но и Юрий Иванович. Сылөн кийн техникайс.

— А ме сәні ичотсянь... Быд бадь кост тōда.

— Но тэнад жō сикт, Елизавета Ивановна,— «сикт» нимөн пондїсны шуны ставсō, мый колō вōлі вōчны велōдчысяслы гортсянь ветлōмөн. А Вомын видз — комын сайō километр ыл-наын, и челядь мунасны сэтчō тōлысь кежлō.

Елизавета Ивановна сэтшōма кōсийс эськō ṡтлаын колявны кадсō Эдуард Александровичкōд. Ныв сьōлōмō пырис мыйкō сэтшōмтор, кодї век тшōктїс мōвпавны тайō морт йывсьыс. И пыр аддзис помка, мед аддзыны мыйкō омōльтор сылөн гōтырлōн олōмысь: «бара кулōмлōн кодь чужōмыс, пудраṡн небзьōдōма да», «рака поз кодь юрсинас классō пырō, яндзимыс абу», «полōкалō кодь лōма тайō платтьōнас». А ṡтчыд пырис урок бōрын учительскōйō да серамсорōн гораа юṡртїс: «Галина Васильев-налōн быдтасьясыс гижōны «картопель», «моркоф», «горок»... Урок джын вошис, мед велōдны, кыдзи колō гижны.. А ме ṡд абу «язычка», мед сы пыдди роч кыв да литература велōдны».

— Нинōм лēкыс эз ло, Елизавета Ивановна,— дорйис коллегасō Владилен Васильевич. Сїйō, дерт, вōлі жō неуна мыжа сыысь, мыйла тадзи гижōны ṡткымын коми ныв-зон, кодьяслōн ай-мам сērниын «ф» да «х» шыясыс ṡнōдз эз кывсьывыны. Галина Васильевна кылїс, мый век жō эм кодкō сїйōс дорйысь, да эз вермы чōв овны:

— Елизавета Ивановна, тэ жō ачыд шуан: «шарп», «ков-та»...— сїйō став кучикнас кылїс, мыйла тайō том мича нылыс катгысьō сы вылō, но йōз дырйиыс эз кōсийы петкōдлыны ас-сьыс вежōгтōмсō.— Йōз синмысь кокни и жуг аддзыны, кор ассьыд быдса кер он аддзы.

Галина Васильевна вōлі роч, кōть и сылысь сērнисō автор вайōдō комион. Но рочыслōн ṡд абу быдлаын ṡткодь шуанногыс. Вōлі и сылөн сērниын ай-мамсяньыс кывлōм шыясылōн ко-лясыс. Буретш тайō пинь кеслїгōныс Галина Васильевна ṡшинь пыр аддзис верōссō велōдчысяс чукōрысь. Найō учителяскōд ветлїсны МТС-ō, мед пыдїсяньджык тōдмасыны механизаторъ-яслōн уджōн да сērмыштїсны. Шудысла, мый некод пыдди оз ковмы мунны урок вылō мōд классō, Галина Васильевна горōдїс: «Едутъ! Едутъ!» Тайōс кылōм бōрын Елизавета Ивановна ваксьō-мōн серōктїс, а вомгорулас броткыштїс: «Кыдзи позьō велōдны роч кыв, кор ачыс велōдысьыс дзугō роч кывсō?» Но серавлōмыс рикошетōн инмис и ṡткымын мукōдды.

— Тырмас!— кōрт гōлōсōн помалїс учительскōйысь гажсō Анна Михайловна, кодї пызан пасьгала вольсалōм ватман весь-тын вежлалїс урокьяслысь расписание. Нокыс вōлі буретш сыын, мый колō корсьны, кодї вермас вежны Гирлянди́нлōн овмōсысь сērмысь учителяссō.— Гōрдлōны, морт ног уджавны оз сетны. Елизавета Ивановна бōръя кадō гын песысь гындей кодь: ставсō дзугō. А юрас сōмын картопель да капуста...

— А ме ṡд агроном и эм,— крапкис-вочавидзис Елизавета Ивановна. Сїйōс и збыль, биологыс абу да, корōмōн корисны МТС-ысь школаō биолог пыдди.

— Сїйō и тōдчō...— Анна Михайловна эз кōсийыв лēк кыв шуны некодлы, торйōн нин том велōдысьяслы. Но шуис, эз и тōдды. Школалōн «производство» дорō ныр-нырō матыстчōмыс

ёна кутіс дōзмōдны завучōс, школаса директорōс вежысьōс. Дерт, сійō аддзис, мый ныв-зон эз кутны кольччыны сиктѣясō, и гōгōрвоис, мый колō матōдны школаōс колхоз дорō, но медся пыдын оліс мōд мōвп: школа эм школа, абү профтехучилище. Быттѣ кык пельō юксис Анна Михайловна, сы вōсна лоис нōшта дōзмысьōн, зырксьысьōн.

Татшōм кык пōлōс лолыс овмōдчисōні иōткымын мукōд велōдысьлōн морōс пытшкō. Эз быдōн овны выль директорлōн мōвпѣясōн. Сы вылōōд колō вōлі содтōд уджавны. И унджык уджсьыс некутшōм содтōд дон некод оз мынты. Быдōн-ō сы вылō сьōлōмсō сетас...

## Турун пуктысьяслōн быдлунся пасйōдѣясысь

Июль 1—9 лунѣяс. Дасьтысям мунны видз вылō. Олам школаын. Уджалам школабердса муяс вылын. Мыйсюрō вōчам. Зэрō.

Июль 10 лун. Кор нō сэсся мōдōдчам?! Век зэрō.

Июль 11 лун. Ур-ра! Дутдіс зэрны. Талун мōдōдчам Вомынō. Миянōс комын верст кымын Мозын катыд нуōдас «Чуб» самоходнōй баржа. Ставōн долыдōсь, быдōн кōсйō уджавны. Миянōс кольōдōны велōдысьяс и найō, кодѣяс кольōны сиктса бригадаō. Локтисны и МТС-са директор да колхозса юралысь. Найō мыйлакō шогōсь. Тыдалō, оз эскыны. Но видзōдлам, гашкō, и нюмѣвтласны на. Стōч дас нель часын «Чуб» вōрзьōдчис Кослан берегысь.

А мича жō нин гōгōр! Мозын юным сэтшōм небыда миянōс гычōдō\*. Со нин Тыйыв бōрвыланым, кык керкаа пōчинок. Гашкō, татысянь и пансьыліс коркō Косланыс? Яг нōрыс горулас Мозынō усьō Улыс Йиридз, ком чериа ю. Ю вомыс туруна, нюдз дѣяса, сиктса войтырлōн вутрасяніныс. Ме эськō сōмын татчō и пуктī ассѣым керкаōс... А со и Кослан ты вис вом. Татчō унаысь жō воывлім вутрасьны. Нōштаōти лыа кодѣж — а сēні нин Важъю. Ыдѣйд курѣя моз пырō тыкōлаыс шуйгавылō видзьяслань. Курѣя йылас усьō Вев Йиридз ю. Важъюын кыйсьō став Косланыс. А чери оз и бырлы.ōтар-мōдарас — видзьяс. Татчō удитōмаōсь нин воны страдуйтысьяс: сулалōны пыжѣяс.

Ваыс сēльōдчō баржа нырсянь, ачыс баржаыс увгō. Бōрō кольōны Пырас, Рōнōв, Вōрдī, Сюзя — важ йōзōн нимтōм видзьяс сьōктōмаōсь турунōн, зэр мыськōма-пожѣялōма став сьōд нѣйтсō. Дзоридз, дзоридз, дзоридз — быттѣōвтōны юрнаныс миянлы. Копрасьō миянлы и юдорса бадѣ. И пуяслōн йывѣясыс чолōмалōны... Нывѣяс горōдісны сывны, зонѣяс отсалōны. Ставōн долыдōсь, кыпыдōсь...

Вомын ластаō тшуким дас кōкѣямыс часын. Медводз ытшким турун пусянін улō да лагер сувтанінын. Пыр жō кутім зэвтны палаткаяс, лōсьōдīm пусянін, коса-нарман видзанін — дасьтīm оланін. Водалīm сērōн нин, пōтōса ужын бōрын.

Июль 12 лун. Водз асывсянь мунісны ытшкысьны, кодī кужō литовка коса кутны кийн. Кужтōмаясly индōма эштōдны лагєрын помавтōм удѣясь.

\* Гычōдны (диал.) — качайтны.

Сёрнитчим пусьсысьяс йылысь. Миянӧс кутасны вердны кык сменаӧн Надя Пантелеева, Вера Донцова да кык Нина, Попова да Коровина. Налы отсӧг выль би видзысьӧн быд лун лоӧ ӧти зонка. Вӧла машинасьӧн ытшкысьясӧн индӓм Володя Мамонтовӧс, Лёша Политовӧс, Борис Захаровӧс. Трактор вылын — директор да главнӧй механик.

Мед бурджыка котыртны удж, олӧм, шойчӧм, бӧрйим быд палаткаӧ ассьыс ыджыдӧс. Найӧ жӧ котыртӧны пусянінын сьӧрсьӧн-бӧрсьӧн уджалӧм, пес ваялӧм, би видзӧм. Став вылас — лагерса комендант Юрий Иванович. Вынсьӧдӓм татшӧм оланпас: чеччыны пусьсысьяслы — квайт часын, мукӧдыслы — кӧкъямысын; рытнас, ужын бӧрын, ӧтувъя ворсӧмъяс, вуграсьӧм да вой шӧр узян кадӧдз — кодӓ мый кӧсьӧ. Вывтӓ сӧрӧдз овны шуим ӧтвылысь. Ми ӧд эг курортӧ войӓ. Мед ас пайысь быдӧн ас ног олыштас — сытӧг оз позь.

Июль 13 лун. Лунтыр ытшкысим. Ныв-зон пӧвстысь джынйыс оз кужны ытшкысьны литовка косаӧн. Со тэныд и сиктын олысьяс. Тӧдчӧ, мый унджыкыс — абу колхозник семьяысь. Сэсся тыдовтчис: и литовкаясыс оз тырмыны быдӧнлы. Ми комын квайтӧнӧсь, а косаыс — кызь.

Июль 14 лун. Пуктӓм куим зорӧд турун. Медводдза зорӧдъяс! А кужам тай на и зорӧдасьны. Чайтам, оз киссьыны тӧлӧдзыс.

Июль 15 лун. Поводдяыс бурмис, и уджалан кадсӧ ковмис вежлалыштны, мед ставлы вӧлӓ кокныдджык: лун шӧр шондыс сэтшӧма пӧжис, мый джумйӧ сунлытӧг позис унмовсьны видз шӧрас, а купайтчӧм бӧрын бара позьӧ вӧлӓ уджавны сьӧлӧмсянь.

Лагерӧ волісны ыджыд гӧсьтъяс: райкомса первой секретар да «ыджыд» МТС-са директор. Сёрнитӓгӧн сиисны бур удж да гажа шойчӧм. Быттӧ содтисны вын: уджыс та бӧрын лои гаж пыдди.

Июль 16 лун. Воис Эдуард Александрович! Вайис сӧян-юан. Тӧдмасис миян олӧмӧн да ёнакодъ жугыльмис. «Колӧ бурджыка котыртны шойчӧм,— шуис сійӧ.— Купайтчанинын колӧ, мед быть кодкӧ видзӧдӓс мукӧд бӧрся: мед эськӧ некод эз пӧдтысь, ставӧн мед колисны дзоньвидзаӧн». Индӓм видзӧдысьясӧс.

Но и лун! Бӧрынджык сэтшӧм ыджыд гӧсьт воис — Коми АССР-са Верховнӧй Сӧветлӧн Президиумысь Юралысь. Сыкӧд — колхозӧн веськӧдлысь. Тӧдмасисны, юасисны, кыдзи уджалам, кыдзи шойччам? Сиисны быд поэяна бурсӧ.

Июль 17 лун. Ударнӧй удж талун: миян тшӧт вылын комын зорӧд турун, тайӧ кызь нель тонна гӧгӧр. Ставсӧ ытшкӧма комын гектар, куртӧма кызь гектар вылысь. Юрий Иванович лыддис колхозса юралысьсянь письмӧ: водзмӧстчысьясӧс, асьсӧ бура петкӧдлысьясӧс лоӧ содтӧд донъялӧма.

Июль 18 лун. Бара воис школаса директор. Вайис сӧян-юан. Лагерса санитарӧн индӓм Нючевӧс да Пони Панюковӧс, кодӧс колис татчӧ батъыс: сиктын пӧ эштӧма сылӧн уджыс, татчӧ кӧсьӧ.

Июль 19 лун. Эдуард Александрович тшӧтш уджаліс: чӧвтӓс зорӧд. Ставнымӧс снимайтӓс аслас фотоапаратӧн.

Июль 20 лун. Лӧдзим медводдза газет: «Тревога!» Куртысьяслӧн вошис вӧв. Вит зонкалӧн лун джын вошис корсигас. Чайтӓм, ош чашкӧдліс, а вӧлӧмкӧ, гортас мӧдӧдчӧма да сибдӧма

домоднас. Цынгин да Политов, көть и абу дзик мыжаось, водисны узыны нюждом нырьясон. На вылын сералисны ёртьясыс.

Июль 21 лун. Кыморьяс локтоны. Польшитис ыркыд ру. Рытланьыс рытивывсянь гым-гым кылис.

Июль 22 лун. Зэрö. Ытшкысьны ни куртны. Унджыкыс вуграсьоны: чериыс шедоджык зэригас. Кодкө лыддысьö, кодкө шахматон ворсö. Эмось и узысьяс, унджыкыс нывъяс.

Кыйсьысьяс вайисны куим ыджыд сир: шедöма кыснанö. Лёша Политов адзылöма көчпиös, но кутны абу вермöма. Сапöгöй пö ыджыд, да эг су.

Пони Панюковлы воöма юрас «идея» — кыпöдны татчö керка, кытчö төрас эськө комын сайö узысь.

Июль 23 лун. Бара Косланысь катöдисны сёян-юан. Но и вердоны, быттö тшöгöдоны! Но и ми кужам тай лупсуйтны. Пажын дырйи свежöй юкваон рушку дундис, а дугöдчыны ог вермöй. Сэтшöм чöскыд, мый нöшта колö и колö! Кытчö и төрö. Колö, гашкө, кодöскө чери кыйны индыны, мед пыр чери лоис пызан вылын...

Воис киномеханик, видзöдiм кино «Мартын в облаках». Ми быттö качлiм жö кыморьясöдзыс. Кино видзöдны волiсны суседьяс, ю сайын уджалысь Буткан школасаяс. Кинолы экрансö öшöдiм вөр бердас дзик, көн пемыдджык. Тайö рытыс Вомынын вöлi праздникон! Лэдзим «Сигнал» да «Молния» газетьяс.

Июль 24 лун. Талун ытшким турун «асланым» вöвлы. Миян школалон эм вöv. Сы отсöгөн пес кыскалöны да мукöд уджьяс овмöсын вöчöны. Уджалiм сiдзи, мый вунöдлiм и пажын йылысь. А кор казялiм, мый кыморьяс чукөртчисны да бöрддзисны, видзым эштöма нин. Ёна и радlм.

Öтувъя собрание вылын шуим вештыны трактор вылысь Романькоös да индыны сiйös пусьысьяслы сойтысьон\*. Эдуард Александрович, тыдалö, сорсис, кор индiс сiйös «ичот» директорөн. Лагерын уджалан да олан пöрадок, кыз и безопасностьлон техникалысь правилöяс, торкавны некодлы абу сетöма право. Но ми — комсомолечьяс. Миянлы ставон öткодöсь.

Польшитис вой төв. Войнас руалöма, лысва кисьтöма. Палаткасыны йöжгылясьны пондiм, но няргысьыс абу. Рытнас видзöдiм кино «Когда мы были молодыми». Да, коркө и ми вöлiм томось!

Вой төв ни футбол оз падмöдны чери кыйысьясös. Ефремов, Ванеев да Цынгин быд рыт кыйöны чери да вайöны öтувъя пöртйö.

Июль 25 лун. Поводдя бурмыны пондiс: öвтö лун төв. Ытшким-куртiм кыз сöмын вермим. Бара волiсны Эдуард Александрович да Иван Михайлович. Гöсьтьяс чöсмасисны ком чери юкваон, ошкисны, кыпöдисны лов, сетiсны сьölöм эштöдны Вомын видз. Ыджыд вöлöма. Кöсйим кызь лунон помавны, а со — эз артмы. Бур кө лоö поводдяыс, вежон на ковмас мырсьыны. Эдуард Александрович шуис, мый уджавны колö эштöдтöдз, а öткымынön гажтöмтчöмаось нин бать-мамсьыныс, гортаныс вöзйысьöны.

Июль 26 лун. Бара пышйöмаось вövъяс: орöдчöмаось кыкөн нин. Тыдалö, дöзмöмаось лöдз-ном да геб понда, а гашкө, дышмöмаось — мöдöдчöмаось сиктлань. Тöдöны тай, кодарлань колö

\* Сойтысь (диал.) — отсасьысь.

мунны. Комын километр сайынось өд. Политов шуө: «Турунсö өд төвнас асьныс кыскалöны, кыдзи оз тöдны». Но тыдовтчис: пышйöны сöмын томджыкъяс, а кодi кыскасьö төвнас, некод гождя уджысь оз энöвты.

Юрий Иванович висьталiс лöмтор йылысь: Косланын öти морт дöзмас аслас торксьöм руа каньсьыс, сюяс нопйö да пыжөн катöдас Вомынöдз. Начкыны аслас кийс оз лыб да лэдзас вöрас: мед пö зьверъяс босьтасны. Тöлысь мысти каньыд бөр воас гортас: укшальччöма, раммöма. Та бöрын гортас некор ни некытөн абу лякöсьтöма, кутöма вöзйысьны ывлаö.

Мöвпалö-ö зьверыс? А пемöсыс? Пон тай узигас кокнас вöрöдö, быттö котöртö, увтöмөн вöтасьлö...

Кымын зорöд сувтöдiм, а уджыслы помыс оз на тыдав. Видз гөгöрын лыдтöм тыкöлаясын уна чöж пиянасьöма. Арланыс борд ывлөдз воасны.

Июль 27 лун. Войнас трактористъяс помалiсны ытшкыны Азя лыа дiн. Мамонтовöс, Захаровöс да Политовöс «Молния» газетын чолöмалiсны школа да колхоз нимсянь. Лои ытшкöма кöкъямысдас нель гектар!

Асывнас Юрий Иванович казялöма: Нина Попова сыркъялöмөн бöрдö. Вöлöмкö, нывъяс видздор баддысь важөн нин казялöмаось лэбач поз. Зонъяслы эз висьтавны, мед оз жуглыны. А талун локтiсны — кык чужöм лэбачпиыс ловтöм кольöмаось. Сыысь и синва кисьтöны. «А пиянсö кианыд босьтiнныд, кор медводдзаысь аддзинныд?» — юалiс Юрий Иванович. «Да», — вочавидзис Нина. «Йöюкъяс», — сöмын и шуис налы Юрий Иванович, а рытнас лыддис дзонь лекция, мыйла оз позь вöрзбöдны позйысь лэбачпиöс, медся нин сырчиклысь. Сырчиклөн нырысыс быд көр тöдö, и кылас кө, мый морт босьтöма киас кольк либö пиянсö, чайтö, мый позйыс абу аслас, да энöвтö позсö. Но тадзи оз быд лэбач вöчлыв, сы вöсна кöкъяс тöдöны, кодлы позъяс позьö кольны ассьыныс колькъяссö. Со кыдзи овлö вöр-ваас...

Луннас писö аддзöдлыны кежавлiс кыйсянiнысь Ванеевлөн батыс. Сылы юөр ыстöмаось: дона пиыс дышмöма ытшкысянкуртан уджысь. Но Юрий Иванович раммöдiс тöждысьысь батыöс, мый ставыс нин бöрын: пиыс бөр босьтчис уджö. Кокныд сьöлөмөн батыс Ванеевлөн лэччас пыж дорас. И друг бөр каяс, видчыны кутас: «Кытчö дзебинныд?» Көть став лагерсö пасьвартас. Пыжсьыс пö сылысь черисö «лагерникъяс» гусялöмаось. Кык сир пö катiгас кыснаналiс да пыж бöжас и кольiс, сөдзтысьöм ва пиас. Лэччас, а сиръясыд — абуось.

Юрий Иванович öлөдö, миян пö асланым чериыс тырмымөн, а сэсся и ачыс лэччас пыж дорö. Сиръясыс, вöлөм, пыж горулас куйлöны, пыж дорышсö бöжнаныс малалöны. Тыдалö, сямныс тырмöма чеччыштны пыжсьыс, а уйнысö ляпкыд ваөд джуджыдiнас вынныс бырöма. Серав көть бöрд сэсся. Ванеев-бать яндзимысла оз тöд, мый и шуны. Шыбитас берегö сиръяссö, пуйй пö, ачыс сöлас пыжö да йöткысяс ю шөрланыс.

Механизаторъяс вуджисны Гойты вис керасö. Колины бөръя гектаръяс. Ставсö лои пуктöма сё дас квайт зорöд, кöкъямысдас гөгөр тонна. План серти колö унджык.

Луныс талун нюжалiс. Быдөн көсийö ворсны волейболөн, а сöмын на кино помасис. «Кино» Петя луннас уджалö миянкöд

тшөтш, ачыс неважөн на помавлёма косланса школа. Юрий Иванович оз дзескөд режим чорзьөдөмөн, дась и ачыс ворсыштны. Сөмын пö «подъём» кывсö асывнас мед кылінныд и кокъяс-öдныд мед эз ковмы кыскавны палаткаысь. А миянлы тайö и колö. Быттö некод абу и мудзлёма. Пусьысьяс шогалöны: сёян-юан бырö. Рыгнас пö сөмын рок да компот.

Рытланыс поводдя пондiс повзьöдчыны. Рытив төвсянь пивъялис\*, гыма-чарда вирдалөмөн енэжыс уськөдчис мулань.

Июль 28 лун. Юкисны куим пельö. Петя дядькөд öти юкөн мунiс помавны Азя лыа дор, мөд звено Илля дядькөд Гойты вис эштöдö. Коймөд — заптö турун школалы конюк Вася дядькөд. Ас вынөн-сямөн көтö ми и ошйысям, тайö куим дядьыстöг нинөм на оз артмы. Найö — миян батъяс, велöдысьяс. Налөн эм юр вежөр, төдöмлун, сям да кужанлун, миянлөн эм вын да том кикок — зорöдыд и артмö.

Олам на! Воисны пыжөн кык завхоз: школаса да интернатса. Вайöдiсны сёян-юан: нянь, сов, йöв, вый, чай-сакар... Сөмын уджав!

Июль 29 лун. Колхозса бригадир да комсомолечьяслөн Сöвет öтвылысь кывзiсны звеноргъясöс: кодi кызди уджалiс. Быд боксянь виддалөм бöрын лои шуöма быдөнлысь уджö пырöдчöмсö, пайсö донъявны коэффициент серти. Медся бура уджалысьлы, кодi сьöкыд удж вылын, сетiсны 0,9. Нывъяс — кокныдджык удж вылын, налы лои 0,5. Но эз быдөн пукты сямсö да вынсö öтмоза, кодлыкö усисны ичöтджык коэффициентъяс: уджысь и дон, миян абу на коммунизм.

Колхоз примитiс турун став Вомын гөгöрса видзьяс вылысь, и артмёма ылöсас öкмысдас квайт тонна. Но примиттöм на колiс Гойты бок. Гашкö, ставнас и сё тонна лоас. План эм!

«Отбой» бара сёрмыштiс.

Июль 30 лун. Узим пöттöдз. «Подъём» — öкмысын. Та дыра эгö на узылöй. Танi олам медбөръя лун. Пажынöдз колö эштöдны ставсö, мый коли на видз вылын зорöдавтöг. Колö и чукöртны да бөр сетны колхозлы уджалан кипель: коса, нарман — став инструментсö, мый эм.

Лэдзим «Вомынлөн том вын» газетлысь медбөръя номер. Сэни ставөн лыддисны: «Удораса «ичöt» МТС-лөн Сöвет юöртö кывкöртöд — помасис медводдза... и медбөръя экзамен. Миянлы кутасны эскыны!»

## Бөркыв пыдди

Удора районса «Виль туйöд» газет 1984 вося октябрь 30-öд лунö йöзöдö «Овны велöдö удж» гижöд. Сэни лыддям:

*«Школаын ныв-зонмöс угж горö велöдöмыслөн медыджык могыс сыын, мед чужтыны угж горö муслун да уджалысь йöзöс пыдди пуктöм. Кызди радейтöны уджавны Косланса шөр школаын, петкөдлiс витöд четверть. Школаса уджалан бригада сизим гектар вылын быгтiс картофель да кык гектар вылын нуөдiсны велöдчан опытяс, сё гектар вылысь пуктiсны турун. Гырысь классьясса велöдчысьясöс вöлi шымыртöма уджалан*

\* Пив (диал.) — сьöд кымөр. Пивъявны — кымөртчыны.

отрядö. Сігзжö быдтісны граг выв пуктасъяс, торъя культураяс  
вылын нуöдісны опытъяс. Тайö отсаліс налы согтыны ассъыныс  
тöдöмлунъяс. Съöкыг вöлі тулыснас. Муыс мян сёйöд, а зэръяс  
дыр эз вöвны. Быдтасъяссö ковмис ёна киськавны, косьмöм рö-  
сада пыдди муö суйны вильöс. Сэсся ковмис нетшкыны йöн  
турун да мудйыны. Унаöн уджалісны съöлöмсянь. Сігз, көкъямы-  
сöд классаяс Алексей да Василий Бугуевъяс, Иван Ельцов, Дима  
Ширяев, Наташа Фокина, Ира Пигулина, Надя Ванеева, Саша  
Жганов кутчысьöны быд уджö, көн коланаöсь налөн киясыс.

Нывъяс, когъяс велöдöны школаын пемöс вигзöмлысь подувъ-  
яс, уджалісны фермаясын: дас вит ныв вежисны дояркаясöс  
отпуск кадö. Квайтымын лунысь дыргжык уджалісны фермаын  
Галя Ульянова, Наташа Халдина, Оля Минина, Лиля Митина,  
Лена Ременная. А Валя Логинова гожöм чöж вигзис комын  
куканьöс. Валя Аврамова Косланса фермаын вöлі лаборантöн,  
вигзöдіс йöвлөн качество бöрся.

Школа Вомынын турун пуктісны кызь кык ныв да зон. Найö  
дасьтісны сё дас сизим тонна турун да сэк жö бура шойччисны.  
Удж дорö муслун петкөдісны Костя Емушев, Юра Андреев,  
Андрей Егоров, Серёжа Нючев, Марина Зиновьева, Марина Вы-  
соких да мукöд. Унаöн тöдмалісны öтувъя уджлысь вынсö да  
сямсö, велöдчисны гөгöрвоны öта-мöднысö.

Удж мичмөдö мортсö. Сöмын удж пыр позьö велöдны быд-  
мысь гражданалысь олöм вылö вигзöдглассö.

Д. Букина,  
Кослан шөр школаса велöдысь».



Алёна СТАРЦЕВА



## Сьолөм тэнö төдіс...

КЫВБУРЪЯС

\* \* \*

Сы кадö ме нин дзикöдз вунöдлі, мый позьö  
И вöртас сайö пышйывлыны забор розьöд,  
И войтва тёпкөм улö чиктыны выль лунлы,  
И лэбачьяскöд чолөм шонді-мамлы нуны.

И весиг печенчаөн льякөссьөм ныр-вомөн,  
Быд пöрйö кывны асьтö мичаөн да томөн...  
Мен олөмыслөн йөлöгаыс лолам иніс,  
Кор ассьым шудөс төрыт шуи тэнад нимөн.

\* \* \*

Кор видз выв дзоридз мыччин серамсорөн  
Да лабич вылын пукалыштны корин,  
Сэк гөгөрвои: сьолөм тэнö төдіс...  
И кызкө öти здукөн лэдзис сьöдыс,  
И кызкө öти здукөн тыртис шоньд.  
Ме юасьлі, а вермө-ö сідз лоны,  
Мый мортыс пыр-пыр лои медся матыс,  
И йитöдсö оз чышкы весиг кадыс,  
И йитöдсö оз орöд весиг туйыс?  
А тэрыб төвру юалөмөс нуис  
И ылі муын ветлö мөвпнас тайөн,  
Мед вочакывсö ачyd коркө ваян.

\* \* \*

Ме тэныд гижa: «Чолөм! Кызди олан?»  
Мед панны кадсö личöдана сёрни.

---

А кӧнкӧ пыдын йӧршитчӧма полӧм,  
Мый талунъясӧ кутны дзикӧдз сӧрми.  
Но воча висьтасьӧмыд важкодъ мелі,  
И тӧнсьыд гӧлӧс ясыда сӧсь кыла  
Да эска — метӧг ӧткӧнсӧ он велав,  
А аскиаыс ваяс: «Олан-вылан!»

\* \* \*

Миян костын нюръяс, тыяс, юяс,  
Вӧрзӧдлытӧм оль да паськыд эрд,  
Ляпкыдик да багатыр кодъ пуяс...  
Миян костын туйыс — лыдтӧм берд\*.

Коді меным сымда вынсӧ сетас,  
Медым вуджны эта мыйта лун?  
Аски асыв тӧныд воча пета...  
Аддзысям кӧ, эн нин сӧсся мун.

\* \* \*

Лысва войтъяс ӧкта тусьӧн-тусьӧн,  
Кыа наысь сыръя дора чышъян.  
Вылам плавга — пӧртча еджыд юсьӧ,  
Дзодзӧг туйӧд йӧзысь бокӧ пышъя.

Сьӧд вӧр шӧрысь корся гуся ӧзын,  
Лӧдзӧм юрӧн юсь лун-лун вуджа:  
Помтӧг синъя, кытчӧдз сӧн, ва лӧзас  
Тэнад ӧтка мыгӧрыд оз вуджӧрт.

\* \* \*

Тэ локтін, сідзкӧ, ставыс лоас бур.  
А тӧдан, кильчӧ помад кыптысь тола  
Ме воысь воӧ разӧднысь волі,  
Мед корсьны, кольӧм здукным оз-ӧ сюр.

И ӧні топыд сывъяд чужис вын,  
Мый верма сывдны ӧтпырйӧ став лымсӧ.  
Но нем ог шу, а ловтӧ сӧмын кывза,  
Ӧд тайӧ здукас тӧрӧ олӧм джын.

❖ ❖ ❖

---

\* Берд — дӧра кузьта, нӧль сыв, кӧкъямыс гӧгӧр метр.

## Из вылө из\*

РОМАН

### Көкъямысод глава

1

Йöзыдлөн муслуныс, вöлөмкө, вежласьö. Талун тэнö дасьöсь ки вылас новлөддыны, а аски, пон чукöрын омöлик понйöс моз, вермасны пурны. Россияса Верховной Сöвет лыйлөм бöрын ягдорсаяс видзöдiсны Игнатов вылө кöдзыдпырысь. Унаөн чиктылiсны, син сайын шуасисны: «Уськöдiсны, сiдз тэныд и колö!»

Мортыд эськö казялiс ас дорас йöзлысь кöдзалөмсö, но чöv олiс. Эз лөксö виччысь, а весьшөрö. Колö вöлi мыйкö сэтшöмöс вöчны, медем йöзсö бөр асланыс бергöдны.

И водзынджык эз ёна думыштлы, кор колис ас пыдди Регина Андреевна Швановаöс. Эз чуймы, кор Шванова дзик пыр кöсйысис да ньöтчыд эз норасьлы кывзысьтöмъяс да вина юысьяс вылө. Игнатовлы эськö сюсьджыка видзöддыны сылань, но бара эз казяв, кутшöм грöз директорлы вайö выль вежысьыс.

Шванова сибöдiс, кыскис ас дорас директорлысь шоперсö, Петыр Веняöс. Ас борд улас шымыртiс бригадиръясöс, профкомса выль председатель Марфа Карповнаöс, ассъыс рöднясö. А рöдняыс ыджыд, овмöсын унаөн уджалiсны трактористъясөн да шоперъясөн. Пуктiс ас водзас мог — пöртны олөмö гуся кöсйöмсö: совхоз подув вылын вöчны колхоз да вöтлыны Игнатовöс. Паськöдiс сиктын директор йылысь лөк сёрни: сийö пö тiянысь сьöмтö гусявлö, ассъыс лавкаяс восьталöма. Ньöбалö долларъяс да акцияс. Дзик та понда удждонтö оз содты совхозсалы.

Ас дор мунысь йöзсö Шванова чукöртлiс гусьөн, водзвыв индöм местаын. Директор дор сулалысьясöс эз сибöдды. Чукöртчигөн быд пöрийö казытыштлис йöзлы: вомтö пö калич сайын кутöй. Медем кадысь водз Игнатов эз тöдмав налысь кöсйöмсö.

Петыр Веня машинаын пукалiс чöла. Нинöм эз висътавлы Игнатовлы, некодöс эз удты. Телепит, но виччысис, асьсö мырдöналiс. Öтчыд эськö заводитлiс, вомсö восьтлiс нин, но Игнатов падмöдiс. Тшöктiс сувтлыны да пырис гаражö. «Не судьба», — рочыштлис ас кежас Веня да сэсся эз нин ыршась нинöм висътавлны...

Точкисны 1994 во заводитчöм. Вывьлося праздникяс колины бөрö.

---

\* Журнал вариант. Заводитчöмыс тавояс 1-5-öд номеръясын.

---

Вежон шёрас Шванова пырис Игнатов дорё, корис машина карё лэччывны: эм пё мог минсельхозё да управлениеё воыны. Вося планъяс кузя пё колё мыйсюрё стёчмодны. Игнатов сетіс ассыс машинасё да бара нинём эз казяв. А кыdzi казялан? Сійё эз виччысь лёксё и эз тёд, мый мыш саяс вёчсё.

Сёрён Игнатовлы кывсис: Шванова лэччылёма видз-му овмёс сёвмодан управлениеса начальник дорё. Сэк жё сёрнитёма районса выль юрнуодысь Дмитрий Яковлевичкөд. Кыкнанныс благословитёмаось овмёсын вежсёмъяс.

Төвшорса 16 лунё директор жырйё бара пырис Шванова.

— Аски ми чукөртчам залё. Лоё колхоз котыртём-лөсьбөдём кузя конференция. Кывзам тшөтш и тэнсьыд отчёт.

— Мы-ый?!— чуймис Игнатов.

— Мый кывлінныд. Чукөртчам 11 час лунын.

Андрей Васильевичлы тайё юёрыс лои дзик виччысьтөмторйөн, весиг шай-паймунлі. Өтарё-мөдарё гоз-мөдысь вожмаліс жырсё. Сэсся чукөстіс секретарёс.

— Тэ төдан вөлі конференция йывсьыс?

— Талун сөмын төдмалі.

— Сідзкө, гусьён ноксьёны.

— Да, кор ме пыравла Регина Андреевна жырйё, сы дорын бөръя кадё кодкө да кодкө век пукалө. Аддзасны менё да став сёрниис ланьтлө. Кытчөдз ог пет, вом оз восьтылыны. Шванова, мый юала, висьталас, и та вылын пыралёмыс помасьлө.

— Ну, ну,— зумыштчис Игнатов.

Игнатов кольбөдіс синнас жырйысь петысь секретарёс. Сэсся пыр жё звөнитіс райисполкомё. Ыджыдыс телепон трубкасё эз босыт: оз пё эшты. Видз-му овмёс управлениеса начальник лэдзчысис төдтём улё. Игнатов гөгөрвоис, мый районса чинаяс оз уськөдчыны сійёс дорйыны. Налы сійё горшө тасасьём лы кодъ, кодёс колё перйыны да шыбитны.

Водзджык нин, кор бөръяысь ветліс Москваё, казявліс чинаяслысь сы вылө кодзыд видзөдлассё. Сьөлөмнас кыліс кутшөмкө шог матыстчөм, но некыз эз гөгөрво, мый майшөдлө. Верховной Сөветөс лыйлөм мысти и чужис тайё майшасьёмыс. Өд сы бөрын уджалан жыръяс дугдісны триньгыны телефонъяс. Асьсё сійёс эз жё тэрмасьны йитны мукөдкөд. Төдса телефонистка гусьён шөппнитіс: воис пё та кузя торъя индөд. А өні со мый көсйёны ськөд вөчны. Отчёт корёны, гашкө, вөтлыны көсйёны да?

Урчитөм кадё совхоз кантораё чукөртчисны йөз. Воисны минсельхозысь кадръяс кузя начальник да районса видз-му овмёс кузя управлениеён веськөддысь Мальцев. Локтысьяс пырисны Шванова дорё. Ськөд сёрни бөрын сөмын петкөдчылісны Игнатовлы. Та серти тыдовтчис, чина йөз бергөдчисны сылы мышкөн.

Конференция восьтіс Шванова. Лыддьөдліс кымын делегат локтіс да водзё сёрнисё нүөдны корис парткомса вөвлөм секретар Геннадий Королёвөс.

Игнатов өні сөмын төдмаліс, мый парткомса вөвлөм секретар, кодёс сійё коркө тойыштіс сельсөветса предө, тшөтш жё пырө «переворотчикъяс» котырө, налөн веськөдлан штабө.

Королёв сетіс кыв Швановалы. Шванова сёрнитіс минут дас. Сысянь Игнатов ас йывсьыс кыліс сэтшөмторъяс, мый весиг думыштылыны эз куж.

Игнатов пö быд мыжысь грöзитчö вöтлыны, йöзысь гусьон заводитіс озырмöдчыны. Öнiя олöмлы пö оз лöсявны татшöм веськöдлысьяс. Кор унджык совхоз подулын котырталісны асшöр овмöсьяс, колхозъяс, Игнатов сувтö талы паныд. Оланпасыс та кузя во нин куйлö сы пызан йöрын. А сувтö паныд, мед эськö ассъяс местасö эз вошты.

Андрей Васильевич гөгөрвоис, мый залын унджык пукалысь-ыс видзöдö сы былö, кыз морт былö, коді пырö бокöвöй, налы паныд мунысь котырö. Лöглун да вежалöм шымыртіс налысь морöс пытшö сыысь, мый Игнатов талун мыйöнкö торъялö наысь, татчö чукöртчöмаясысь. Öнi найö прöстö на видзöдöны сы былö синкым увсянь, а ёна кö скöрмасны, вермасны и уськöдчыны сы былö да косявлыны, кыззи овлö пон чукöрын, кор веськалö сэтчö тöдтöм пон. Игнатов кыліс асьсö буретш тадзи, и кор сетісны сылы кыв, сувтіс зумыш чужöмөн.

— Ті коранныд, медым ме висътаси аслам удж йылысь. Ме ннöм эг дзеб. Менам ставыс ки пыдöс вылын моз. Тiяны оз кажитчы, мый ме стрöг, чорыда юася лёк уджысь, удж вылын кодалöмысь. Ме кö вöлі некытчö туйтöм веськöдлысьöн,— водзö сёрнитіс Игнатов:— овмöсыд эськö быд во эз босът уна сикас награда. Эз эськö козынавны миянöс премиясьöн да виль автобусъясöн. Ті он тöдöй, кыззи мукöд овмöсын олöны сьöмтöг. Ас кадö босътанныд удждон. А став тайö зыксö кыпöдöны Шванова, вöвлöм секретар да найö, кодъясöс коркö дойдсьылöма. Öнi зiльöны водзöс босътны.

Игнатов пуксис. Сы бöрын кутісны сувтавны öти бöрся мöд да кабала вылысь лыддьыны, кутшöм мыж лои вöчöма директорөн. Сідз, полеводства бригадир Кызьюрова шуис:

— Ме ог шу, мый директор оз тöд ассъяс уджсö, оз пессьы овмöс понда. Но сійö восьтöма ассъяс лавка да вузасьö. А мыйла сöмын некымын специалисткöд лавкасö восьтіс? А эз совхозсянь? Кöсйö лоны аллигархөн?! Тайö öмöй абу мыж?!

— А машинасö? Виль машина ньöбис,— заводитіс главнöй инженер Чеусов.— А важсö вузаліс бокö. Гашкö, кодкö ас йöз эськö босътісны. Нöшта менö кöсйис удж вылысь вöтлыны.

— А тэнö тöдан мыйысь кöсйисны вöтлыны?— шыясис места вывсянь главнöй бухгалтер Пименова.— Во джын эн вермы лöсьöдны шнек, медым вагонысь öтруб ректыны. Орчча овмöсьясын важөн сэтшöмнас вöдитчöны. Этша рöскөдөн вагонысь комбикормсö ректöны. А миян дас да унджык морт лэччöны карö. Ваннаясьöн, рушку выланыс комбикормсö кыскалöны, сөвтöны машина кузолас. Да и мукöдторсö вöчны тэ он уськöдчы, плешкыд оз пот. Пуксьöмыд аслад жырйö да ныр розытö лукъян. Абу инженер кодь!

— Дорйысьсö тшöтш вöтлыны!— горөдіс Сандрö Коль.— А то кор вола сьöм удждыны, пыр жö öдзöс былö индö: тöкаритан пö! Юа кö, ог тэнад зептысь, тэнсьыд этша босътан! Вöтлыны, öнi миян власьтыс!

— Ёртъяс,— шыясис парткомса вöвлöм секретар Королёв.— Игнатов, кыз овмöс кутысь, бур, вензыны он вермы. А донъявны кö кыз мортöс, кутшöм сійö? Аслыс стрöитіс кирпичысь керка, сэсся приватизируйтіс, а главнöй инженерлы приватизируйтны лои суд пыр.

— Геннадий Прокопьевич,— ээ терпит Игнатов.— Эн бала-мутит йöзсö. Ме керкасö кыпöдi бөръяөн, кор чередыс помасис, и приватизируйтi эг öтнам. Чеусовысь öтдор ставныс ас ки улö босьтiсны, а сылы эськö и öнi эг сет. Оз сулав сы дон. Тэ менö дивитан, а ачyd пенсия выlö петны лöсьöдчöмyд, а мый олöм чöжyд вöчин? Гач сiтантö парткомын да сельсöветын зыртiн. Сельсöветса воддза веськöдлысьыс мыйта стрöйтöдiс. Школаса интернат, мастерскöй сылөн зильöмөн кыпалiсны, а тэ помысь ни öти стрöйба эз мыччысь. Час, колхозö вуджанныд да, кымын выль керка лöö! Ме думысь, öтиыс оз артмы. А эсйö,— индiс Шванова выlö,— бузасö кыпöдiс сы понда, медым аслыс пуксьыны юравны да ассьыс зепсö тыртны, завидь сылы!

— Сөрöм, тайö поклөп, мыжтöг мыжалöм!— ёся горöдiс Шванова.— Ме предавнысö кöсья сöмын заводитiгас! Уджавны кутам да мöдöс бөръям. Тэнö, тшукысь, овмöсö ог босьтöй, а босьтам кö, сöмын ывласа быдсикас удж вöчны, зырийөн да черён!

— Пасибö и та вылын!— Игнатов чеччылис нин, кöсйис петны залсьыс, но кылис бөръя радсянныс чилöстöм да пуксис.

Чилысьыс — пölös чужöма Петыр Наста — олiс нель жырья дас кык патераа пу керкаын.

— Аслыс кирпичысь керка кыпöдiс, а меным? Ме кöсья жö торйөн кирпича керкаын овны. Мый нö кöть öнi ме ог уджав. Мужикöй ки пöвсö совхозын лыс шыригөн воштiс.

— Код юрөн,— кылис зал помсянь.

— Но и мый, кодi оз ю? Висьтав!— Наста скöрысь видзöдлiс бөрвыlö.— Чипан оз кудзась, и то юö! Пуксьöмyд да пиньтö жерйöдлан! Ме кöсья, мед вöли колхоз, а преднас бөръя Регина Григорьевнаöс!

Петыр Наста гөгöртiс синнас пукалысьясöс. Казялис, кыдзи Шванова чуьнас индiс кабала выlö да довкнитiс юрнас.

— А-а, час лыддä,— перйис водзвыв лöсьöдöм гижöдсö да сорласиг кутiс лыддöддыны Игнатовлысь чукöрмöм мыжъяссö.

Игнатов эз кут кывзыны, öвтыштiс кинас да петiс залсьыс. Пырис аслас жырьö, мöдiс виччысьны конференция помсö. Сйö гөгöрвоис, Швановаөн бөрйöм йöз гөлöсуйтасны колхоз котыртöм вöсна, а преднас быть лöö Шванова. Эз прöстö шулы бухгалтерыс: лавка восьтöмас пö тшöтш колiс кыскыны Регина Андреевнасö. Завидьтысь баба, да и рöдняыс сиктын уна.

Миян сиктса олысьяслөн юр вемыс оз суйöрсайсалөн моз уджав. Нэмсö вöлины завидьтысьясөн. Оз терпитны, кодкö кö наысь торъяlö, олö бурджыка.

Игнатов эз кут тайöс тöд вылын, эз кывзы бухгалтерсö, кор восьтiс ашшöр вузасянин. Кöть лавкаыс абу ас вылас, но йöзыс, а медясö Шванова, öдйö тай чуткисны. Вунöдiс, кыдзи ёна водзджык, таdzi жö, кыдзи öнi сйöс вöтлöны, сиктсöветсаяс заводитiсны кулачитны пöльсö да пöчсö. Сöмын пöчыслөн збойлуныс да лада-сяма сёрнитöмыс мездiс найöс каторгаысь. Игнатов гөгöрвоис нин — эз сяммы сйö йöз сьölöмöдз ас кывйөн воöдчыны. Сыысь йöз öвтыштчисны. Öнi сиктсаяс эскöны Регина Швановалы.

Дыр, тыдалö, Швановаыд лöсьöдчöма Игнатовöс путкыльтны. Чукöртöма став няйтсö, мый вермас лоны. Игнатов бура помнитö: кор эштiс пывсян стрöйтöмыс да медводдзаысь ломтiс сйöс, а

сэсса гозъя лэччисны пывсыны, ичотик пывсян өшиньын кодкө вуджортис.

— Видзөдлы өшиняс,— тувкнитис гөтырыс.

Збылысь, серөдөм стеклөын тыдаліс кодлөнкө чужөм мыгө-рыс. Эз ясыда, но тыдыштис. Игнатов пырысь-пыр көшөн гумов-тис пөртйысь пось ва да гусьоникөн петіс ывлаө. Ывлаыс рөмыд нин, да эз төд мышкөн копыртчөм мужичөйөс. Игнатов дыр эз думайт, койыштис пось васө кыйөдчысьлы пельпом вылас. Кыйөд-чысь ойөстис да өдйө весасис-пышйис. А мөд луннас Ласей Он-тип Микулай ветлөма бурдөдчанінө: голя вылас пө пось чайник путкыльтчөма. Артмө, мый и тані Швановалөн кок туйыс төдчө. Сэки нин сійө заводитөма чукөртны Игнатов вылө став няйтсө. Өд Микулайыс сылы матысса рөдня жө...

Игнатовлысь шог думъяссө торкис клопайтөм шы. Кыліс, кызди Шванова аттөбаліс предө бөрийөмысь. Регыд коридорын кутісны ызгыны.

Директор жырйө пырисны минсельхозса да управлениеса чинаяс.

— Лөсьөдчөмаөсь,— пыригмоз шыасис минсельхозсаыс.— Өти бөрся мөд сөрнитөны. И кабала вылө гижалөмаөсь. Пимено-ваөс шуисны вөтлыны: мыйла пө өтвылысь директоркөд сөрнитө. А кыз сөрнитны? Шөр бухгалтерлы да директорлы өтсөгласөн и колө уджавны. Ерөмакань!

— Мый кутам вөчны?— Мальцев видзөдліс Игнатов вылө.

— Сдайта овмөссө. Ме ог шашаритчы тайө улөсас,— индіс мый вылын пукалө.— Кабалаяссө дасьтөй да кырымала. Шванова овмөссө төдө, ёна кытшлавны оз ков. Эг эськө и заводит кытш-лавны, көть и эз төд. Сылы телепит татчө пуксьыны. Та понда татшөм бузасө кыпөдіс-дасьтис.

— Ельцин депутатысь чөвтис, а талун удж вылысь вөтлісны,— Мальцев наяна нюмдіс, виччысис мый шуасны минсельхозсаыс да ачыс Игнатов, но найө чөв олісны.

Андрей чеччис улөс вылысь да босьтчис пасьтасьны.

— Кор лоө дась кабалаясыд, юөртанныд,— петігас нин бер-гөдчыліс Мальцевлань.

Ывлаыс заводитөма рөмдыны. Та кадө Игнатов кытшовтлө мөс картаяс. Буретш лысьтысьысыяс воалөны. Өні сійө сэтчө оз мун. Нинөмла, чөвтисны уджысь, чөвтисны! Андрейлы тайө лои виччысьтөмторйөн. Гашкө, ачыс мыжа да? Ачыс ассьыс юасис, но мыжсө эз аддзы. Сійө, кызди чайтис, оліс мывкыда. Сылы аслас уджысь некод водзын абу яндзим, а мый кодсюрөөс тод-мышкавліс овмөсысь, тайө збыль. Но та дырйи йөз водзын на-йөс эз янөдды. Кодъяскө мунлісны ас окота серти, мөд оланін аддзисны. Зоотехник пө муніс. Да, муніс, но муніс эз директор понда, а пышйис юысь мужик дорысь. И нинөмла ставсө өтилаө суклявны-гудравны.

Рытнас Игнатовлы звөнитлісны карсянь. Төдсаяс кывлөмаөсь Ягдорын власьт вежөм йылысь да тшөктөны прокурор дорө шыасьны. Мый шыасьөмыс сетас-ваяс? Думайтис, думайтис да и пуксис гижны, корис туясьны, кутшөм мыж эм сылөн, кутшөм оланпас торкис. Тшөтш корис видлавны, эз-ө дзутны оланпассө колхоз котыртігөн. Бөръясө сідз нин пасйис. Ачыс гөгөрвоис: бөрө бергөдчыны некод оз лэдз. Юрсиктын да карын благөс-

лөвитісны колхоз котыртөмсö. Та понда и збоялö Швановаыс. А парткомса вöвлөм секретарыс, Королёвыс, кутшөм?! Водзöс босьтис! Оз пö здоровайтчы. Кутшөм здоровайтчөм? Гусьон, шпанаяс моз вöчисны ставсö да...

Парткомса коркöя секретар Королёв конференция бöрын газетö письмö мөдөдöма. Корреспондентыс ассыс пасйөд вöчöма да «Лов вылын быттö пöжар бöрын» ним улын сетöма гижөдсö. Нöшта содтöма, мый Игнатов шыөдчöма прокуратураö.

Газетыс Ягдорö воис да öткымынъяс, кодъяс конференция вылын медся гора горзисны да дивитчисны, Игнатовкөд паныдасигөн первойөн здоровайтчисны. Гашкö, чайтисны, мый бөр ставыс важас бергөдчас? «Гуга-банаяс!»,— зывöка вашмунли Игнатов.

Прокурор дорö шыөдчөм нинөм эз вай. Вочакывйын гижöма-öсь, мый Игнатов уджалігас некутшөм оланпас эз торк. Колхозсö котыртисны оланпас вылö мыджсьöмөн.

Овмөссö Шванова киö сетөм бöрын, мөд луннас жö, Ягдорö локтис Петров Иван Максимович.

— Молодеч,— кантораö пыригмоз мыччис кисö Регина Андреевналы.— Сяммин вöтлыны. Правильнö, а то ме местаö нырсö суйис, пуксис дась овмөсö. Ме тайö овмөссö мыйта лөсьöді!

— Öнi ме танi.

— Тэ мөд делö. Ме локтi велöдыштны, мыйсянь заводитны, кутшөмсюрö сөвет сета.

— Пөрччысь либö, чайник Машалы тшöкта пуктыны. Румка на верма кисьтны.

— Давай,— Петров пөрччис вывсьыс пасьсö да шыбитис öдзöс-дорса улöс вылö.

## 2

Игнатов котыртис кресьянскöй овмөс. Сиктсянь неылысь суд пыр босьтис гектар му, сэтчö тулыснас лөсьöдчис пуктыны картупель. Кöйдыснас могмөдісны закарсиктсаяс. Найö жö сетисны куйөд. Сэки Игнатовлөн аслас «Нива» автомашина кыңдзи некутшөм техника эз вөв. Кад воис мусö гөрны. Коді гөрас? Шванова стрöга öлөдіс механизаторъясöс: кодкö кö лысытас Игнатовлы гөрны му, овмөсысь пыр жö вөтласны! Таын предлы отсасисны рөдняыс да бригадиръяс, кодъяс сійöс вайөдісны власьт бердö. Игнатовлысь быд воськов найö кыйөдісны, удтылісны предлы. Весиг звөниталисны Игнатовлы гортас, телефон пыр гөлөссö вежөмөн, грөзитчисны пакöсьт вöчны, керкасö сотны.

— Звөнитчöй, звөнитчöй. Мед повзяс да усйысяс Ягдорсьыс. Синмөс менсьым вежö, видзöдны ог вермы,— гусьон велөдіс Шванова ассыс рөдвужсö.— А то кодсюрö сыөн дзумйөдлөны: Игнатов пö тайö уджсö бурджыка эськö котыртис.

Андрей татшөм звөнитчөмъяс бöрад шогö усылі. «Ставныс нин Ягдорсаяс сылы паныд мунöны. Медся лөк мортнас лои. Көть ывлаас эн пет. Тулыс ныр улын, а мусö некод кö оз гөр, кушөн вермас гожиыны. Сэсся бөр мырддясны, шуасны: оз пö сяммы ашöр овмөс нуөдны». Татшөм думъяс сійöс сөйөмөн сөйисны.

Юалис Прокö Толялысь.

— Гөрыштан он? Рытнас кө гөран, Швановаыд оз и төдлы, мынтыся өд.

— Чөв, кыйөдчöны тэ бөрся да. Кая кө му вылас, пыр и уд-тасны да вөтласны колхозсыс. Төлун на Швановаыс грөзитчис.

Код дорö матыстчыны, кодлысь юавны? Игнатов эз төд, сю-рас-ө смел мортыс. Закарсиктсаясöс корлыны али мый? Думайтис, думайтис да шыөдчис школаын труд велöдысь Василий Петрович дорö. Школаын вöли трактор и гөр. Игнатов ачыс на школаас уджалігөн лöсьöдліс. Петрович эз повзы, пыр жö көс-йысис. Кайисны кыкөн му вылө. Муртса заводитисны гөрны, «уазикөн» локтіс Шванова. Петіс кабинасыс, сувтөдіс тракторсö.

— Тэ мыйла сылы мусö гөран?!

— Корис, и гөра. Муыс өд сылөн.

— Ме шулі, мед некод Игнатовлы эз лысыт гөрны! Тэ өд сик-тын олан, он кө менсым кывзы, кутан тшөкыда бөрвылад гонь-явны!

— Тэ меным кутшөм тшөктысь? Мун да колхозад ыршась, локтöма да грөзитчö!

Матыстчис Игнатов.

— Эн кывзы талысь, гөр.

— Ог лэдз!— Шванова сувтіс трактор водзö.

— Вешйы, а то гөрбад сета! Ог видзөд, мый нывбаба!

— О-о-ог!

— Вешйы, мися, курва!

— Курвасыд öтветитан!— Шванова аддзис Игнатовлысь зыр-нас öвтыштöмсö да уйкнитіс колхозса «уазиклань».

— Будьте прокляты тэ и тэнад «путчистьясыд»! Ыдждысянь-ыс медся ичөтөдзыс! Енмыс кө эм, мед накажитас! Абу ылөдз мунöмыд Петыр Павелсыд. Сійö предалігас вөтлысьöма жö йөз бөрся. Весиг картофель керигөн вөлөм оз лэдз печенча пöжавны. Аслас сьод уж вылын локтö вөлөм да печенчаа бикурсö вöвнас талялө. Тэ сыысь абу ылын. Менö скөрөн коркө шулін, а вот тэ, баба улысь, лёк көин кодь!— Игнатов карснитöмөн сьовзис.

Преддөн грөзитчöмысь Василий Петрович эз повзы. Сійö шур-шар пуксис трактор кабинаö да водзö гөрис.

Мöд луннас Ларисакöд вöли лöсьөдчöны пуктысьны. Дзурк-нитіс-воссис öдзöс. Иван пиыс армияысь воис. Кутчысьлісны, пызан сайö пуксисны, сэки и висьталіс батыс Ягдорын лöм-торъяс йылысь. Иван зумыштчис. Сылөн чим сьод синкымыс шензьөдана вөрзыліс, быттö мортыс мый вылө кө ёна дивуйтчö. А мугов синмас югнитліс мыйкө сэтшөмтор, кодöс водзын батыс эз казявлы. Та дырйи бандзиб öтар-мөдарас мыччысьлісны ма-мыслөн кодь жö ичөтик чутъяс. Том зонлөн мича чужөм вылын петкөдчис дөзмөм.

— Да-а,— нюжөдіс сійö да чорыда шуис.— Эн шогсьы, бать, ставыс лючки лөö!

Иван босьтіс водка тыра стопкасö да öтпырйö пөрөдіс вомас. Игнатов чуймөмөн видзөдліс пи вылас, но нинөм эз шу. Сöмын пызан сайысь чеччигөн нурбыльтіс:

— Аски көсьям картофель пуктыны.

— Пуктам. Мед кө быдсяма Швановаясыс юртөм петукъяс

моз чеччалöны. Пуктам и урожай босьтам! Йöртны көсйöны, оз артмы!— стопкасö выльысь тыртігмоз Иван такöдіс батьсö.

Асывнас куимöн мöдісны му выlö. Нель лун пуктысисны ки помысь. Му джынтьяс көйдысыс эз тырмы да көдзисны зөр, мед кушöн оз гожйы. Игнатовлы тöд вылас уси важся небöгысь серпас. Школаын велöдчигöн на аддзыліс. Нинкöма кресстьянин волысалöма көйдыс тыра доздук да гөрöм му кузя ветлöдлö, шенасьö-көдзö.

Игнатов сьыліас жö пысаліс көв йылö ведра да кояліс зöрсö гөрöм му пасьтала. А сэсся «Нива» бöжö көрталіс кык агас, на бöрся кыз потш да кытшлаліс öтарö-мöдарö. И муыс лои шы-льыдсьыс-шыльыд.

Зэрыштіс да, зöрйыд сяркнитіс-петіс: мичаа, визьöн-визьöн.

Шванова аддзöма да, вөлöмкö, туясьö, трактористъясöс то-пöдöма: коді пö Игнатовыслы мусö көдзис?! Тöдмала, да премия-тöг колянныд. Шванова дöбильки ёна вöтлысис Игнатов бöрся. Мед эськö колхозникъясыс эз отсавны, но бур йöзыд век сюр-лісны. Мöдöд онас сылы весиг Швановалöн верöсыс мусö гөрис, эз видзöд гöтыр вылас...

Шванова первойя онас жö Воркутаö мöдöдіс кык вагон картофель. Бöрсянныс ачыс муніс. Локтіс дона анча пасьöн. Мöд онас челядыслы ньöбис карын патера. Паськаліс сёрни: мöд выlö пö ырыштчöма. Вöчис аслыс колана кабалаяс, медым сетісны медаль да Республикаса заслуженнöй уджалысь ним. И сетісны öд! Помся люзикасис карö. Шоперыс кыскаліс эз сöмын сійöс, но и челядсьö да матысса рöдвужсö. Колхозса трактористъяс гөрисны Швановалысь öшинь увсö. Найö жö трактора керанöн шердйисны сылысь картофель. Öктісны карту-пельсö да пыртлісны гөбöчас. Та дырйи Регина Шванова грöш ни көпейка колхоз кассаö эз мынтыв.

Пöшти ставныслы, кодъяс отсасисны сылы лоны овмöсса юралысьöн, дасьтіс колана кабалаяс, медым сетісны нимйöза пас. Но воддза уджалігас паныд пукалысь уджтьёртыслы эз лöсьöд колана кабалаяссö. Öддортіс и главнöй инженер Чеусовös, сы выйöдз, мый мöдыслы ковмис мунны юрсиктö уджавны: коркö пö кыкнанныс лөкнога шуасьöмаöсь председа-тель йылысь.

«Велöда, тöдны кутасны. И мукöдсö, коді оз меным ньылыд мун, велöда овны!»,— лөгпырысь мөвпаліс Шванова.

Шванова ньöтчыд эз вунöдлы, кыдзи лои юралысьнас. Та вöсна и сибöдіс ас бердас удтысьысьясöс. Юасис, мый сиктын сы йылысь сёрнитöны. Медым ёнджыка матыстны отсасысьяссö ас дорас, медводдза восянныс кантораын вöчлывліс гаж. Винаöн да донтöм водкаöн юктасис, Игнатовös лөкöдіс. Кантораса коридорö, дзик пыранінас, öшöдіс пöv: Ягдорса овмöслөн веськöд-лысьяс — И.А.Петров, Р.А.Шванова.

Ассьыс гөгрös паса чужан лунсö гожöм шөрнас лöсьыда пасйис кантораса залын. Кораліс аскоддьöмсö, юисны, гажöд-чисны.

— Бара нин төкаритöны,— сиктсаяс индылісны кантора öшиньö.

Шуасисны, но водзö эз явитны. Тöдісны, гижан кө, аслыд лөк

лоӧ. Увзыясны предыслӧн «понъясыс» да он мын, тшелльӧ лэптасны.

— Мед гажӧдчасны, абу кӧ яндзимыс,— броткисны вомгор-улас бабаяс.

Регина броткӧмсӧ эз кыв. Талун сійӧ мичаа вӧччӧма, пукаліс пызан сайын, дзик шӧрас. Ӧтар-мӧдарас зіль отсасысьяс: Петыр Веня да Митрей Шурик. Региналы юрдибас сӧмын юртас оз тырмы. Ачыс сідз и югъялӧ, сідз и югъялӧ! Ньӧти эз шога, мый верӧсыс бурдӧдчанінын куйлӧ. Ыджыдтор тай, пӧрысь верӧсыд!

Гоз-мӧд вежон сайын Регина локтіс гуляитанінысь, а керкаас пырны эз вермы. Верӧсыс игнасьӧма да, оз вост.

— Вост! Буряд кӧ колӧ, вост!— горзӧ да чужъялӧ ӧдзӧс Регина.

Весьшӧрӧ горзис, ӧдзӧс эз восты. Регина скӧрмис, лэччис кильчӧ вылысь. Бостіс сарайысь чер да мый вынсьыс сӧтыштис ӧдзӧс. Каличла дорас вачкылӧ и вачкылӧ. Скӧр йывсьыс выныс содіс да чер нырыс бура пыдӧдз ӧдзӧс плакаас пыралӧ. Кераліс сы выйӧдз, мый каличдорса плакаыс торпыриг лои, и каличыс чечыштис, востис ӧдзӧсыс. Сюри кӧ тайӧ здукас игнасьысыс, эськӧ балябӧжас чер тышнас и школӧбтіс, но дзик пырсӧ эз аддзы. Верӧсыс, вӧлӧмкӧ, гӧбӧчас дзебсьылӧма...

...Регина Шванова стопка бӧрся стопка коньяксӧ вомас гульк-нитіс нин. И мужикъясӧс тшӧктӧ юны, а найӧ дӧбильки кодӧсь, ыджыд залын сӧмын ызгӧм кылӧ. Некод ӧта-мӧдсӧ помӧдз оз кывзы. Бӧдӧн ассыйс зільӧ висътавны-должны.

Регина горӧдіс сывны:

— Пирожок, мой пирожок...

Ссыланкывсӧ кантораса бабаяс пыр жӧ кватитісны да нуӧдісны водзӧ. Петыр Веня пӧрӧдіс вомас нӧшта ӧти стопка да мыйкӧ шӧпнитіс Региналы пеляс. Сэсся чеччис да дзибрӧса воськолӧн петіс жырийсь. Минут дас мысти сы бӧрся вӧтчис Регина Шванова.

Ӧшинь улын сулаліс виль пӧлӧс, суйӧрсайса кодъ «уазик». Регина тэрыба матыстчис да сӧліс воддза пуклӧсӧ.

«Уазик» вӧрзӧдчис, журкнитіс асфальт кузя Дәне грездлань. Верст кык мысти кежис ю дорӧ мунысь векньыдик лыа туй вылӧ. «Уазик» надзмӧдіс ӧдсӧ, а сэсся сувтіс джуджыд пожӧм улӧ.

Заводитісны кутчысьлыны, Регина маласис кужӧмӧн. Друг видзигад бура нин велаліс. Аслас верӧсыс сы дорӧ важӧн эз матыстчыв, а Веня Регинаысь том, сылӧн чурки-буди ставыс на лючки.

Тӧндзи Регина дӧзмыліс Веня вылӧ. Гортас кампузитчыны кутӧма, гӧтырсӧ пинялӧ. Корисны предсӧ, медем ышмысьсӧ лӧньӧдас. Предыд котӧрӧн локтіс, заводитліс такӧдны, но Веня код юрнад кутіс и сы вылӧ ӧрччыны да ыршасьны.

— Мун, весась...

Регина гӧрдӧдіс.

— Асьныд лӧньӧдчӧй!— ӧвтыштис кинас да бӧр муніс гортас.

Вежон чӧж эз сӧрнит Венякӧд. Сӧмын сы дыра терпенньӧйс и тырмис. Гажмис да бара окота лои топӧдчывны, дзик телепит.

Код юрнад маласигӧн эз казавны, кыдзи поводиыс вежсис. Кыськӧ локтіс сьӧд кымӧр. Заводитіс востымасьны, гымыштіс,

чардыштіс. Зэрмис ыджыд төлөн, бытты өведраысь кисытіс. Пемдіс, гымньовыс помся швачкө и швачкө-луйлө. Татшөм кө адыс, ывлаыс дзык сы кодь и лои.

Водзын, гымалігөн, Регина дзебсьыліс гортас керка пыді пельсө. А өні гажмөма да, мусук дорын гымньовсьыд оз пов. Сі-йө ылыысь и ылыысь сывъяліс Веняөс.

Овлө, олөмаджык бабаяс ыштылөны томджык мужичөйяс ылыө. Шванова буретш пырис татшөм лыдас. «Ой, радейта, радейта, мусаөй тэ менам»,— пөся шуаліс Венялы. Тайө кывъясыс сы олөмын лоины бөрьяөн. Син сотана чардби, гым шы, мыйысь пельыд потө и... быттыө нөшкөн вачкисны юрас.

Бөрынджык, кор аддзисны сотчөм «уазик» да өта-мөд бердас топөдчөм кык шом кодь шой, Ягдорсаяс эз тырвийө гөгөрвоны, мыйысь предыс да шоперыс кулісны: гымньовсьыс али чегөм пожөмсьыс? Али ына гымньовыс первой веськаліс пожөмас, чегис сійөс, сэсся чеччыштіс «уазикө», виис пукалысьяссө да өзтіс машинасө?

Игнатов кывліс лёк юөрсө да скөрпырысь думыштіс: «Верми кө, ловзьөді да мөдысь гымньовнас лыйи!»

Швановаөс да Петыр Веняөс дзебөм бөрын, нелямын лунсяө-дзыс на, воис ылы юөр. Муртса мөдаръягыдас абу мунөма нөшта өти морт, коді Игнатовөс удж ылысь вештөмө пуктіс жө ассыс пай... Код төдас, кывъясыс Игнатовлөн инісны, али сідз нин артмис, но Енмыс мыждіс и районса видз-му овмөс управлениеысь начальник Мальцевөс. Горт дорас, дзык мир туй бокын, би провод улас вөлөм картупель гу ылымөдө. И колө жө сідз лоны! Код юра шопер тайө здукө машинанас орчча би столбсө люкалас, да проводыс орө. И усьө веськыда Мальцевлы мыш ылыө. Мортыд сэтчө и чермунө. Оз өд кув, доръясны, колө ловйөн. Но лоө кывтөм пемөс кодь да сөмын вольпасын куйлыны вермө.

*Водзө лоө на.*



Никон ХАТАНЗЕЙСКИЙ

## Кыпөдліс ротасо атакао

Андрей Ильич Филиппов тшөкыда казътывліс челядьдырся кадсö, ассыыс чужан грездсö, Мошъяугаос. Казътывліс ассыыс ыджыд воксö, Фёдорос, коді революция кадö служитöма Петербургын да олөмсö йитöма большевикъяслөн партиякод. Гортас сійö локтіс 1918 вося арнас. Печора вылын ыпъяліс нин граждан-



ской война. Фёдор отсаліс котыртны ас грездас неыджыд красногвардейской дружина да голь йөзлысь комитет. Фёдор ёна радейтіс ассыыс ичот воксö, отсаліс сылы пуысь да сёйысь вöчавны чачаяс, висътавліс гырысь каръяс да Россияын выль олөм стрöитөм йылысь. Жаль, мый сійö эз дыр вермы овны батыслөн керкаын, пырис служитны Ижмо-Печорской полкö, коді котыртчис Изъваын 1919 вося февраль тöлысьö. Март помас нин полкыс петіс туйö, веськодчис Эжвалань. Медым не веськавны белöйяслөн киö красноармеечъяскöд тшөтш энöвтисны ассыыныс сикт-грездсö матö витсё семья, на лыдын тшөтш и Филипповъяс. Андрейлөн батыс рөзваль доддьö пуксьöдіс гöтырсö, квайт арöса писö, көкъямыс арöса нывсö. Изъва юбердса сикт-грездъясыс ичötöсь, керкаясö он вöлі пыр веськав, та вöсна унджык войсö Андрей чойыскöд узылісны кос турун пиын. Усть-Сысольскö воөм бöрын Андрейлөн батыс да Фёдор вокыс полкса красноармеечъяскöд öтвылысь кутісны тышкасьны белогвардеечъяскöд да интервентъяскöд, а мамыс ичöt пи-нылыскöд ветлөдліс сиктысь сиктö, корсисны кынөмпöт. Ставыс тайö колис Андрейлөн юр вежöрын.


1930 воын Изъва районын котыртісны техникум, көні дасътісны көр техникъясöс, зоотехникъясöс да ветеринарнöй фельдшеръясöс. Андрей Филиппов велөдчис окотапырысь. Практика вылö студентъяс петалісны Изъва районса да Ненеч кытшса көр овмөсьясö, гожөмнас видзисны-дорйисны көръясöс сибырса язваысь. Андрей ас көсйөм серти кык гожөм дорыв уджаліс геоботанической экспедицияын, сійöс тундраын котыртліс Россияса наукаяс Академия. Зон унатор тöдмаліс сәні уджалігөн.

1930 воын Изъва районын котыртісны техникум, көні дасътісны көр техникъясöс, зоотехникъясöс да ветеринарнöй фельдшеръясöс. Андрей Филиппов велөдчис окотапырысь. Практика вылö студентъяс петалісны Изъва районса да Ненеч кытшса көр овмөсьясö, гожөмнас видзисны-дорйисны көръясöс сибырса язваысь. Андрей ас көсйөм серти кык гожөм дорыв уджаліс геоботанической экспедицияын, сійöс тундраын котыртліс Россияса наукаяс Академия. Зон унатор тöдмаліс сәні уджалігөн.

Техникумсо Андрей помалис медбуръяс лыдын. Велөдчигас нуөдіс и ыджыд общественной удж: и олөма йөзкөд, и томъяскөд. «Андрей кө мыйкө думыштас, быть вөчас,— казътывліс сылөн томдырся ёртыс Кузьма Бабинов.— Сійө некутшөм уджыс эз пов».

Төрытъя студентөс, а өні көр техникөс мөдөдісны уджавны Ылі Асывылө, Коряк национальной кытша көр видзан овмөсө зоотехникөн. Сійө окотапырыс босътчис зільны, унатор вөчис көръяслыс рөдсө бурмөдөм кузя. Өдйө велалис сёрнитны коряк кывйөн, сывны налыс сыланкывъяс. Андрей котыртліс и көръясөн ордысёмъяс, весиг пановтліс мукөдөс. Сэні жө адзис аслыс гөтырөс. Куим во мысти Андрей Ильичөс индісны главнөй зоотехникөн Камчаткаса көр видзан да вөралан овмөсө. Сёрнитчис уджавны сэні кык во. Овмөсыс вөлі ыджыд — көкъямыс сюрс сайө көр. Уна лыда Почёт грамотаяс висъталөны: Филиппов бергөдөма ассыс уджсө бура, пыртөма уна вьлитор. Вөлөма и партийнөй пропагандистөн. Ылі муын Андрей Ильич адзис аслыс бур ёртъясөс. А районөн веськөдлысъяс ёна корисны, медым том морт нөшта уджалыштис кык-куим во. Но сійөс кыскис чужан Изъваис.

Изъваө воөм бөрас Андрей Ильич мыйкөдыра уджаліс районса видз-му овмөс отделин зоотехникөн. 1939 вося арнас сійөс босътисны армияө. Веськаліс Уссурийскөй крайө. Полкыс, көні служитис Филиппов, сьөд вөр шөрын стрөитис ыджыд аэродром. Комиыс сэні унаөн вөліны. Рытъяснас красноармеечыс бипур дорын сылісны роч да коми сыланкывъяс. Торйөн вына да мичаөс гөлөсъясыс вөліны Мохчаыс Егор да Федот Хозяиновъяслөн. Тані том морттө и суис войнаыс. Уна красноармеечөс, на лыдын Андрей Филипповөс, кодъяс помавлөмаөс шөр школа, босътисны велөдчыны Владивостокса военно-пехотнөй училищөө. 1942 вося май 4 лунө Андрей Филипповлы сетісны «младшөй лейтенант» чин да мөдөдісны тышкасыны-водзсасыны немечлы паныд.



1942 вося юлын Филиппов веськаліс Северо-Кавказскөй фронтө, кодөн веськөдліс Сөветскөй Союзса Маршал Будённый. Андрей Ильич адзыліс сійөс зэв матысянь. Фронтлөн дивизия-ясыс, торъя полкъяс сулалісны Улыс Дон да Азов саридзлөн берег пөлөн. На водзө вөлі пуктөма мог: не сетны вөрөглы вуджны Керч виям (пролив). Миян войскалы паныд сулалісны немечлөн кык армия (өтиыс танкөвөй) да румынъяслөн армия. Найө зілісны босътны Грозный, Махачкала да Баку каръяс. Немечлөн сэки танкыс да самолётыс вөлі ёна унджык.

Дивизия, кытчö пырис Филипповлөн взводыс, вочасөн бö-рыньтчис Маныч каналлань, косясын лоины ыджыд воштöмъяс. «Рытнас вöлі сувтам, кодъям-лөсьöдам окопъяс да траншеяяс,— казтыліс Андрей Ильич,— асывнас, час дасын, тöдмалам, мый вөрöглөн танкъясыс миян мыш сайынöсь нин. И бара бöрыньтчам».

Юль помланьыс вир кистана косяс пансисны дзик канал дорас. Тані дивизияыс кык полк, на лыдын Филипповлөн взводыс, веськавлісны вөрöг кытшö. Прöтивник быть көсйис бырöдны кытшö сюрöмаясöс, эз жалит мина-снарядсö. Луннас кыкыс-куимыс уськөдчыліс миян ылö. Асывсаян да рытöдз юр весьтын жургис-öшаліс вөрöглөн самолёт-разведчик (салдатыс нимтісны сійöс «рамаөн»), коді веськөдліс немечлөн артиллерия биөн. Вөрöглөн снарядъяс тшöкыда гылалісны миян траншеяö. Öти снаряд усис бруствер вылас, взводса командирсаян метрыс ылөджык, но бур, мый сійö эз взорвитчы. Миян командиръяслы, тыдалö, эз жö кажитчы самолёт-разведчикыс. Öти луно енэжын петкөдчылісны миян кык самолёт-истребитель. Сэсаян немечлөн «рама» кытчөкö воши.

Коймөд сутки помланьыс, орчча дивизиялөн танкъяс отсöгөн кытшö лои орөдöма. Торйөн миянлы сьöкыдöсь вöліны юль 30–31 лунъясыс. Вөрöг кыпөдчыліс атака бöрся атакаö. Дорйысим ми винтовкаясөн да ручнöй пулемётъясөн. Бур, мый гранатаыс вöлі тырмымөн. Немечлөн кык танк вуджлісны миянлыс траншеянымöс. Бур, мый дорйыссысаяс эз шöйöвошны. Менам взводыс öти салдат шыбитіс граната да орөдіс танкыс гусеничасö, мөд танксö сувтөдісны артиллеристъяс. Август 1 луно немеч косьөн вуджис каналсö, сійö жö рытас босьтіс Сальск кар.

Август 3–6 лунъясö мунісны ёсь косяс Армавир кар дорын.



Филипповлөн взводын ловйөн коли кык салдат. И мукöд взводъясас унаөн усисны. Дорйысьны бара жö ковмылiс гранатаясөн. Öти кадö гитлеровечьяс весиг миян траншеяöдз воöдчывлiсны. Сьöкыда ранитчöм сержант, отделениеса командир гранатаясөн взорвитiс асьсö да куим немечöс. Сэкся косяс доймалiс и Филиппов, бур, мый немечлөн осколокыс абу жугöдöма кок лысö.

Кык вежон госпитальын бурдöдчöм бöрын Андрей Ильич веськалiс 2-öд гвардейскöй мотострелкöвöй дивизияö. Öти косьын сийö вежис сьöкыда ранитчöм ротаса командирöс. Ичöтик ю дорын миян рота матö куим час чöж нуöдiс румынскöй батальонкöд кöсь. Сэки Филипповлөн салдатъяс босьтiсны пленö налысь 37 салдатöс.



Андрей Ильич тшöкыда висьтавлiс туй бокрын сулалысь нейджыд грезд йылысь. Шуисны сийöс либö Ступеньки, либö Столики. Грездыс ёна кажитчöма Филипповлы. Керкаясыс ыджыдöсь, кыпыдöсь, уна жыръяöсь. Быд керка дорын сулалö мича сад. Нейджыд кось бöрын грездас ми пыравлiм, но ковымис бөр энöвтны сийöс. А рытьявылыс воис приказ: виль пöв босьтны грездö.

Нейджыд артподготовка бöрын атакаö кыпöдчис быдса батальон. Филипповлөн ротаыс вöлi веськыдладорас, мунiс мукöдсьыс неуна водзынджык. Виччысьтöг «ловзис» вөрöглөн пулемёт, топöдiс му бердö миянлысь салдатъясöс. «Коляс некымын минут, и ротаысь джын йöзыс оз ло,— думыштiс командир.— Сöмын колö мунны водзö». И первойөн сувтiс да горöдiс: «Рота, вперёд!» Филиппов бöрся кыпöдчисны салдатъяс. Грездыс лои миян кийн. Öнi помнитöны-ö грездса олысьясыс, мыйта красноармееч усис-ранитчис вөрöгкöд тайö тышас?

...Куим вежон чöж gryмакылiс чорыд кось Крым узлöвöй станция мездöм могысь. 1943 вося апрель 12 лунö миян öрудиеяс да миномётъяс, «катюшаяс» часысь дырджык лыйлiсны станция кузяыс. Миян дорсянь тышö пырöдчис кык батальон, пехота водзын мунiсны танкъяс. Филипповлөн ротаыс станциялөн стрöйбаясöдз матыстчылiс 150—200 метр ылнаö. Но наступайтысьяслысь туйсö потшисны снаряд-минаяс, осколокъясыс дойдiсны уна салдатöс. Öти көрт тор веськалiс Филипповлы сояс, жугöдiс лысö. Кодкö горöдiс: «Санитара сюда!» Но ротаса санинструктор веськалiс пулемёт би улö...

Косыыс öтарö ёсьмис. Андрей Ильичлы дыркодь ковымис куйлыны снарядөн вöчöм ыджыдкодь гуын. Сöмын куим час мысти

---

сійö веськаліс медсанбатö, көні шуисны, мый ранаас заводитчö-  
ма гангрена. Нуöдісны госпитальö да сәні вундісны шуйга кисö.

Гортас локтöм бöрын зіль морт война помасьтöдзыс веськöд-  
ліс партия райкомлөн военнöй отделөн, сы бöрын дас куим во  
уджаліс районнöй газетса редакторөн. Газетсö ошкывлісны сы-  
ысь, мый ыджыд тöдчанлун сетö оз сöмын видз-му овмös, но  
и культура да спорт сöвмöдöмлы. Изьва районса сьылысь-йöк-  
тысьяс ылöдз нимавлісны, ассьыныс талантсö найö петкöдлісны  
Москваса Кремлёвскöй дворечын.

Андрей Ильич некымын во веськöдліс Изьваса сиктсöветөн,  
а сэсся райисполкомлөн планöвöй комиссияөн. Эз öтдортчы и  
общественнöй уджысь, чукöртіс материалъяс районлөн история  
йылысь, гижöдъяс, тшöкыда аддзысьліс том войтыркöд. Андрей  
Ильич Филипповös ёна пыдди пуктылісны Изьва вожын, сійö  
уна вын сетіс, медем кыпöдны районлысь экономика да культу-  
ра, бура быдтыны-воспитайтны том йöзös.

***Снимокъяс вылын:***

- 1. Андрей Ильич Филиппов, 1939-1940 вояс.*
  - 2. Анапаны, госпиталь бöрын, 1942 во.*
  - 3. Сыктывкарса да районнöй газетъясысь редакторъяслөн чукöртчы-  
лöм. Сыктывкар, 1958 во.*
  - 4. «Новый Север» газет редакцияын, 1958 во.*
- Снимокъясыс Владимир Филипповлөн гортса архивысь.



Виталий ТРОШЕВ,  
Елена ЕРОФЕЕВА

## Эз юөртөг вошны, а усины война вылын

*Важон нин помасис Ыджыд война, и зэв на унаон онөдз лыддыссыоны юөртөг вошомаясон. Но йоз сёлөмын пыр на кольо надея, мый налөн рөдвуж да матысса төдсаяс йылысь мыйкө төдмавяс. «Войвыв кодзувлөн» 2017 вося 6 номерын ми гижлём Виталий Степанович Трошев йылысь, кыдзи гөтырыслысь вошом рөдвужсө корсигон пырөдчис тайо корсьысян уджас да интернетын йөзөдөм материалгясысь кутис аддзавны, кор да кытөн пöгибнитöмась-дзёбöмась Комиысь мунлём юөртөг вошом салдатгяс. Сийо номерын ми йөзөдлём сöмын найос, кодгяс мунлöмась война вылö Сыктивкарысь. Но Трошев В.С. уджалö водзö, тайо номерö сийо вöйö война вылын вошлём коми гижысгясöс, кодгясöс сылы мойвиис аддзыны.*

*Нöшта Виталий Степанович төдмөдис Ерофеева Еленакöд. Елена төдмалöма телевизорысь сылөн удж йылысь да шыөдчöма дядьсö корсьом могысь. Öти дядьсö пö отсалi аддзыны, мукöдсö сэсся ачыс нин кужис корсьны. «Уджыс тайо збыльвылас зэв сьöкыд, босьтö уна вын да кад,— шуö Виталий Степанович,— а Елена зэв писькös да сюсь нывбаба. Сылөн бура артмö. Арабачысь нель мортös аддзис, öнi кöсйö босьтчыны Емдiн районысь вошомаясös корсьны». Кыдзи төдчöдö ачыс Елена, зэв пö нимкодь лов вылад, кор аддзан юөртөг вошомалысь дзёбанiнсö, төдмалан кулан лунсö, мый налысь нимгяссö öнi некор оз вунöдны и эм кытчö волыны да копыртчывыны...*

Габов Александр Григорьевич, чужлöма 1912 воын Висер сиктын, армияö босьтöмась Сыктивкарса ГВК-өн 1941 воын, рядöвöй. Пöгибнитiс Эстонияын.

Габов Иван Николаевич, чужлöма 1913 воын Кöрткерöс районса Типöсикт грездын, армияö босьтöмась Сыктивкарса ГВК-өн 1935 воын, политрук. Пöгибнитiс Ровенскöй обласьтын (Во-лынь) 1941 вося сентябрын.

Латкин Владимир Павлович, чужлöма 1907 воын Сыктив районса Поёл сиктын, армияö босьтöмась Киров обласьтса Верхошижемскöй РВК-өн 1942 вося апрель 2 лунö, старшöй сержант. Кулис дойясысь 2948 номера госпитальын 1942 вося июнь 5 лунö. Дзёбöмась Московскöй обласьтысь Раменское карса шойна вылын. Öнi Жуковский карса братскöй шойнаын.

Самарин Николай Степанович, чужлöма 1923 воын Кулөмдiн районса Керчомгя сиктын, армияö босьтöмась Кулөмдiн районса Кулөмдiнса РВК-өн 1941 вося декабр 12 лунö, сержант. Кулис дойясысь 1944 вося февраль 14 лунö. Дзёбöмась Псков обласьтын, Новоскольниковский районса Маево грездын.

---

Титов Иван Павлович, чужлөма 1908 воын Тентюков сиктын, армияö босьтöмаöсь Владимирскöй обласьтса Муромскöй РВК-өн 1941 воын, офицер. Пöгибнитіс Смоленск улын 1942 воын.

Шаманов Алексей Александрович, чужлөма 1918 воын Лопыдино грездын, армияö босьтöмаöсь 1941 воын Кörtкерöс районса Кörtерöсса РВК-өн, рядöвöй. Пöгибнитіс 1942 вося декабр 12 лунö. Дзебöмаöсь Смоленск обласьтын, Сычëв районса Аристово грездын 21-4 братскöй шойнаын.

Ярасов Борис Степанович, чужлөма 1908 воын Жешарт сиктын, армияö босьтöмаöсь Ленинградса ГВК-өн 1941 вося июльын, лейтенант. Пöгибнитіс 1942 вося май 31 лунö буксирөн кывтігөн мина улö веськалöмысь. Дзебöмаöсь Балтика саридзын.

Жданов Александр Николаевич, чужлөма 1920 воын Гам сиктсöветса Арабач грездын, армияö босьтöмаöсь 1940 воын, рядöвöй. Пöгибнитіс 1941 вося сентябрь 23 лунö Ленинград обласьтын, Кировскöй районса Гайтолово грезд улын. Дзебöмаöсь Синявино посёлокын, братскöй шойнаын, 113-öd плита.

Жданов Иван Николаевич, чужлөма 1915 воын Гам сиктсöветса Арабач грездын, младшöй лейтенант. Пöгибнитіс тышын 1941 вося октябрь 15 лунö Калуга кар бердын. Дзебöмаöсь Калугаын, Пятницкöй шойна вылын, братскöй гуын.

Жданов Михаил Степанович, чужлөма 1910 воын Гам сиктсöветса Арабач грездын, армияö босьтöмаöсь 1941 вося август 19 лунö, рядöвöй. Пöгибнитіс 1942 вося январ 29 лунö Смоленск обласьтса Велиж кар вöсна тышын. Дзебаніныс абу на тöдса.

Одинцов Анатолий Иванович, чужлөма 1920 воын Гам сиктсöветса Арабач грездын, армияö босьтöмаöсь 1940 воын Кулөмдінса РВК-өн. Пöгибнитіс 1945 вося февральын Польшаын. Дзебöмаöсь Згеж карын, Паженчевскöй улича, 77-öd шойна.



## Мойдъяс

### Весът кузя морт

Олісны-вылісны гозъя. Налён вөлі кык ныв. Өтикыс вөлі ичиньводз, и ичиньдлөн сы вылө лөгыс петө. Гөтырыд и шуө верөслы: «Босът ассъыд нывтө, катөд Давйө». Старик катөдас, вөр керкаө коляс и сылы скөт коляс: петук, кань да шыр.

Нылыд нянь пөжавны пачө сюяс и рок пуны сюяс, да кутас батысө виччысыны. Батыд дыр оз лок, и нылыд батытө кутас чуксавны: «Батьө, лок нин!» Кодкө сылы и шуас: «Локта, нылө, локта, ме ачым весът кузя, зырымөй бедь кузя, понйөй гид ыжда!» Пырас мортыд и шуас: «Нопйөс кытчө ректа?» Нылыд шуас: «Гөбөчө». Сэсся пуксысны сёйны. Пөсь нянь сёясны и рок. Рокнад нылыд вердас и каньтө, и петуктө, и шыртө. Сёйөм бөрад водасны узыны. Ныв водас гөбөч вылад, а локтысыд водас пөлать дорад. Войнас шыр котөртас ныв дінө и шуас: «Вешйы паччөр сэрөгас». Ныв и вешъяс. Войнад чеччас локтысыд да кутас корсыны нывтө. Корсяс, корсяс, каньлы инмас кийд, каньыд и вазнитас-курччас дай парсыштас на. Петуклы инмас, петук кокыштас да горөдас: «Кикируллю!» Локтысыд повзяс, өдйөджык пышъяс. Аскинас ныв чеччас, гөбөчө пырас, а гөбөч тырыс деньга. Сэсся батыс локтас, денегасө дзонь додь тэчасны и гортас нуасны.

Аскинас старука тшөктө ассъыс нывсө катөдны сэтчө жө. Старик катөдас, нывтө коляс. Нылыд пусяс-пөжасяс да өтнас роктө сёяс, каньтө, ни петуктө, ни шыртө оз верд. «А кузь жө пө кадыс. Бать эз кут локны ни...» Кодкө сылы и шуас: «Локта, нылө, локта, ме ачым весът кузя, зырымөй бедь кузя, понйөй гид ыжда!» Пырас весът кузя морт. Водас узыны пөлать. Ныв — гөбөч вылө. Петук, кань да шыр дөзмасны горш нылыд вылө, да оз отсавны. А весът кузя мортыд войнас чеччас, нывтө кималасөн корсяс дай сёяс кушөдз.

Аскинас батыс локтас, нывлысь лысө нопйө тэчас да гортас нуас. Старука аддзас лыяссө да асьсө морөн лыяс.

А ая-ныла өнөдз олөны да красуйтчөны.

### Правда да кривда

Вөліны кык вок. Кыкнанныс төргуйтөны. Өтиыс вузасьө честнөя, правдан. А мөдыс вузасьө, кыз вермө, венө йөзөс. И найө спорө воисны, кык вок. Правдаөн вузасьысь озджык богатейт, а кривдаөн вузасьысь озыр.

Но, спорө вовисны кык вок, и өтиыс шуө:

— Вөльнөй светын правдаөн овны бурджык.

А мөдыс шуө, кривдаөн пө бурджык.

Споруйтисны, споруйтисны, и помө эз воны. Сэсся-й шуөны, мунам пө путешествуйтны, юасыны йөзлысь, код ног шуасны.

Кык вок мөдөдчисны ю пөлөн мунны. А сэнi вуграсьысь. Вуграсьысь дорө воисны и юалөны, вөльнөй светын пө правдаөн

---

али кривдаён овны бур. А вуграсысь сэтшөм жулик вёлөма, кривдаён пö бур, шуö. А найö, кык вокод öбвет пуктасны петигас, коднымöс пö ошкасны куимысь, сылы пö кыкнан овмöсыс ловö. Но, правдаён олысь и жугыльтчис, первой паныдасысь эз сы дор шу. Куимысь кө сідз ошкасны, закон лоö. Воклы став овмöс лоö. А мöд вок радлö.

Мунісны ещö, и паныдасис дядьö. Вöльной светын пö кривдаён али правдаён овны бур, юалöны сылысь. Бара дядьö сэтшөм дурак веськалöма, кривдаён пö, шуö. Но, ладнö, правдаён олысь ещö ёна жугыльтчис.

Мунісны ещö водзö, и коймöд дядьö паныдасис. Бара юалисны сылысь вокъяс, кривдаён пö али правдаён овны бур? Кривдаён пö, бара шуö дядьö, сэтшөм жö и сійö вёлөма.

Но, кривдаён олысь веніс, сылөн закон тыри. И сійö шуис, но, пö, вокö, мун, кытчö синмыд видзöдас да мый эм вылысад, а ме пö босьта тэнсьыд овмöс, кыз пуктöма вöлі öбвет.

Озыр вок сэсся-й локтіс гортас, воклысь семьясö керкаысь вöтліс, босьтіс став көлуйсö и керкасö. А правдаён олысь нопъясис дай муніс правда корсьны.

Муніс да муніс, нопнад мудзис нин, а деревня эз во, узыны некытөн. Ещö муныштіс, и сэтшөм дуб воис. Пырис дуб улö, узыны думайтö, а сэні ставыс кок туйяс. Но, тан пö кодкö олысьяс эмöсь, час жö пö дуб йылас кая, татчö пö локтасны, гашкö. Сэсся сійö кайис дуб йылö, водіс сэтшөм ув вылö.

Вой шöр кадö, зонмö, пöим-ном мында чöрт локтіс. Ыджыд сötанаыс сэтчö пуксис, и ставыс мöдісны ошйысьны сылы. Öти шуö, ме пö тайötö вöчи, мöд шувö, ме пö тайö вöчи. А ме, шуö öти чöрт, царлысь пö нывсö висьмöді, ку пиас пыралі да, и некод пö оз вермы лечитны, ме кө пö ог висьтав. Эстөн, эстөн пö эм столб, сійö столб йывсьыс пö петö ва, ловъя ва. Сійö кө пö ваян, цар ныв справитчас.

А дядьö кывзö. «Вöt али вемöс тайö?». Вемöс пö.

Югдандорыс сэсся лэччис, чöртъяс мунісны да, час пö ветла цар ордö, шуö сія. Муніс царствоö, пондіс юасыны, и збыль, ныв висьö без памяти, асьсö косёвлö. Цар быд ногыс нин лечитöма, и оз вермы справитны. Сэсся явитас, код пö лечитас менсьым нылöс, воцарита ас местаö.

Дядьö локтіс дворечö, цар сылысь юалö, тэ пö, бокöвöй морт, он-ö вермы искод корсьны, лечитны менсьым нылöс. Ме пö верма, шуис дядьö, вайö пö только условие, вайö пö меным вöв. Вöв сылы сетісны, сійö босьтіс туис, вöв вылö сölіс и давай мунны, кытысь висьталісны чöртъяс.

Муніс, и збыль столб йылысь петö ва. Туисö ва босьтіс сійö, локтіс бöр дворечö и, дерт, юктöдіс ли, мый ли сійö, цар ныв пондіс справитчыны и справитчыны, и дзикöдз справитчис. Кывсис сійö йöзлы, и йöзöс пондіс лечитны, быд висьöмысь справиталö ставсö. Царлы рад лои, со пö, локтіс бокöвöй морт да нылöс висьöмысь лечитіс, дай став царствоысь лечитö йöзöс.

Нылöс сетас сы сайö, и сійö пондас царавны, зэв бура овны. Гортса овмöс сійö и вунöдіс нин, öні сылөн бурджык.

Коркö-й кывсяс воклы, со пö, царö воöма. Кыдзи правданас царö воис, шензьö кривдаён олысь. Сылы тешкодъ кажитчö и завид лови. Час жö пö ме ветла, адзöдда вокöс.

Вок ордö воис, вок сылы шувö. Ме пö тай шулі, правдаөн пö бурджык овны, вот пö ме царö вои, а тэ пö век на купеч. А кыз пö тэ воин царас, юалö сылысь кривдан олысь. А ме пö век правда висьталі и öнi пö висьтала. Кор пö ме муні гортысь, воис дуб. Ме пö дуб улö и узымöдчи. Сэтчи пö воисны чöртгъяс, и öти пö ошйысис, висьмöдi пö царевнаöс и лечитны пö позьö только ловъя ваөн, сэтöн, сэтöн пö сійö петö сюръя йылысь. Но, ме пö вои царствоö и кутчыси лечитны цар нылöс. Ветлі пö ловъя вала, лечитi пö сійöс, сэсся пö и йöзöс пондi лечитны, сэсся пö-й менö царö пуктисны. Вот пö мый лои дуб йылын узымысь. А ме кö пö сэтчи ветла, мый лоö, юалö вок. Верман пö и тэ, шуö мöдыс.

И давай муніс кривдаөн олысь, нопгъясис и муніс висьталöм туйöд, и збыль воис дуб. Дуб йылö кайис, пондiс виччысьны. Вой шöр кад мыйöн лои, бара пöим ном мында чöрт воис. Бара пондiсны ошйысьны ыджыдыслы. А öти, кодi висьталіс цар нывтö, и шуис, энлö пö ёна квастайтчö, гашкö пö, кодкö кывзысь эм. Ме пö тай висьмöдi цар нывтö да ошйыси, сійö пö справи-тöма кодкö. Абу-ö пö дуб йылас сійö. И давай кок пöла лешакыд кайны дуб йылö. Кривдаөн олысьöс аддзис, вот пö тай кодi вö-лöма! Морттö юрсійöдыс лэччöдiс и сейчас сійöс чашійöдлісны, косёвлісны. Кривдалы пом вовис. А вок правданад оліс и век на олö, царствуйтö. Öнiя кадö правда кодъ бур нинöм абу.

## Поп казак

Оліс-выліс кресттянин. Сылөн вöлі öти пи, Иван. Коркö-й сэсся быдмыштіс Иван, и сылөн батыс кулі, и мамыс кулі. Сэсся-й дзебис, меститіс найöс, öдвакö эз гöбöчас дзеб кыкнан-нысö. Но, ладнö. Куліны бать-мам, и гажтöм лои Иванлы. Кытчö-кö пö лоö мунны, казакö кöть медасыны. Муніс, муніс сійö и попкöд паныдасис. Кытчö пö мöдöма Иваныс, юалö поп. Иван и шуö, бать пö кулі и мам кулі, и öтнамлы гажтöм лои гортын, кытчöкö муна да казакын кута овны.

— Медась, сідзкö, меным казакад,— шуö поп.

— А мый нö,— шуас,— огыс, медася и тэныд, меным сёровно.

— А донсыс кызди,— бара юалö поп.

— Мыйкö вöд сет дай, сё шайт вылö ола, кытчöдз бабаыд оз кут по-немецки сёрнитны.

Но, ладнö. Нуöдiс поп казакöс гортас и гöтырыслы висьталö, вот, шуас, медалі казакöс сё шайт вылö. Сэтчöдз пö кутас овны мянны, кытчöдз тэ по-немецки сёрнитны он вела. А аслыс поп и думайтö: «Тайö, сідзкö, нэм жежлö мянны сюри».

Но, ладнö. Коркö олісны, олісны найö, и воис праздник. Поп петіс вичкöй служитны. Казак попададдья шуис, ме пö вичкöй жö петала, а ачыс петіс да пос улас дзебсис.

А мöд прикодись дякөн вöлі. Сійö вöлі важысянь нин попад-дякöд любитчö. И кыйöдiс сійö дякөныд, кор поп петіс вичкöй, и локтіс попададья ордö. Только на локтіс дякөныд, пондiсны по-падакöд гöститны, гуль-голькиліс öдзöсын.

— Кодкö локтö,— шуö дякөнлы попададья.— Мун кай паччөрö да ид кольтаяс сайö дзебсы.— Дякөн кайис ид кольтаяс са-

---

йö дзебсьыны, а попаддя идраліс пызан вывсьыс сёян-юансö да петіс восьтны.— Коді?— юаліс сійö.

— Ме,— шуö казак,— восьт.

Пырисны, и попаддя бара юалö:

— Мыйла локтін?

— Менö ыстіс батюшко, паччөр вылын пö ид кольтаяс эмöсь да вартны колö.

Попаддя шуö:

— Чöv, эн вөрöд кольтаяссö, ульöсь найö.

— А поп тшöктіс да, быть меным кывзы, ме вöd казак.

Кайис Иван паччөрö и давай шыблавны кольтаяс: öти кольта жняп шыбитас, мöd кольта жняп шыбитас, сэсся-й дякөнös юрсіöдыс кватитіс да брункнитіс-шыбитіс кольтаяс сорыс.

Петкöдіс Иван кольтаяс и дякөнös гумла выlö, и давай вартны. Вартіс да вартіс Иван, вартіс да вартіс, дякөн и пондіс кевмысьны:

— Дугды,— шуö,— Иван, эн нöйт, ме тэныд ветымын пуд ид сета.

— Ладнö,— шуö Иван,— сідз кө пö бур.

И нуöдіс сійö нöйтöм дякөнös идла. Мунісны, сöвтісны вöv доддö дякөнлысь ветымын пуд ид, и Иван бөр локтіс гортас. Буретш поп локтö вичкоысь.

— Мый нö, казак, керан?— юаліс поп.

— Паччөр вылад тай ид кольтаясыд вöліны, варті да ветымын пуд ид уси.

Тайö, другö, зэв нимкодь лои поплы. Ок, пö, тайö казакыд и озырмöдас мяннös, думайтö.

Коркö найö олісны-керисны и öпеть праздник воис. Поп петіс вичкöй. Казак попаддялы öпеть шуис, ме пö час петала жö. Ачыс петіс да öпеть пос улас дзебсис.

Локтіс попаддя ордö дякөн. Эз на удит попаддя дякөнös гös-титöдны, öдзöсын гуль-голькыліс.

— Дзебсьы,— шуö попаддя,— паччөрö, сю кольтаяс сайö.— Дякөн кайис сю кольтаяс сайö дзебсьыны, а попаддя петіс восьтны.— Коді?— юалö попаддя.

— Ме,— шуис казак,— восьт.

Пырисны, и попаддя öпеть юалö:

— Мыйла локтін?

— Паччөр вылад пö сю кольтаяс эмöсь да, батюшкоыд вартны тшöктіс.

— Чöv, тöрыт на пырті кольтаястö да ульöсь, эн вөрöд.

— А поп тшöктіс да, быть меным кывзы,— шуö Иван,— ме вöd казак.

Кайис Иван паччөрö и давай шыблавны кольтаяс: öти кольта жняп шыбитас, мöd кольта жняп шыбитас, сэсся öпеть дякөнös юрсіöдыс кватитіс да брункнитіс-шыбитіс и петкöдіс сійö гумла выlö вартны. Вартіс да вартіс Иван, вартіс да вартіс, дякөн и пондіс кевмысьны:

— Криста ради, лов эн босьт, ме тэныд ветымын пуд сю сета.

— Ладнö,— шуö Иван.

Сэсся доддäліс сійö вöv, муніс да дякөнлысь вайис додь тыр сю. Поп сійö самöй вичкоысь локтö.

— Мый нин, казак, керан?— юаліс попыд.

— Паччөр вылад тай сю кольтаяс вёліны, варті да ветымын пуд сю уси.

О, господьё, поплы нимкодъяд!

Мыйкодъира олісны-керисны, и өпетъ праздник воис. Поп өпетъ петіс вичкоё, а казак бара пос улас дзебсис.

Воис дякөн, пондісны попаддьякөд гөститны. Муртса на пуксисны пызан сайё, өдзёсын голь-голькыліс.

— Кытчё ме дзебся?— шуё дякөн.

— Пельсаё пыр, ме вевття,— шуё попаддья.

А пельсаас вёлёма дьёгөдь.

— Но, ладнө,— дякөн сійё казяліс ли, эз ли, а пырис, думайтны некор.

Петіс сэсся попаддья, восьтіс казаклы.

— Мыйла нин локтін?

— Мөдар землян пё дьёгөдь вылө төвар вежлалёны да, батышко тшөктіс дьёгөдь пельсатө төварөн вежны нуны,— висьталіс казак.

Сэсся сійё босьтіс мөлөт да көрт тув, пельса вевттө топыда тувьяліс, грим-грам петкөдіс дяк тыра пельсатө, пунктіс ва кыскалан доддьё да пондіс мунны. Паныд лоины сылы купечьяс.

— Тэ нө кытчө тайё пельсаа вөвнас мөдөдчин?— юалёны.

— А ме тайё дявөлөс нуа.

— Аттө дивө,— шуёны купечьяс.— Он-ө пё петкөдлы миянлы?

— Петкөдла, куим додь төвар кө сетанныд, а лэдзанныд кө пышйыны, ещө унджык босьта.

— Огө лэдзөй пышйыны,— шуёны купечьяс.

Но, ладнө. Иван перьяліс көрт тув, восьтіс пельса вевт, тыдовтчис дякөн, ставнас дьёгөдьөссьёма, господьё, кутшөм мисьтөм. Чечыштіс дякөн пельсасьыс да давай вөрө. Купечьяс повзисны, давай пышйыны. Иван горзө, мыйла пё лэдзинныд, кутө пө, кутө. А дякөн, сійё только и кырссё-пышйө. Вот пө-й пышйис, вайө пө куим додь төвар. Купечьяс сетісны сылы куим додь төвар. Иван сэсся пуксис вөв вылө и мөдіс гортлань.

Буретш сэки вөлі вичкоысь поп локтө. Аддзис сійё Иванөс и юалө:

— Мый нө ваян?

— Куим додь төвар, со, сетісны дьёгөдь пельса вылад.

Поп только шензьө.

— Вот,— шуас,— чудеса тайё, дзикөдз озырмөдас миянөс казакыд.

Но, ладнө. А попаддья да дякөн водзвыв нин сёрнитчисны, кыдзи найө вермасны аддзөдчывны аски. Попаддья дякөнлы висьталіс, аски пө ме лэчча мөс лысьтыны, а тэ пө лок карта өшинь дорө. Казак сійё сёрнитө ставсө кывліс.

Аскинас мөс лысьтан кад на эз ло, казак пурт босьтіс да попаддьясь на водзджык лэччис карта вылө. Сэсся карта дорө локтіс дякөн. Сійё мыссьёма-й, чиститчөма, весалёма ас вывсьыс дьёгөдьтө.

— Матушка, тэ?— шуис сійё картасьыд.

— Ме,— надзөник, попаддья гөлөсөн, шуис казак.

— Кыдз нө ми аддзысям?

— Ог төд, карта өдзөс зэв ёна дзуртө да ог лысьт восьтнысө,— муртса кылан гөлөсөн шуис казак.

---

— Нинём ме ог кыв, выльысь висьтов,— шуис дякөн и пельсö пуктіс карта öшинь розь шөрö.

Казак дыр эз видзöд, шаркнитіс сылысь пельтö пуртөн. Дякөн горзигтыр лэбыштіс гортас. Попаддя эськö лэччыліс жö карта вылад, да некод нин сэтчö эз воы.

Коркö сэсся-й попаддялы кывсяс, сійö прикодывсь пö дякөн висьмöма. Попаддя-й шуö поплы, огö-ö пö нуö сылы гөстинеч. Ну пö, шуö поп.

Но, ладнö. Аскинас чеччис попаддя да черинянь пöжаліс, посводзö петкöдіс ыркöдны. А казакыд петаліс да черисö сёйис, а дякөнлысь пельсö пуктіс чери местад. Казаклөн сёйсис, и попаддя босьтіс чериняньтö да муніс дякөн ордö. Пырис сійö сы ордö и юалö:

— Висян?

— Вися.

— Ме эськö гөснечтор вайышті да, на сёйышт.

Дякөн чериняньтö косяліс, видзöдö да, сэн аслас пельыс. Тайö пö тай и вундылöма, попаддя вылö чайтіс дякөн, а ачыс попаддялы шуис:

— А мый, матушка, ме вöд кула жö нин, а вай медбөръяысь окасям.

Окасьны кутісны найö, и дякөн попаддялысь кывсö курччис. Попаддя уськöдчис да кывтöгыс котөртіс гортас. Гольöдчö сійö кильчö вылас и лёкысь больöдчö: «Бололо, бололо, бололо». Поп кылöма пöлатсянныс дай шуö казаклы, кодкö пö кильчö вылын больöдчö, мун пö осьт, казак. А казак шуö, тэ пö осьты. Поп сэсся-й осьтіс, больöдчигтыр пырис попаддя. Поп шуö, матушка, тэ тай нö, мый нö тайö?

— Бололо, бололо,— шуö попаддя.

— Мый нö лои, мый?— юасьö поп.

А попаддя век öтикöс тöдö:

— Бололо, бололо.

Казак сэтчö-й шуö:

— Вот, батюшко, бабаыд тэнад по-немецки сёрнитö, менам строк эштіс, вай сё шайттö.

Но, поп сетіс сё шайт, казак петіс дай муніс, а ачыс сійö колис попаддякöд больöдчыны.

## Ярö

Олöны-вылöны старик гозъя. Налөн вöлі куим пи. Медся ичöтыс йöй нисьö прöсуж, Ярö нима. Коркö старик пияныскöд кöдзисны тыла вылö сёркни. Коркö сёркни и быдмас. Сöмын сёркни налөн быд вой кутіс чинны. Старик ыджыд писö мöдöдас кыйöдчыны вой кежлö. Ыджыд пи ветлас да войбыд сургас-узяс, да некодöс оз аддзыв. Мöд вой шөркост пи ветлас, да сідз жö узяс, некодöс оз аддзывлы. Коймöд войнас Ярö мунас, босьтас зэв ыджыд палич да пуксяс кыйöдчыны. Войнас локтас чөрт да кутас сёркнитö гурчкыны-сёйны. Ярö гусьöникөн матыст-час да кучкас чөрттö паличнас. Чөрт усьö и шуö: «Эн ви, ме тэныд бур вöча». Ярö сэсся оз кут нöйтны. Чөртыд чеччас, тшöктас пуксьыны мыш вылас да синсö куньны. Ярö верзьöма-

лас чөрттө, лэбзясны зэв өдйө и воасны чөрт ордө. Чөрт сетас сылы вомөн ворсан гудок да шуас: «Тайон кө кутан ворсны, көть коді йөктас». Сэсся бөр Ярөөс нуас гортас. Бать-мамлы Ярө висьталас: чөртөс пө аддзывлі да нөйті паличөн. Бать-мам да вокъяс сералёны сөмын.

Коркө бать-мамныс кулісны. Ярөлы колисны пай — куим польөпи. Вокъяс Ярөөс вөтласны. Ярө мунас и воас карө. Сійө карын самөй сар нылөс коралёны, и сар сетөма жөникъяслы нөдкыв ныв йылысь. Коді пө сійөс төдас, сы сайө пө и сета.

Ярө пуксяс сар өшинь улө и кутас ворсны, а польөпиян зэв ёна йөктөны. Сар нылыд аддзас йөктөмтө, петас Ярө дорө и шуас: вай пө өтикөс вузав. Ярө шуас: вузавны пө ог вермы, бөжтө кө пидзөсөдзыд лэптывлан, сета өтикөс. Сар ныв лэптывлас, и Ярө сетас. Сар нылыд польөөс пыртас, джоджас лэдзас, а польөыд сөмын руксө: «Кулі, кулі, кулі». Сар ныв думайтө, мый мукөдсьыс гажтөмтчө. Петас и мөдөс кутас корны. Ярө шуө: «Коскөдзыд кө лэптывлан бөжтө, сета». Сар ныв лэптывлас, и Ярө сетас. Сар ныв пыртас польөөс и мөд дорас лэдзас. Кыкөн нин кутасны руksыны: «Кулі, кулі, кулі». Сар ныв думайтө: тайө пө коймөдсьыс гажтөмтчөны, колө корны коймөдсө. Петас Ярө дорө и шуас: «Вай мен коймөдсө». Ярө шуас: «Киняулөдзыд кө лэптывлан бөжтө, сета и коймөдсө». Сар ныл лэптывлас, и сылысь киняувсьыс Ярө аддзылас нель зарни пудпас. Сар ныв пыртас польөөс кык польө дорад. Куимнаныс кутасны руksыны: «Кулі, кулі, кулі». Сэсся сар ныв куимнансө шыбитас гидняас.

Коркө Ярө пырас сар ордө корасьны. Сарыд нөдас сылы: «Мый пө менам нывлөн киняулас эм?» Ярөыд и төдас: «Нылыдлөн киняулас эм нель зарни пудпас». Сар көсьяс нин лөсьөдны свадьба, а Ярө шуө: «Часлы, ме ветла нажөвитчыны». Мунас, мунас да воас өти вөлөсьтө. Поп ордө пырас казакө медасьны. Поп медалас сө шайтысь. Аскинас поп ыстас казакөс мөс видзны. Ярө мөс видзны мунас да пыр өзимъяс вывті мөсьяссө новлөддас, и мөсьясыд зэв ёна пөтасны. Попаддя рытнас петас мөс лысьтыны, и мөсьясыд зэв уна йөвтө ваясны, и попаддя шуө поплы: «Миянлы казакыд зэв бур сюрөма». Поп шуө: «Бур и колө». Аскинас поп казак бара мөс видзны кайө. Сувтөдас мөсьяссө турунтөминө и кутас ворсны гудокнас, а мөсьясыд сөмын чеччалёны-йөктөны. Мөсьяс зэв ёна мудзасны. Рытнас локтас Ярө, мөсьясыд пыр и водасны. Попаддя петас, кутас мөсьястө лысьтыны, а мөсьяс оз чеччыны. Попаддя пырас, висьталас поплы. Поп казакөс кутас видны.

Аскинас бара казак мунас мөс видзны. Сувтөдас мөсьяссө важинас. Поп вөлөн вөтчас кыйөдчыны, баддьө пырөма. Казак перйө на гудөксө, а мөсьяс коксө лэпталёны нин. Кутас ворсны, и мөсьяс зэв ёна кутасны йөктыны. И попыд кутас йөктыны, став рясяссө баддяс косявлас. Рытнас казак лэччас. Мөсьяс бара водасны. Поп локтас и шуө попаддялы: «Казакыд мөсьястө йөктөдө, и менө тшөтш йөктөдіс, и став рясаөс косявліс».

Поп судө сетас казакөс. Кутасны мунны судө, да налы паныд лоөны стеклө доддяс. Найө юалёны: «Кытчө мунаныд?» Поп шуө: «Ме тайөс медалі казакө, а сійө миянлысь мөсьяссө йөктөдіс, и менө тшөтш йөктөдіс и став рясаөс косявліс». Стеклө доддяс шуөны: «Миянөс кө йөктөдас, ми сетам кызь шайт».

---

Казак кутас перйыны гудөксө, а поп өдйөджык вешгъяс да потшөсас домасяс. Казак кутас ворсны, и стеклө доддьясыд сөмын чеччалөны-йөктөны. Вөвъясид стеклө доддьяснас кутісны чеччавны, йөктыны. Поп потшөснас быдсөн чеччалө.

Стеклө доддьяслөн став стеклөыс жульысис, и найө тшөтш судитчыны мунісны казаккөд. Мунісны, мунісны и воисны управаө. Поп шуө: «Ме тайөс медалі казакө мөс видзны, сө шайтысь, и сійө миянлысь мөсьясөс йөктөдіс, и менө йөктөдіс, и став рясаөй косясьліс». Стеклө доддьяс шуөны: «Тайөяс миянлы паныд лоисны, и этайө кутіс ворсны, да миян вөвъяс кутісны йөктыны, и став стеклөяссө жугөдіс».

Суддьяс шуөны: «Миянөс кө йөктөдан, ми сетам дас шайт, и попыд сетас сө шайт, и стеклө доддьясыд сетасны кызь шайт». Попыд мыйон кылас, пыр и петас да домасяс сюръяө. Казак кутас ворсны, а суддьяс сөмын чеччалөны-йөктөны да гигзьөны-сералөны, а поп быдсөн сюръянас лыблө, сэтшөма, любай, йөктө. Сы вылө суддьяс видзөдласны да, сыысь ёна серамныс петө.

Казак дугдас ворсны, и суддьяс сетасны дас шайт, поп — сө шайт, и стеклө доддьяс — кызь шайт. Казаклөн лоас сө комын шайт. Мунас сар дорө, гөтрасяс сар нывкөд, и өні на олоны-вылөны зэв бура. Челядьныс кө вывті лыбзьыны кутасны, найөс вом гудөкөн йөктөдөны.

*Дасьтіс Олег Уляшев.*



---

#### *ПЫДДИ ПУКТАНА АВТОРЪЯС!*

Редакцияө гижөдъяснытө ыстігөн быть колө юөртны:

1. Ассыныд ним, вич, ов; кор да көні чужлөмныд (лун, төлысь, во).
2. Паспорт юөръяс: номер, серия, кор да көні сетісны, гортса адрес (прописка серти).
3. Индивидуальной налогөвой номер — ИНН.
4. Страховөй свидетельство номер.
5. Банкын счөт реквизитъяс.

**Тайөс юөрттөг редакция гонорар оз вешты.**

---

*Журналын йөзөдтөм гижөдъяс  
редакция оз рецензируют и авторыслы найөс оз мөдөд.  
Редакция оз век во өти кывйө авторгъяскөд.*

---

Компьютерный набор — **Н.Кузнецова.**

---

Учредители: Администрация Главы Республики Коми,  
«Союз писателей Республики Коми» — региональное отделение общероссийской  
общественной организации «Союз писателей России».  
Издатель: АУ РК «Издательский дом Коми». Директор Орёл И.Н. Адрес издателя: 167982.  
ГСП-2, Республика Коми, г. Сыктывкар, ул. Карла Маркса, д. 229, Дом печати.

---

Адрес редакции: 167982, ГСП-2, Республика Коми, г. Сыктывкар, ул. Карла Маркса, д. 229, Дом печати. Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

**E-mail: kodzuv@mail.ru; Сайт: www.komimu.com**

---

Подписано к печати 17.06.2019. Дата выхода в свет 28.06.2019. Формат 70х108<sup>1/16</sup>. Печать офсетная. Усл. печ. л. 7; усл. кр.-отг. 8,4; учётно-изд. л. 7,54. Тираж 431. Заказ № 19-5254. Регистр. ПИ № ТУ11 - 00347 от 24.03.2017 г. выдано Управлением Федеральной службы по надзору в сфере связи, информационных технологий и массовых коммуникаций по Республике Коми. Публикация материалов на социально значимые темы осуществляется за счет субсидии, предоставленной Администрацией Главы Республики Коми из республиканского бюджета Республики Коми. Отпечатано в ООО «Коми республиканская типография», 167610, Республика Коми г. Сыктывкар, ул. В.Савина, д. 81. Цена свободная.



Снимокъясъс **Юрий Лисовский**лӧн.

